

東
華
續
錄

東華續錄

臣周濟蕃恭校

秋七月癸未朔諭朕躬攬萬幾勤勞宵旰宮闈內政全資 孝賢
皇后綜理 皇后上侍 聖母皇太后承歡朝夕純孝性成而治
事精詳輕重得體自妃嬪以至宮人無不奉法感恩心悅誠服十
餘年來朕之得以專心國事有餘暇以從容冊府者 皇后之助
也茲奉 皇太后懿旨皇后母儀天下猶天地之相成日月之繼
照皇帝春秋鼎盛內治需人嫺貴妃那拉氏係 皇考向日所賜
側室妃人亦端莊惠下應效法 聖祖成規卽以嫺貴妃那拉氏
繼體坤甯予心乃慰卽皇帝心有不忍亦應於皇帝四十歲大慶
之先時已過二十七月之期矣舉行吉禮嘉兒嘉婦行禮慈甯始

愜予懷也欽此朕以二十餘年伉儷之情恩深誼摯遽行冊立於心實所不忍卽過二十七月於心猶以爲速但思 皇后大事上軫 聖母懷思久而彌篤歲時令節以及定省溫清朕雖率諸妃嬪及諸孫問安左右而中宮虛位必有顧之而愴然者固宜亟承慈命以慰 聖心且嬪嬙內侍掖庭之奉職待理者甚眾不可散而無統至王妃命婦等皆有應行典禮久曠不舉亦於禮制未協冊立旣不忍舉行可姑從權制考之明太祖淑妃李氏甯妃郭氏相繼攝六宮事國朝順治十三年冊立 皇貴妃 皇曾祖世祖章皇帝升殿命使翌日頒詔天下典至崇重今應倣效 前規冊命嬪貴妃那拉氏爲皇貴妃攝六宮事於以整肅壺儀上奉聖母襄助朕躬端模範而迓休祥順成內治有厚望焉所有應行典禮大學士會同禮部內務府詳議具奏尋議恭查 皇貴妃冊

立大典王妃命婦行禮已有成例 貴妃行禮之處外廷無案可稽但 皇貴妃攝行六宮事二十七月後卽正位中宮旣統理內政體制自宜尊崇 貴妃亦應一體行禮所有冊封禮儀應前期一日遣官祭告 太廟 奉先殿告祭禮 上親詣舉行屆期設鹵簿儀仗中和韶樂 上御太和殿閱冊寶大學士奉節授持節使持節使隨冊寶亭至景運門授內監 皇貴妃具禮服恭迎宣受如儀次日 上率王以下文武官員詣 皇太后宮行禮禮畢 皇貴妃率 貴妃以下公主王妃命婦行禮 上御太和殿受賀頒詔天下嗣後遇三大節及慶賀大典三品以上大臣官員進箋慶賀及每歲行親蠶禮應照例舉行得旨依議冊封典禮著於明年三月後舉行其親蠶禮俟正位中宮後該部照例奏請○戊子吏部等部議准雲南總督張允隨奏廣西羅城縣通道鎮與貴

州古州等處苗寨接壤羅城縣所轄之賈廷等大小一十四寨從前俱係古州招撫距古州之下江營僅三十餘里地勢近黔易於約束請將見廷等七寨及所附之賈廷寨等七小寨就近隸古州管轄至因洞羅洞寨麻大蒙等四寨雖經古州招撫但離羅城之通道鎮止四五十里應歸羅城管轄其界址應從因洞左手岑董山溪頭起至寨麻之下孖得兩岔溪口止溪左屬黔溪右屬粵兩岔溪口以上右岸各寨屬粵溪口以下右岸各寨屬黔於兩岔溪口分定黔粵疆界鐫碑遵守從之○辛卯 皇九子生○壬辰訥親張廣泗奏報自五月三十日至六月十五日腊嶺卡撤黨壩甲索乃當馬奈正地諸路攻戰情形總兵買國良署總兵任舉陣亡得旨任舉深屬可惜有旨交部從優賜卹卽買國良等畢命疆場雖屬效力之誼而朕觀之實屬不忍爲之淚下亦有旨諭部將此

旨先諭軍前將士知之又諭據經略大學士訥親等奏稱署總兵任舉統兵攻腊嶺石城親身督戰奮勇直前多所斬獲乘勝追殺致被槍傷陣亡等語任舉前在參將任內因固原兵變一案以單騎手刃亂兵解散賊黨捍禦全城安撫百姓勞蹟已爲懋著故特擢用副將命往大金川軍營領兵攻勦所向克敵見已補放總兵官深望凱旋之日錄功優敘以獎殊勛孰知任舉感朕知遇奮勇捐軀深堪憫惻考之典禮以死勤事者祀之本朝特建昭忠祠用享疆場效命之臣任舉著入祠從祀所有卹典照提督例給與該部察例具奏伊子亦照提督例給與廕襲該部並行文調取來京帶領引見至買國良等著經略大學士訥親於軍務告竣之日查明咨部一體從優賜卹○訥親又奏五月二十日抵成都次日赴營六月初三日至督臣駐紮小金川美諾地方督臣初四日赴卡

撤臣駐美諾初六日赴卡撒美溝軍營初九日同往腊嶺相度山勢數路皆通刮耳崖山陡箐密碉寨層層獨色爾力一梁勢尙平坦賊碉皆在梁旁梁上止有木石城卡數座若能攻克一面分兵牽制一面即可順梁而下較卡撒美溝正路甚爲得勢詢據各番咸稱下至底溝去刮耳崖亦不過數里會商督臣將哈攀龍王愷所領兩路官兵歸併腊嶺一路台之從前抽撥腊嶺兵共萬餘名仍督已到官兵攻奪木城數座賊守石城甚固屢撲未下十六日署鎮任舉奮往督催被槍陣亡督臣聞報卽日親往調度務期必破再查我兵可以進抵勒烏圖刮耳崖賊巢惟黨壩腊嶺卡撒三路今黨壩腊嶺均有重兵惟卡撒雖駐兵三千餘名除護糧分防外餘兵不敷攻剿若另調新兵緩不及事莫若就中酌量有應牽制堵禦及彈壓土司之處量留攻守餘兵悉抽併卡撒見與督臣

會商辦理再賊番因險據碉故能以少禦眾今我兵旣偪賊碉自當亦令築碉與之共險兼示以築室反耕之意賊番自必搖動已飭星速修砌總之就見在情形今秋能否告竣尙難豫定報聞又奏查各路官兵不能前進者多惟腊嶺一路雖見爲石城所阻度我兵力尙可望進取臣與督臣到營未久戰勦機宜督辦伊始且各路抽調官兵尙未到齊容臣一面辦理一面籌畫俟月餘後如果我兵已全力攻勦猶有不能速捷情形再行妥議密奏得旨卿意遲待數日一舉成功何等慶快殊未憶及朕之懸望耳及至奏到仍不過如是且聞任舉凶問不勝感惜何能慰朕耶又批張廣泗去歲奏張興之事措辭得體今任舉乃捐軀致命者也而汝等不過奏聞其事亦未詳悉殊不知輕重也又批今又有任舉之事則益成騎虎之勢若不埽穴犁庭何以慰忠臣義士之魂且恐各

番效尤後來之所費益多前旨亦謂此事成功之後瞻對或可酌量耳不可錯會○癸巳諭軍機大臣等據大學士訥親奏報大金川軍情及籌辦事宜一摺內稱賊番因險砌礮藏匿其內故能以少禦眾以逸待勞今我兵旣偪賊礮自當亦令築礮與之共險兼示以築室反耕之意且守礮無須多人更可餘出漢土官兵分布攻擊似亦因險用險之術見飭各路星速修砌遵照偪攻等語此事披閱再四不能解辦理之意自大金川用事以來頓兵卡撒久厯時日賊酋逆我顏行傷及將士自當剋期撲滅以收犁庭掃穴之功今據訥親等所奏情形似尙費經理非旦夕可以竣事但攻守異用彼之築礮以爲自守也我兵自宜決策前進奮力攻取且用以破礮之人而令效彼築礮是亦將爲株守之計耶礮不固則不足恃築礮固則徒勞眾若以此築礮之力移之攻取破彼之礮

以奪其所恃不亦可乎在訥親等或自別有籌畫而奏內尙未明
晰在朕度之或因慮及山深密入秋難於克捷豫爲退駐之地
耶訥親等恐未必籌及於此卽使有見及此亦非萬全之策蓋能
克其碉而守之猶屬因利乘便之義今因彼守險我亦築碉徵特
勞費加倍且我兵已深入賊境地利氣候素不相習而守碉勢須
留兵多則饋運難繼少則單弱可虞賊酋兇狡必狃我以持久出
我之不意浮寄孤懸客主之形旣別情見勢絀反覆之慮尤深師
老財匱長此安窮不可不熟計也且將來大金川撲滅之後此地
不過仍歸之番是今勞師動眾反爲助番建碉之舉恐貽災於國
人躍治於番部矣昨批此摺卽以爲不安今思之一夜終非善策
不如速罷之爲宜再朕閱另摺所奏任舉等捐軀報國畢命疆場
不禁爲之淚下在伊等忠憤激發固已甘之如飴而以小醜跳梁

用伊等於危地思之殊深惻惻雖業經交部從優賜卹足慰忠魂而事後之慮彌切見在大學士訥親尙書班第內大臣傅爾丹總督張廣泗提督岳鍾琪等立營漸偏賊巢凡有進止更當因時度勢鄭重籌辦不宜徒事奮往以副朕念至所調綠旗兵丁或尙未能勁健可否另調滿洲及索倫兵之處著傳諭大學士訥親酌量一併具摺覆奏朕看大金川竟難措置設其易處則張廣泗久歷戎行之人已早成功矣今訥親雖爲經略止宜持其大綱督令張廣泗等各施謀猷以圖速奏膚功卽如建礮之策率皆不中緊竅而張廣泗亦附和而無語可見彼有推諉之意矣殊添朕憂訥親不可不知也此事速行回奏並將近日情形若何奏來○甲午諭軍機大臣等訥親昨奏到軍機一摺已詳悉頒發諭旨今再四思維所云建礮之策不惟有所難行亦且深爲可慮將謂得尺守尺

得寸守寸以此爲自固之策獨不思礪樓非可易成即使能成而我兵究以攻取爲事若再行前進其將又建一礪耶向後屢進不已策將安出且調集大兵本以制勝今不用以克敵而用以建礪必非所願以朕度之此旨未到之先勢將中止儻其意在必成究屬徒勞無益朕見此摺卽不以爲然及問在京大臣等皆見以爲不可朕意張廣泗老於戎行豈其不知而亦隨聲附和在張廣泗未必不自謂任事經年未著成效今既有經略肩茲鉅任發謀決策經略裁之是非得失亦經略當之而彼得袖手旁觀遂其推諉之計如此則所繫更大矣訥親不可不知此意且朕命經略前往原以總挈大綱在朕坐籌遙度於京師不如令可信之大臣親履行間察眾人之情就目前之勢相機指示據實入告尤爲親切此朕命訥親前往之本意也至宣猷效用仍當委之張廣泗等使各

盡其長即使朕親行亦不過指揮調度而所用自在羣策羣力從來耕當問奴織當問婢若論用兵熟練朕必不肯謂訥親優於張廣泗卽訥親亦必能知此要之經略統領全軍眾人之謀皆其謀眾人之力皆其力豈必出自己見方爲己功耶而朕更有深慮者大兵聚久變患易生在固原平居無事之時尙有一夫夜呼倉卒四起之變何況軍中親信僅百數十人此外皆調發客兵及蠻司士卒本非世受深恩爲我心膂浮寄孤懸孰無室家鄉里之戀而勞役不已奏凱無期版築方殷鋒銳莫展肘腋之慮良可寒心在部曲士旅固不可不鼓其勇氣而鋒鏑之下人孰甘心驅之太迫變計生焉儻有不測豈不重貽西顧憂耶此所爲反復以思而食不甘味寢不安席凡思慮所及不得不備細告之訥親使備知之也金川之役本不容中止况任舉之變失我大帥如其置之不問

何以慰彼忠魂。我眾憤但忿兵亦將略所忌。自宜因時度勢。以爲進止。儻險地必不可爭。或別有出奇制勝之善策。如古所稱用閒用術。或縱甘言。或懸重購。使彼有內潰之機。然後可乘其敝。從前王柔亦謂蠻夷可以利動。且彼醜類無多。不惜厚費。或可坐縛酋首。此亦無聊之思耳。近日郭萬里亦有當用反閒之說。儻其言有可採。豈不較圍險乘危輕進取。衄者爲優耶。又王柔何時到軍。前可曾建白。及此可就近咨詢。溽暑炎蒸。瘴癘毒作。暴露日久。無刻不勞軫念。大學士起居慎自愛護。並傳諭軍中諸大臣將弁。其各慎重。此旨尙宜斟酌。可令張廣泗知者。一併諭令知之。○乙未諭軍機大臣等。近據訥親所奏。金川軍務情形。朕詳爲審度。見在將弁同心士卒效命。而奇險難攻。天時暑雨。似非一時所能就緒。目今大兵已深入賊境。設令膚功不能立奏。經秋涉冬。彼地沍寒。

難駐又不得不暫營平暖之處相時再舉深慮久戍之卒一聞撤散勢必心渙狡寇從而躡其後大有可慮若將來必至退守則移駐何地並如何撤回之處亦當豫爲籌度萬全且大兵調集遠來並瞻對之役既經三載其附近土司供應夫役亦已數年運餉從征更多擾累近聞蜀有州縣派夫徵餉苦累農民已傳諭尙書班第令其往來查察訥親可卽速令其前往並飭巡撫紀山速爲查辦內地如此土司可知恐其積勞懷怨煽動生心而我軍孤懸賊境非內地聲援聯絡可比深爲可虞可傳諭訥親張廣泗體悉此意處處刻刻留心密切豫防再朕命訥親前往原以總領大綱觀察情狀督率調度張廣泗四川省封疆大帥且統領全營二年于役凡軍務責成專惟張廣泗是寄今厯練戎行嫻熟軍旅孰有過於張廣泗者伊當竭誠協力經畫機宜不可因大學士在營稍有推

讓之心或存彼此之見見今各路兵勢若何古之用兵制勝者曰
觀變曰攻瑕賊眾所短何在何處有隙可乘訥親張廣泗在營當
有成算可詳悉奏聞○戊戌德沛因病解任調達爾黨阿爲吏部
尙書以盛安爲刑部尙書御史左都○己亥飭八旗前鋒護軍訓練
雲梯兵○辛丑諭米穀爲民生食用所必需朕夙夜籌維一切農
田水利無不申諭有司加意經理又蠲免米豆稅銀數至鉅萬所
以爲百姓謀朝夕者纖細具備而邇年以來各省米價不見其減
而日見其增反復推究莫知致此之由常平積貯所以備不虞而
眾論頗以爲採買過多米價益昂因思生穀止有此數聚之官者
太多則留之民者必少固亦理勢之自然溯查康熙雍正年間各
省常平已有定額朕以儲積爲要故准臣工奏請以捐監穀石增
入常平額雖益倉儲實礙民食朕旣知初意之失不可不爲改絃

之圖直省常平貯穀之數應悉準康熙雍正年間舊額其加貯者
以次出糶至原額而止或鄰省原額不足卽就近撥運補足所需
運價照例報銷其如何彼此撥運並查定原額存糶之法著大學
士會同該部悉心查明妥議具奏○以富德爲左副都御史由太常寺
遷○癸卯諭軍機大臣等阿里衮奏東省連年饑饉窮民艱於口
食共謀搶奪多係無知誤犯援照乾隆五年前撫朱定元請減災
黎誤犯案內分別流徙枷責發落之例辦理等語窮民遭遇災傷
撫綏賑恤不惜多費帑金倉穀原以養其良心使不流爲匪類以
期安靖地方在災民平日果屬良善必不起意爲非乃明知國家
有賑恤之恩而以饑餓難忍爲由仍復肆行搶劫若不嚴行懲究
將來必至羣起效尤此例起於朱定元乃姑息之尤伊在東撫任
內一切辦理未安何足爲法試思伊當時僅莒州郯城二案今已

有五十二案未必非扒搶例寬有以啓奸匪倖免之念以致盜風愈熾寬縱滋弊已可槩見况東省負山瀕海非旱則潦屢次偏災而民情兇悍亦易於爲盜據該撫奏報今年已有數處被水者當此積歉之餘收成又減分數正須時時留心籌畫若再將搶奪案件從寬辦理奸民肆無忌憚何所底止阿里衮所奏大槩不過爲地方處分起見所見甚小且於該省情形未協著傳諭阿里衮見在所辦各案俱著照伊應得之罪按律分別定擬不得槩援饑民扒搶之例率請減等上年東省重災若非特派高斌劉統勳等前往協助恐阿里衮一人辦理周章未必能如此安帖見在被水州縣近日情形若何將來作何辦理朕心深爲軫念著傳諭阿里衮時刻留心加意妥協辦理以安撫災黎弭輯奸盜不得稍有忽略

○諭據張廣泗將總兵馬良柱解送到京朕命軍機大臣問伊軍

前情形及乘夜撤營遺失軍械緣由據伊供出種種情形並稱從前駐守會達之時糧運爲雪所阻已經半月士卒皆煮皮鎧鞍韉而食接到總督撤營檄文人思更生礮位軍械因雪大不能搬運以致遺失等語馬良柱前於班滾案內扶同欺隱茲復臨陣退縮罪固難追但伊在四川二十餘年地方情形頗能熟悉卽以進剿大金川而論始帶兵千餘名在瓦寺松林口等處奮勇督戰遂解沃日之圍又收降小金川之眾乘勝克復孫克宗是伊在三鎮中尙爲出力卽班第前此亦經備悉矣聞至其撤營一事據稱糧運被阻已經半月果爾則時日甚久兵丁何以克存恐屬狡飾之語如實係如此是馬良柱之倉皇拔營其罪又當別論可傳旨詢問大學士訥親秉公確查不必問之張廣泗與班第彼時糧運是否爲雪阻滯已歷半月之久將情由速行奏聞備所供屬實馬良柱

年雖六旬有餘精力尙屬可用將來仍發往軍前立功贖罪或猶勝於新任苗疆之人其供單並卽鈔發至訥親前次奏摺係七月初十日到京今又幾半月並無具奏之件朕心日深盼望在訥親之心必係期於速捷以待奏報膚功但軍營事務朕切欲備悉其情形無論大攻克成固宜迅爲入告卽或尙在酌辦亦當隨時奏聞以慰朕西顧之念嗣後著十數日一次繕摺具奏沿途驛馬甚便可以無虞羈滯亦不致甚勞也其見在進剿事宜若何天時晴雨若何大金川軍務旣不能中止本年儒未能卽竣將來作何結局訥親等目下作何籌辦著一併詳悉速奏朕意示弱罷兵以逞賊意斷不可爲而又實無制勝萬里之能因思滿洲舊有蟻附登城技藝甚爲便捷因承平日久未經演習今已派大臣挑選八旗兵丁數百名按期操練務令純熟將來或可備攻擊碉樓之用並

暫留馬良柱於京師且不問其罪令其度量賊礪情形協同演習俟訥親奏到再酌量撥往軍營並諭知訥親將此項技藝可否足以備用之處卽行奏聞○丁未常安諭綬○庚戌諭軍機大臣等據經略大學士訥親總督張廣泗等奏報大金川進攻情形並將總兵哈攀龍副將高宗瑾分別具摺糾參朕已照所請交部但此次辦理軍務似微有過嚴之處夫軍行首重紀律固不得不嚴惟是嚴於罰者亦當明於賞鼓舞人材之道又不得不加委曲假如同屬中平之材其十人中豈無二三人略勝者則就此二三人稍示優異以勵其餘又如一人之身或功過相參則當亟加賞賚以不沒其功俾其感激鼓勵直前翼蓋前愆如其再有過犯加以嚴處彼亦甘受無辭蓋從征將士身冒鋒鏑臨陣對敵毆之以性命相搏而賞罰之道若不神明其用甚至有罰而無賞兵丁等豈

明大義未免寒心漸就怠情更或隱含怨憤當此倥傯旁午之際
少有變故所關匪細自大金川用事以來大小員弁以過受罰者
多人而破格被賞者頗少似非鼓勵將士之道至朕閱摺內所稱
此皆臣等措置未當發縱無方等語大學士訥親等未免期效太
急伊等肩茲重任頓師日久其心固切欲進攻以期大捷而兵情
地勢難易緩急閒亦當隨時酌度逆酋險礪林立一夫當關萬眾
爲之阻奪卽朕此時反復籌維亦尙無調度萬全之策况急於期
效亦屬無益且恐欲速過甚未免轉有疏虞此又不可不審也再
如割取耳記一事朕前恐行之未便是以交軍機處定議今據奏
稱接到諭旨又行酌改用兵大事朝令夕更原非所宜朕於數千
里外何能事事遙度悉中機要歷次所降諭旨其能行者固當遵
辦卽或勢有難行或已發而未便復收亦不妨據實奏明總期歸

於妥協但此事既經改辦止得照行其奮勇兵丁另當熟籌獎賞之法以示鼓勵又參將五德納等帶領土兵於木耳金岡一路新紮五卡俱處賊人麥田踐其麥禾此舉頗爲得當第不知他處何以不能如此蹂躪豈進攻之地未入賊人麥田耶朕前已兩次降旨詢問可再查明奏聞其建立碉樓一事所降之旨目下諒已接到此次摺內未見奏及或以勢難强行因而中止或照前摺尙在舉行情形究竟若何且入秋將近半月賊境雨雪漸繁將來作何行止朕日爲廬念著一併具奏○辛亥諭盛安素喜沽名當皇考時教導不悛至革職治罪朕加恩屢經任用近日刑部尙書一時不得熟練之人是以復令辦理乃伊到任以後故智復萌於參革錦州府知府金文醇剃頭一案刑部遲延不奏朕意伊等必將故遲其事以待言官之陳奏如此則將啓賁緣朋黨之風所繫更

大正欲面降諭旨訓飭孰知盛安忽欲改擬斬候因而不進本此案伊在都察院時已經於斬決本內畫題及調任刑部忽欲自改前議斬決重案豈可以伊一人之意見爲輕重況伊補授刑部尙書後召見時卽會奏此案伊雖畫題於意似應擬斬候朕諭以爾與同部堂官按例定擬朕自加恩伊並不將此旨告之同官惟稱斬決過重遲回觀望久而不奏及召至面加詰詢伊乃稱 孝恭仁皇后大喪內有佐領李斯琦剃頭間擬斬候之案今擬斬決恐人疑其辦理未協等語在伊果見以爲過重卽應於都御史任內未經面奉諭旨之前另議具奏何獨至爲刑部尙書方謂過重且伊已知朕意在從寬而必不肯令改寬之旨出於朕之特恩而出於彼沾取持平之名歸於一己其心尙可問乎今日面問伊時伊惟以滿語奏稱曾有是旨而不肯漢語承認是伊於此際猶不肯

令漢大臣知朕從寬之意以沽名於眾漢人也又巧謂恐人疑其過重於朕名爲不美試思部議重而朕特從輕宵傳之海內爲美名乎爲不美之名乎伊以執法之司不遵明旨不按成法不通知同官而固執私見激朕使怒重治其罪則過在君父而已居美名豈非巧僞之尤者且伊自稱年老是視朕爲幼年無知之主矣朕肯甘之乎卽以金文醇一案與李斯琦之案相較在李斯琦當日不過廢官私自剃頭耳而金文醇由翰林出身官至知府並非冒昧不知大義者可比同城之防禦又曾以滿官皆未剃頭正言規勸而金文醇悍然不顧李斯琦案情同此乎此乃有心故犯輕視國制正如本朝初入關時抗不剃頭之犯有不立行正法者乎金文醇情罪可惡如此卽立行處決亦所應當而朕仍向盛安明降諭旨欲從寬典且剃頭一事始於阿里衮之參一武弁貪婪案內

有在國服內剃頭之一語大學士等照例稟籤朕謂違國制之罪重而貪婪之罪輕照例稟籤非是故改令治其違制之罪夫君臣上下之所以相維繫者賴有此名分也今也人視此爲泛常而忽之其所繫者尙小乎夫不知尊君者人臣宜共憤而盛安反與之比是其罪卽同且此事不犯則已旣犯而寬之則將來藐視國憲者接踵矣然朕猶以爲漢人容有不知而誤犯者不治以罪又不

可故從權令大學士等傳諭各省督撫令其除見犯外不必嚴查蓋以 祖宗成法具在斷不可縱弛而所犯之罪旣重恐觸網者多朕心有所不忍此猶朕失於寬懦之處也朕亦知必有人議當

皇考大事時未經查辦此等案件者朕意不得不明示眾人蓋昔當居廬泣血之時盡禮盡哀尙恐不逮且卽位之初大臣等顏面尙且不識軍國機務重大豈暇旁及此等事亦實不知有此等

事也而當時曾有宗室一人犯案治罪宗室向例在議親之列尙且定從斬候今 皇后之事朕哀則哀矣而飲食起居用人理事如常適遇此等犯案故爲不知而不明正國法以彰 祖宗之制以明上下之分可乎且古之人主有愛女死而怒戮醫士數人者朕豈遷怒之主乎果使遷怒當怒御醫進藥之輩何怒於百日內剃頭之人更何怒於金文醇今雅爾圖劉裕鐸輩爵位恩賚如故亦眾人之所共知者且卽有人加朕以惡名朕亦不避何則爲世道人心任勞任怨 皇考十三年之苦心也朕縱不德敢不效法朕臨御十三年居心行政海內共知而盛安敢於肆行私意屈法徇庇以爲己德其處心積慮視朕爲何如主也著革職擊交刑部從重治罪以爲人臣目無君上巧僞沽名者戒汪由敦等與金文醇誼屬同鄉輩稱前後自樂於盛安之有此議而不肯爲盛安之

激怒試朕者則漢人之巧習也此亦不能逃朕洞鑒刑部堂官除
兆惠持議不從外餘著交部嚴察議奏尋刑部等衙門奏盛安曲
意徇私市恩邀譽依律擬斬候不足蔽辜應從重擬斬立決得旨
從寬改爲應斬監候秋後處決吏部奏汪由敦等扶同曲法殊屬
溺職應將刑部尙書汪由敦左侍郎勒爾森錢陳羣右侍郎今調
吏部右侍郎魏定國均革職係革職留任之員應革任得旨俱從
寬免其革任○王子諭朕前以紀山之父額倫特在陣前效命捐
軀紀山身任巡撫又黽勉供職特施恩將伊自鑲紅旗擢入正黃
旗滿洲內伊宜愈加奮勉盡心辦事竭力報效今乃並不誠心辦
事舛錯甚多又因私事與總督張廣泗不睦有負朕恩紀山著仍
撥回鑲紅旗○諭盛安之子喀通阿從前妄寫假書請託一案卽
應治罪朕特念盛安加恩寬宥未經治罪交付盛安今盛安身獲

重罪見交刑部伊子喀通阿之罪豈可仍行寬宥喀通阿著發往熱河披甲卽行起解

閏七月癸丑朔諭刑部事務緊要滿洲尙書員缺朕於各部侍郎內詳細評量或才堪辦事而踐更未久或才力未充而統率匪宜一時未得其人阿克敦前雖獲罪尙係舊人且其獲罪不因辦理部務錯繆尙可棄瑕錄用著署理刑部尙書吏部侍郎德通爲人尙屬勤慎小心都察院亦事簡著補授都察院左都御史吏部侍郎員缺著盛京侍郎介福調補工部侍郎員缺著宗室公恆祿補授內閣學士員缺著觀保補授○戊午實授書山倉場侍郎以吳拜爲內閣學士原任倉場侍郎○實授彭樹葵湖北巡撫以張師載爲倉場侍郎由宗人府承選○以鍾音爲盛京刑部侍郎嵩壽爲內閣學士由副都御史選○庚申諭禮部侍郎沈德潛年力就衰著以原銜食俸在

阿哥書房行走禮部侍郎員缺著齊召南補授內閣學士員缺著

葉一棟補授○調魏定國爲吏部右侍郎以梅穀成爲刑部右侍

郎降陳惠華爲左副都御史

由兵部右侍郎遷

○戊辰諭據安甯奏稱江

南總河周學健於

孝賢皇后大事二十七日甫畢卽已剃頭其

所屬文武官弁亦皆剃頭內止有淮徐道定長一人遵奉法度等

語前此福州將軍新柱到京陛見時會奏稱伊到淮安時周學健

因已剃頭恐被知覺卽借查河之名避不相見朕比時以周學健

國家大臣於名分攸關之處自必深知而謹守之斷無此等悖謬

之事或係傳聞未確亦未可知此外又有數人奏及此事朕皆未

深信今安甯所奏如此是周學健喪心悖逆不惟一己敢於犯法

並所屬官弁同時效尤棄常戾禮上下成風深可駭異周學健自

爲翰林沐朕深恩內用侍郎外用督撫原非以其才猷經濟高出

倫輩不過因一時難於得人卽伊偏才小器棄短取長將就任用稍資驅策耳詎料伊目無上下之分竟至於此朕前曾降旨傳諭各省督撫未發覺者不必深究原因微員人數眾多所犯又係重罪一經查出不容輕恕是以姑從寬免更不意封疆大吏猶有如是者實出意想之外故屢聞人言皆付之不信然使周學健身負重罪稍有知識卽應自行檢舉乃處之泰然希圖蒙混掩飾揆之國憲實所難追周學健著大學士高斌就近拏解來京交刑部治罪此事傳聞已久舉朝大臣官員豈槩無聞見乃無一人舉發外廷九卿召對尙稀至軍機大臣等時常召見亦未經奏聞其意不過欲爲之蒙蔽以救伊重譴試思朕果可蒙蔽之主乎今朕降此旨伊等能封駁執奏乎見在交部治罪部臣及漢人同年相好尙敢以己之身家首領爲伊保全乎又都察院御史給事中等平時

採聽風聞卽細微未甚確實之事動輒陳奏今以周學健之悖謬朕已屢有所聞乃未見伊等片牘入告明係伊等師生朋黨之誼固結彌縫牢不可破是以代爲容隱緘默不言朝廷設耳目之官以司糾劾可如是之徇隱袒庇乎卽非盡出於黨護周學健亦必以爲舉發此事將恐招致物議人心至此尙可問乎 皇考時因朝廷結黨蒙蔽極力整頓始得肅清今漢大臣官員等風氣又復如此捫心自問能無愧懼乎不特此也滿洲之託名科目好名無恥之徒如尹繼善者身任江南總督乃明知不奏若非瞻顧同年有心欺隱則必以爲若奏此事於己有不美之名其心更不可問著交部嚴察議奏尋議尹繼善徇隱瞻顧曲法沽名應照溺職例革職得旨革職從寬留任○諭江南河道總督員缺一時不得通曉河務之人從前嵇曾筠以大學士兼任河道總督今卽著大學

士高斌暫行管理○諭軍機大臣等周學健違制剃頭見今拏交刑部治罪伊籍隸江西著巡撫開泰卽將伊家產逐一勘明務必實力嚴查勿令寄頓隱匿開泰係科甲出身向來以讀書人自負於師生年誼習氣未免瞻徇此番若稍有迴護袒庇之意伊斷不能保其首領可並傳諭開泰知之○以積德爲左副都御史由通政使

○以倉德爲太常寺卿高越爲四川布政使

由山東濟東道遷

○己巳

上啓鑾幸盤山○召塞楞額來京以新柱署湖廣總督

由福州將軍署

○召安甯來京命尹繼善兼理江蘇巡撫事○庚午諭軍機大臣等安甯解任來京候旨蘇州巡撫印務著尹繼善兼理安甯此番係獲罪來京非尋常陞見可比伊於孝賢皇后大事僅飾浮文全無哀敬實意伊係親近舊僕豈有如此漠不關心之理且聞有罔顧官箴置辦本處女子爲妾之事負朕深恩殊非意料所及因

伊隨侍有年故未明降諭旨伊一切任內所辦事務有無未清及關稅有無染指來京時任所貲財作何布置安頓並伊一路情狀若何著交總督尹繼善一一詳悉確查據實具奏若稍爲瞻顧絲毫徇隱將來別經發覺惟尹繼善是問○辛未訥親奏臣前議築礮乃不得已而爲之目下雖無大效每因礮礮賊來侵擾得有斬獲亦不致有誤攻剿至王柔於六月初四日到營始云覓漢奸前往間諜難保必擒賊酋久之終稱不得其人又欲祈請終南山道士用五雷法擊礮更爲荒誕腊嶺一路雖未能深入亦可將卡撒一帶橫截在外見偵探山箐可截之路令兵前進以攻不備報聞又會同張廣泗奏賊地雖當伏熱並無酷暑緣高處寒低處暖陰雪寒晴霽暖故自山腰以下稍低之區秋冬尙和雪不多積仍可進攻况距賊巢不遠一經移營險要必爲賊據且恐士心渙散各

土兵以爲不能撲滅反與結好所以未敢撤退至天時地利皆賊所長惟人數無多是其所短見存不過三千餘人日向莎羅奔額懇投誠逆首陽爲懇請未便允降亦無瑕釁可乘惟散其固結之心並相機攻擊但能日斃數賊不使稍休目下已日食不繼將來必益無以爲生可以坐待其斃臣張廣泗度今冬明春不難掃穴臣訥親以爲我兵果能爭奪數處賊必內潰然賊巢食用果否匱乏究難臆揣而我兵攻勦一無可乘之機至冬寒春冷恐益不揚冬閒似應減撤久役兵丁另留駐官兵時用礮擊碉卡俟明歲加調精銳三萬於四月進勦足以成功最遲亦不逾秋令至糧運緊要寒沍背負維艱臣飭各路務於今秋大雪未降前將明歲三四月之糧運貯附近軍營且見在商人領運已有一萬五千石將來愈多可減夫役訥親又奏來歲加兵計需費數百萬若酌留兵萬

餘名據守要害相機用礮擊礮令接壤土司各爲防禦狡寇亦能
坐困第久駐終非長策若俟二三年後再調兵乘困進搗自必一
舉成功此二三年內或有機可乘亦未可定臣爲民力國用起見
故計慮及此若以迅奏膚功而論仍不如明年接辦之速謹將所
見併陳得旨此見非矣豈有軍機重務身爲經略而持此兩議令
朕遙度之理如能保明年破賊添兵費餉朕所不惜如以爲終不
能成功不如明云臣力已竭早圖歸計以全終始又奏臣查閱各
路稟報多頓兵不進商之督臣欲併兵合力督臣以爲地勢番情
必當如此分布其實兵雖四萬有奇分路太多勢微力弱督臣未
免存迴護之見至其好惡不公人心不服如參劾貴州副將高宗
瑾將圍困賊礮之卡被賊奪去不能救援臣會商督臣參處督臣
僅請交部察議經臣改擬革職督臣原稟轉歸罪於甫經任事之

參將劉策名亦經臣更正其偏徇懦將輕重失倫如此又臣會同傅爾丹將應援退怯之貴州千把等鎮擊乃該千把等逃至腊嶺軍營高宗瑾知而不報督臣亦佯爲不知其袒庇劣員如此又諸將備惟任舉實屬奮勇力戰陣亡督臣猶以爲疏於布置輕冒鋒刃今督臣布置月餘已極周備仍不能督兵攻克是忠於王事者轉加以不美之名而干犯軍紀者偏欲爲之脫卸此又徇徇不公所以不得人心者也至賊酋本非勁敵路險亦非難至所以不能速滅者蓋圖終必先謀始紀山於始事時並未將糧運豫立成算倉卒出師恩忙轉餉以致多用帑項張廣泗未能嚴督攻勦曠日持久賊得乘閒密備故今歲加調官兵卽從前已到之地不能復至且因分路太多應進之路每苦兵力不足是則失於籌算昧於地形頓兵老師誠難辭咎臣奉命經略理應參奏但若此則臣與

督臣勢難共事卽撫臣經理糧運吏民相安亦難更易生手惟有和衷共濟早靖蠻氛得旨覽所奏軍營見在情形幾於智勇俱困金川小醜不料負固難於勦滅遂至如此官兵攻撲進不能前退不能守卽小小獲勝尙未傷彼皮毛何況披卻導竅得其要領以成破竹之勢奏內所稱賊番來歲日食不繼可以坐待其斃我兵果能奮力攻奪數處賊必內潰又稱賊巢食用果否至於匱乏究難臆度等語旣稱可以坐斃又稱究難臆度始終迄無定見而所稱來歲增兵三萬是否能奏膚功之處亦非確有所見必不可已之成謀夫兩軍相持敵人無坐而受縛之理縱復窮幽絕險亦無兵力必不能施之地旣已用兵豈容撤退古人有裹羶絀險衣草自蔽以成大功者獨非於此等處施之乎今乃欲待其自斃自斃果有期可待乎如果斷有不能勦滅之勢何妨明言其所以不能

之故直請班師今又未能確指其必不可勝而欲以三萬眾嘗試之爲此無可奈何之說卿等身在戎行目擊情狀尙不能確有成算游移兩可朕於數千里外何從批示何從傳諭且大兵有四萬之眾彼止三千餘人何以應我則覺有餘而攻彼惟慮不足日久懸望軍營消息而奏到乃復如是殊非所料卿等可將見在情形或添兵必可成功或用兵勢有不可詳悉審度歸於一是迅速奏聞勿爲兩歧之說要知闕外之事惟卿等專責朕固不能遙制也至逆酋佯請投誠固不可信或因此離其黨羽攻其腹心亦可從中得閒與否或謂終不能埽穴犁庭卽因此將就了事亦可但數年之後彼侵犯邊境則將何以結局必有追悔不及之事將此亦一併籌酌速行奏聞諭軍機大臣等朕覽大學士訥親所奏見在進剿情形金川軍務未能剋期告竣從前命訥親前往經略原以

金川一隅小醜大兵雲集不難犁庭掃穴速奏膚功並籌善後事宜
畿內可以回京今觀前後奏摺知一時難於克捷大學士心膂
重臣諸務資其贊襄豈可久留邊徼卽如所云須俟至一二年後
卽使成功亦無在彼坐待一二年之理應卽還朝辦事其經略印
務令訥親酌量或交張廣泗或交岳鍾琪或交傅爾丹暫令署理
聽其俟來春另調大兵再圖進取可卽速奏聞候朕降旨其傅爾
丹岳鍾琪俱會統領大兵乃老成宿將是以簡用於廢棄之中冀
其於軍務有濟自到彼至今未聞發一謀出一策親在行閒一若
置身局外卽內大臣班第烏爾登法酬並帶往之侍衛等亦皆未
見出力之處不知伊等在彼所辦何事見駐何地殊非遣往之意
可逐一傳諭詢問至所奏張廣泗在彼辦理諸事情形至爲確當
朕亦聞其如此但金川軍務究當賴伊籌辦今亦不必論矣○壬

申 上駐蹕盤山○癸酉諭前因各省官員有違制私自剃頭者不治以罪國法所繫又慮無知犯法者多朕心有所不忍故曾諭各省督撫不必查參惟諭滿洲督撫於所屬人員內有已經查辦者止令具名奏聞若官員中復有如金文醇之流者雖不治以重罪亦欲悉其姓名遲其升遷以示薄懲此朕本意也初不意督撫大員中卽有如周學健之流者今又據塞楞額奏稱伊於二十七日後卽已剃頭巡撫彭樹葵楊錫紱以及兩省文武官員亦俱剃頭更屬意外可駭之事塞楞額滿洲大臣歷任督撫有年乃如此喪心病狂實非意想所及近因周學健以督撫大臣不遵國制已降旨拏解來京重治其罪今觀塞楞額亦復如此實乃全不知君臣大義試問伊於父母大事服制之禮若何若以塞楞額所爲爲是則各省督撫令屬員皆俟百日者反非乎漢人猶尙諱曰不知

滿洲世臣而亦不知此乎况君臣上下之所以相維繫者以有名分若於名分所在慢易而不知敬畏藐視而膜不相關則紀綱陵替人心澆漓將不可問所關至爲重大前諭所降甚明不可不亟爲整頓也塞楞額著交刑部治罪彭樹葵楊錫紱之剃頭雖因順從總督然旣膺封疆重任豈有漫無主見一味隨從附和之理但塞楞額尙已剃頭何怪乎彭樹葵楊錫紱著將彭樹葵楊錫紱俱革職從寬留任交那蘇圖於直隸城工派出二處令伊等承修贖罪以示薄懲至兩省文武官員皆視督撫所爲何罪之有剃頭之案前有錦州府知府金文醇因滿員勸諭不從其罪較重已問斬決特從寬緩決豈知督撫大員中又有周學健則更無怪於金文醇豈知滿洲大臣中乃有塞楞額則又無怪乎周學健矣朕辦理諸事如鑑之空而權衡審度如衡之平若將金文醇周學健塞

楞額三人罪案比而同之何以服人心而明大義若將周學健與彭樹葵楊錫紱比而同之則周學健乃出自己意亦非伊二人隨總督之爲者可比周學健著從寬革職免其拏交刑部發往直隸修理城工效力贖罪金文醇不聽滿員勸阻非冒昧無心但官職稍卑尙可末減金文醇亦著加恩釋放發往直隸修城工贖伊重罪○諭軍機大臣等塞楞額於孝賢皇后大事二十七日後違制剃頭已據自行陳奏可卽寄諭新柱令其接到諭旨卽刻兼程速赴湖廣總督署內傳諭塞楞額此等違制之事在漢人猶可云冒昧無知伊係滿洲大臣喪心病狂一至於此實出意料之外其平日居官不妄之處朕已洞悉前經降旨令其來京矣今伊身獲重罪法無可逭卽因其自行檢舉或稍爲寬貸亦僅可稍遲數日之死其所有家產豈得尙思安享著傳諭伊止隨身攜帶家人二

名星夜來京候旨新柱卽將伊任所家貲詳細查明封固奏聞不得稍有遺漏並查伊自具摺以後自知不免罪戾或有藏匿寄頓及起程赴京沿途一切舉動情形詳悉查明具奏○調準泰爲山東巡撫阿里袞爲山西巡撫○調鄂昌爲江蘇巡撫以舒輅爲廣西巡撫李渭爲安徽布政使定長爲山東按察使

由江南淮徐道遷

○甲

戌 上回鑒○丁丑諭原任重慶總兵馬良柱雖係獲罪之人朕

看其人材與庸懦無能者有閒在綠旗將弁中猶爲強幹之員伊獲罪情節尙可原有且在川年久於番地情形頗爲熟習著仍發往大金川軍營交經略大學士訥親總督張廣泗酌量以副參等官委用俾伊效力贖罪○訥親奏查馬良柱移營缺糧一案爲雪阻滯屬實至令旗兵演習登城舊藝數百名不敷攻撲若數千則費多查賊礮層密數月不能攻下一礮而賊又已另築實難奏效

擬於卡撒一路將可以圍攻處用兵困守奪其糧水可通之路可賊番稀少悉眾據守則必內虛可以襲取或從林箐抄出使賊首尾不能相顧其圍困之處漢兵尙可驅策至偵探路徑必選長於步履熟習鳥槍之侍衛官兵數百名率領方能前進但冬春積雪難行僕須來歲夏季接辦則明春遣發來營似屬有益至馬良柱供稱圍賊一年賊可立斃查賊境有可圍困者有須攻取者有須抄前截後聲東擊西者若謂全境合圍則去歲至今不但不能遏其水道兵所未到且不能禁其耕穫何由使之立斃又稱其人能占卦弄風雨遣雷擊人查軍中多雨或詭術所致至兵被雷擊偶然之事非其伎倆得旨覽奏俱悉諭軍機大臣等大學士訥親赴川經略原因張廣泗調兵三萬餘人軍聲已壯且布置經年想有成算經略一到卽刻迅奏膚功屈指往還不過年餘卽辦善後事

宜以爲經久甯謐之計以振國威以肅軍紀此朕遣經略前往本
意也今覽前後奏摺約計彼地情形非一年半載所能竣事大學
士機務殷繁豈能在外久駐前此傳諭之旨甚明卽以身體而論
伊素日體虛氣弱居此水土惡薄冰雪嚴寒之地儻調衛失宜則
朕之繫繫更深而體制之所關亦重朕早定此意所以未卽降旨
者緣見今尙在交鋒儻有閒可乘應機克捷得一好音以收全局
斯爲盡善當待至九十月閒降旨訥親於歲暮或明春到京其經
略印務或仍於傅爾丹張廣泗岳鍾琪三人內酌量一人護理明
春領兵前進或令岳鍾琪領兵萬人駐紮美諾隨機進剿侵削其
境地戕殺其壯丁可傳諭岳鍾琪予以二三年之期伊能保其擒
賊與否事或可行是亦一策抑或大學士暫行來京於來歲春夏
用兵時再行前往則又徒多一往還朕再四思維訥親必不可久

駐川省况既經身歷則彼處情勢舉在目前卽來京亦可籌辦而留駐川省亦不能別覓奇謀使軍務速竣但特遣重臣聲威嚴重今軍務未竣內召實爲無名然權其輕重則軀體之疏虞爲重而體制之關繫少輕但此時且無稍露端倪恐致軍心益懈至摺內所奏挑選長於步履熟習烏槍之侍衛官員兵丁數百名令其分隊領兵等語朕見在特派大臣挑選精壯滿兵三百名演習雲梯卽令伊等兼習烏槍俟其熟練臨期再挑選侍衛等於明春帶領前往以備率領官兵進攻之用萬一此時已經就緒則不但伊等不必前往諸事俱可告竣此朕希望之念而未卜能合與否也再傳爾丹及班第烏爾登等見在軍前何以請安而外並未見伊等督戰出力之處卽成都派往之滿兵一百名亦未見其作何赴戰以理揆之或由任舉之變恐其冒險直前有意外疏失不令伊等

對敵亦未可定夫兵以克敵爲勇若護惜而不令其摧鋒陷陣則
命伊等前往之意謂何我滿洲舊習不應有此傅爾丹曾經百戰
何未受傷此亦有命耳如果能奮勇爭先正伊等見長之地不可
瞻顧不前此並非伊等退縮亦訥親慮及此而不令前進也可將
此旨傳諭伊等又革布什咱等與彼世仇或許以重賞令其設計
擒獻前此曾諭莎羅奔必須生擒獻俘今看勢又不能或用反閒
勦殺逆酋以完此局亦且暫得休息但斬獲務須確有憑據儻稍
留疑貽貽後來之患豈不又成班滾前轍其前所詢本年不能完
結將來作何籌辦之處前摺語涉兩歧故批令伊等再定所以如
此者亦不過苟延時日冀得捷音耳今所望旣虛朕看伊等以及
軍士皆不無畏難之念則今歲斷不能成功矣其應添兵再舉或
應緩期待釁此時或另經籌有長策可畫一定議速行具奏其馬

良柱已經降旨令其卽赴軍前以副參等員酌量委用效力贖罪
一併傳諭大學士知之○己卯諭據尹繼善奏周學健剃頭之案
因前經奉有諭旨各省督撫未發覺者不必查參是以未行參奏
等語朕之傳諭不必查參者原指所屬微員而言恐其無知犯法
不忍罪及多人耳豈所論於歷任督撫之周學健耶尹繼善接到
諭旨時卽應查奏乃並不奏聞及傳諭滿洲督撫有已經查明遵
旨未辦者令其具名密奏但欲知其姓名並非欲治其重罪所降
諭旨甚明尹繼善接到後又不速行遵旨密奏直至安甯奏到十
有餘日始行具奏明係已知安甯舉發在先無可掩飾乃爲此奏
並非出自己意且聞舒輅曾勸其應行參奏而伊運回觀望直至
於今謂非有心瞻徇同年世誼其誰信之但已降旨交部察議茲
不重科周學健已於塞楞額剃頭之案降旨免其交部治罪所屬

河員皆視周學健所爲更不必置問卽如湖廣兩省屬員亦因視
塞榜額而行是以悉行寬免今尹繼善又稱河工佐雜等人員內
漢軍旗人亦有違制者情屬可惡臣逐名詳查另行參奏交部從
重治罪等語此又與前旨不符豈有總河之罪不治而罪河員之
理此所請又屬過於迎合按求試思朕豈易受人迎合者著仍遵
前旨不必查參朕處分此事一秉虛公周學健並不因尹繼善欲
加之寬而寬河員之罪亦不因尹繼善欲加之嚴而嚴因物付物
初不存絲毫成見著將此曉諭中外尹繼善摺並發○庚辰 上
回宮○命貴州巡撫節制通省兵馬○四川巡撫紀山奏瀘州士
民捐輸軍米五千石命抵明年應徵額賦○是月訥親張廣泗奏
查腊嶺山梁石城一座爲賊境總隘賊併力據守腊嶺之下卡撒
之右共山梁四道頭道已爲我據惟雙碕未克雙碕旁有木卡碕

房二座亦經奪據日用大礮攻擊雙礮但雙礮旁有三層礮房一座下又有小礮石卡雖圍不能嚴密擬先發兵奪其三層礮小石卡則雙礮不難攻取俟雙礮一克將脂嶺官兵一面留攻石城一面酌分與卡撒右梁官兵合攻二道山梁地名喇底奪據後卽由三道山梁直搗色兒力賊卡路更近捷復查軍前各省官兵傷病者多陸續道回內地調養征兵缺額過多就近續調川兵二千補額已報到數百名又甲索乃當二路兵日久未能寸進已將副將劉順高雄檄調歸併卡撒止留王世泰帶川兵千餘士兵數百名勢覺孤懸見岳鍾琪屢以兵單爲詞因將王世泰所領官兵就近歸併黨壩約計調撤劉順高雄之兵共二千餘名與川省未到補額兵千餘名本月半間可抵卡撒軍營卽當遣往卡撒左山梁地名普瞻有賊礮數座一面督兵攻擊一面分兵直從左山梁壓下

與右山梁官兵合圍則色底左右各礮皆在圍內諒賊亦難踞守得旨此次所奏撤無用之兵併力攻勦實合機宜雖目下尙無大捷而調度有方用是少慰

八月甲申諭紀山著革職發往軍營聽經略大學士訥親委用令其自備貲糧效力贖罪其四川巡撫印務著班第暫行署理○戊子訥親奏黨壩一路據岳鍾琪咨報於閏七月初十日夜派兵由兩旁抄奪火燒山梁之後擊死賊番十餘人賊拒守甚堅見我師環攻頗爲惶懼伊等百姓咸願歸正求生而家口爲賊酋拘繫恐見誅戮懇將土司頭人一併招安臣等諭以百姓脅從投誠可准莎羅奔罪大惡極必須親來乞命方可代請隨有右山梁喇底寨番民二戶挈眷來投並擒番婦二口來獻又有左山梁格拉布東寨番民五戶挈眷來投並遺火焚礮俱經厚賞安插據供該處並

無貯食不過兩三月後多要餓死民情急欲投誠至川省補額兵丁及甲索撤赴卡撤之兵數日內可到當令前赴左山梁攻擊合圍色底各寨得旨覽奏兵威似稍振而賊氛似稍挫矣機不可失勉力成功可也訥親又奏賊除拒守外無力侵犯頗懼我兵深入今調遣至卡撤之兵月內全到儻能痛懲一次或可秋間成功近日兵丁經臣選擇驍勇量加鼓勵稍改怠忽舊習至攻取賊巢多在黑夜臣於昏暗中望見官兵放槍之火光惟令護軍統領烏爾登等督戰不敢自輕妄動報聞○庚寅岳鍾琪奏黨壩爲逆酋門戶凡路徑可通賊皆嚴備查黨壩東西橫亘一嶺蜿蜒三十餘里其間漢土官兵營盤二十五座放卡一百五處中有木耳金岡左有陟物黨嚙右有康八達由黨壩分脈並列三嶺迤邐而南皆屬賊番戰碉要卡卽今進攻之處嶺北卽雜谷土司蒼旺所屬凡我

運道皆賊番出沒之所在在需兵營兵名爲萬餘除守營防卡傷
病及分防糧臺塘站實止七千有餘其雜谷土兵原係挨門撥派
中多老弱且隨征年餘疲乏難用唐古特土兵但長馳射不宜涉
險滿兵實不滿一千臣雖攻奪水泉營卡插入賊地總慮兵單咨
請督臣增兵三千督臣覆稱分派已定無兵可撥土兵怯懦在在
皆然臣又以腊嶺卡撒進攻中阻刮耳崖卽使果克刮耳崖尙距
勒烏圍賊巢百餘里其閒道路險阻必致耽延時日不若將四路
所撤之兵以正地之兵分歸腊嶺卡撒甲索之兵歸併黨霸首尾
夾攻且黨霸至勒烏圍不過五六十里止須康八達一破便可直
搗巢穴咨商督臣督臣又云不便更易竊思始而增兵撥遣已定
十路以黨霸美卧甲索乃當正地五路攻勒烏圍賊巢以卡撒腊
嶺納喇溝納貝山馬奈五路攻刮耳崖今則止留臣所領黨霸一

路單攻勒烏圍其續調川兵二千亦歸卡撒不知督臣是何意見不肯分兵給黨壩反將各路兵調歸卡撒腊嶺以攻刮耳崖縱使破刮耳崖而莎羅奔遠逃咎將誰諉况督臣既知土兵怯懦理應奏聞增調漢兵裁減土兵以收實效而緘默不言臣所未解也又唐古特土兵千五百名實爲無益莫若遣回所遺糧餉在軍前附近各處另募新兵不無裨益得旨此奏若令張廣泗知之汝等同辦事之人必有掣肘之虞有密旨令訥親速奪至張廣泗向在苗疆甚有經濟此番不知何故每致差謬訥親亦以爲言汝所奏頗合也又奏征勦逆酋年餘未克雖地險礪堅亦由派調漢土官兵未能慎選於始以致遲誤查各路新舊土兵二萬惟革布什咱沃日兩處實與金川有仇惜其兵少雜谷土兵雖多因該土司待下刻薄人不用命瓦寺木坪巴旺裏塘等處土兵俱屬怯懦綽斯甲

土兵不惟無用且須防範至小金川土兵尙屬勇往督臣乃令土司澤旺之弟良爾吉領兵良爾吉從前勾結莎羅奔襲取小金川生擒其兄澤旺澤旺之妻阿扣乃莎羅奔之姪女素通良爾吉莎羅奔卽以阿扣配良爾吉爲夫婦並將小金川土司印信交良爾吉掌管土民甚爲不服去歲馬良柱應援沃日良爾吉輒敢率領小金川之眾助賊燒毀沃日各寨迎敵官兵及官兵敗賊金酋遁回良爾吉始降督臣至小金川將土司印信仍歸澤旺管理其時應將良爾吉阿扣並助惡之頭人暨漢奸王秋卽行正法以絕內患計不出此轉令良爾吉領兵兵俱懷疑不惟不肯出力且恐良爾吉暗通金酋更生他變臣已密呈經略商之督臣矣查土兵共萬一千四百餘名多屬無用莫若減撤一萬於湖廣調撥官兵抑臣更有請者兵之道有正有奇今刮耳崖雖係逆酋要地但地險

礪多攻取不易非若勒烏圍賊巢路徑甚多如卡裏山固噶溝二處路不甚險可出奇兵直搗勒烏圍勒烏圍一破四路自潰臣咨商督臣未允懇敕交訥親籌畫奏入諭軍機大臣等據提督岳鍾琪具奏征勦大金川漢土官兵情形及恭報軍營情形二摺朕細加披閱伊所指陳諸事尙屬近理雖岳鍾琪以廢棄之員經朕加恩擢用領兵日久未有成績慮恐難於掩飾或藉稱兵少不敷調遣以爲文過之計亦未可定但伊久歷行陣所見未必悉屬虛謬卽所奏張廣泗種種行徑亦頗與大學士訥親之言相合著將此二摺並硃批鈔寄訥親令其密看其所請添調楚兵一節酌度情形如實屬應行卽宜速行籌畫一面辦理一面奏請其餘事由據奏俱已咨呈訥親張廣泗將來查辦時卽可照咨酌定不必洩漏岳鍾琪此奏伊以提督領兵與總督共事若因此致有嫌疑反多

未使用兵之事頗關重大不可不慎也○癸巳諭軍機大臣等會同刑部查審宋宗璋一案從前辦理瞻對事宜捏飾欺罔人所共知前此李質粹到案供明卽應將案內人犯按律議罪朕意欲俟大金川凱旋後拏住班滾明正典刑重治諸人欺罔之罪今據宋宗璋與李質粹質對其所報班滾焚燒之處原係聽信浮言拆毀戰礮亦但據稟轉報並未親見及訪聞班滾藏匿山洞既不告知總督協力追擒並不據實摺奏宋宗璋自有應得之罪但當日慶復身在軍前與伊等上下通同苟且了局其將班滾之子沙加七立捏名德昌喇嘛將班滾大礮冒稱經堂給與居住則係慶復所辦慶復身受厚恩而種種措置失宜蒙混草率以致逆蠻無所畏憚未幾卽有大金川之變相繼而起釀成後患貽害邊疆罪無可逭前經降旨令其家居待罪今懸案日久伊轉得優游閒處於心

何安著將慶復擊交刑部監候俟金川軍務告竣再將瞻對案內
在事人員通行覈實分別定擬○軍機大臣刑部奏革職總兵許
應虎守備不設失陷城寨不依調遣臨陣先退應照失誤軍機律
擬斬監候從之○庚子訥親張廣泗奏肅壩一路於七月二十三
日進攻康八達燒耳礮一座平房八間槍斃賊番百餘人卡撤一
路因右梁雙礮屢攻未克改攻喇底二道山梁於閏七月二十七
日夜分左右二路發兵詎料右梁與二道山梁相隔深溝峭壁其
左路稍低已奪據礮卡數處右路不能往上以斷外援統領之副
將遊擊等但至溝口而止忽聞賊番數十人從山梁呐喊壓下應
援三千餘眾擁擠奔回多有傷損張廣泗親往督戰始將雙礮下
賊卡及周圍旁礮於二十九日全克當令將雙礮環攻詎左旁官
兵所安堆卡不嚴賊於三十夜潛遁得旨行兵最重紀律若寬嚴

不當則無以一眾心而鼓士氣據今奏進攻喇底二道山梁統領之副將遊擊等員但督至溝口而止帶兵之備弁又復落後忽聞賊番數十人吶喊應援三千餘眾遂俱奔遁等語凡爲將弁理當身先士卒乃畏縮不前轉致落後無怪士卒之不能摧鋒陷陣卽從後督戰亦無見險而止身駐溝口但令士卒前進之理又無怪其令之不從矣卽不能一以當十亦何至以三千之眾不能敵賊番數十人而至聞聲遠遁自相蹂躪此事實出情理之外聞之殊爲駭聽朕前旨謂辦理不宜過嚴者原指尋常督師攻剿而言若勝敗在呼吸之間而將弁不能用命卽重懲以徇亦何足惜今奏稱統俟事後覈其功罪是又過於姑息矣至雙礪下石卡圍困之賊又以堆卡不密致令脫逃種種疏懈不知紀律何在論用兵之道卽經略訥親總督張廣泗身臨行陣亦當親督將弁但以國體

所關不可冒險乘危以持重爲得體若將弁人懷畏怯大功何由而成軍前大兵見有四萬據奏其中土兵怯懦者多卽當簡退其疲羸而另補精壯何得但取充數至黨壩一路有焚礮殲賊之報在諸路差爲振作而岳鍾琪前奏兵勢單弱請調楚兵朕已降旨令訥親酌量看此情形更不容緩經略膺調遣大權似此應汰者既不卽汰應調者又不速調而於數千里外爲此泛泛之空談此事將作何完局况前後摺奏皆稱賊番數千人乃我兵所到路路皆能抵禦何我兵以四萬之眾尙聯絡不嚴致有疏漏而二三千人反能廣爲分布觀此則數千人之語似非確實卿等在彼日久豈彼中情事竟不能得其虛實耶川兵行山是其所長而一臨矢石輒復敗遁所長何在前次摺到雖未有捷音而措置得宜尙爲愜意深冀乘機奮勇可奏膚功今覽奏又失所望將來此事兵力

何所倚仗運籌作何調度日復一日師愈老而氣愈怯豈能久頓
堅碣之下坐待成功卿等尙宜熟思應作何籌辦如果無法可施
萬難竣事亦當據實奏聞毋得含糊兩可以增朕西顧之憂○諭
軍機大臣等朕前命大學士訥親赴川經略蓋因新舊調兵已至
數萬張廣泗料理日久必有成謀且命滿大臣及侍衛等前往相
助經略至彼不過資眾力以督率即可迅奏膚功孰知大兵雲集
竟爲賊碣所阻遷延數月迄無成效度其事體要非一年半載所
能埽穴犁庭者矣而大學士以親近重臣亦無久駐於外之理是
以前次卽將此旨傳諭訥親令其於歲暮或明春回京所以遲遲
者誠慮經略之名頗重虛此往返恐於顏面有關故待以時日或
於此際有捷音之至此亦無聊之思耳今觀訥親等奏報軍營情
形仍難摧鋒前進且籌其局勢尤非年內所克竣事況有訥親在

彼張廣泗轉得有所推卸置身事外自不若仍如前諭召還訥親
然日內所以不卽降旨者意欲稍遲時日或得一聞捷音卽訥親
還京亦可藉以報命庶爲得體乃軍營情事至今猶昔訥親卽久
駐師中亦無旦夕可奏之績且伊身體平素虛弱當此水土惡薄
風霜嚴寒之際調衛一有失宜關繫國體不小待至九月若再無
捷音朕卽當明降諭旨召伊回閣辦事矣其經略印務俟遵旨覆
奏到日另行酌定著傳諭知之○辛丑 上啓鑾謁 泰陵停蹕
盧溝橋閱演礮○甲辰諭安甯原係侍衛在內廷行走隨侍有年
因其頗能向上猶可造就用爲江蘇布政使上年江蘇巡撫缺出
一時不得其人是以前令伊署理詎伊莅任以來器小易盈辦理一
切事務俱未妥協深負朕擢用之恩已降旨令其來京伊從前旣
係侍衛著仍在侍衛上行走○乙巳 上謁 泰陵回鑾○丙午

免直隸慶雲等二縣九年逋賦○丁未諭班第見署四川巡撫進
勦大金川軍營糧運事務緊要著兆惠卽速馳驛前往辦理班第
所帶欽差大臣關防著交與兆惠○撥河南倉穀五萬石於陝西
備賑○以觀保署刑部侍郎○訥親張廣泗奏調撤甲索兵二千
餘名並續調補額川兵二千餘名齊集卡撒初九日攻克普瞻左
膀新碉水卡雙碉石卡及尾碉殺賊數十生擒九名用大礮火球
轟焚單碉賊棄碉奔竄其雙碉內賊眾及碉下石卡之賊亦皆潛
遁左梁已經掃清正擬合圍色底並卡撒雙碉賊已畏懼潛遁隨
撥官兵駐守大獲全勝見在籌攻巴朗寨又黨壩一路據岳鍾琪
報擊死賊番刈穫踐踏賊地麥豆圓根得旨汝等一奮勇而卽奪
碉可知坐守一載不早掃清左右山梁皆有受其咎者耳訥親又
奏金酉原非必不可勦滅而不敢謂卽能奏功總緣兵分力單怯

懦頓阻今令臣還京特將軍情賊勢詳陳少贖臣愆至署理經略岳鍾琪頗有布置能明紀律但督提不睦難以署理張廣泗見爲統帥名位尙稱不若令傅爾丹署理可以匡其不逮臣恩隆任重較傅爾丹呼應爲靈且於賊番及我兵情形亦經稔悉懇於命臣進京之旨內將來歲仍令臣經略之處一併頒發至傅爾丹在營凡一切防範及派遣攻取意見所及必與臣及督臣詳酌岳鍾琪惟以添兵爲請別無籌策班第先經督兵攻擊石城後又攻撲木卡五座見亦屢請增兵烏爾登前在馬奈奪賊四卡調赴卡撒右梁連克水碓三層碓雙碓等處薩音圖前在甲索未久調至卡撒攻擊雙碓二座山梁亦與烏爾登同辦以上脂嶺卡撒所得碓卡若非班第烏爾登等籌畫調度則綠旗將弁必不能如此措置若非侍衛拜唐阿等臨陣督戰退縮者擊以刀背敗回者持械攔阻

則兵丁亦不能如此用力進攻得旨覽諭軍機大臣等朕覽此次大學士公訥親所奏近日軍情雖小有取勝未足以言大捷看來訥親辦理經略事務其初至之時根源卽已錯誤大抵先存意見是以措置每有未當陳奏多未允協卽如朕前以侍衛等在軍前未見出力而岳鍾琪傅爾丹班第等不發一謀不建一策降旨詢問傅爾丹等皆係大臣豈不可自行覆奏而必待訥親代爲陳詞批閱之下不知其爲訥親之說乎抑傅爾丹等之言乎朕明知所由大抵從前西北兩路用兵大臣等習氣惟爭進摺奏彼此傾軋轉置軍務爲緩圖其時訥親已辦理軍機親見其事以此爲戒故今不欲眾人紛紛陳說此亦不無所見但不欲眾人之爭是非是也而不使之出力以集思廣益則不可也又如伊前奏滿兵不可任用而此番臨陣督戰使綠旗不敢退縮者滿兵也尙欲用虛糜

糧餉柔懦無能之緣旗此又何說朕前降旨令訥親凡有進止當
因時度勢鄭重籌辦又念伊氣體素弱令隨時調衛此欲其加意
謹慎耳伊未會朕意遂坐守數月竟不知前進迄無成功雖各兵
懦怯成習若訥親於甫蒞軍營之際申明軍紀使之壁壘一新時
則將士方懾其聲威新調之兵氣方果銳乘此驅率雄師直搗巢
穴或可早奏膚功顧惟事稽遲終無良策但諉之以師徒怯懦山
谷巖峻不則以兵少力單爲詞不知坐守愈久兵氣愈加柔靡古
名將不擇兵而用顧方略何如耳卽如此次攻克左梁猶是頽惰
之兵一經訥親親臨督師何以較前獨加奮勇蓋緣奉朕嚴旨後
統兵大臣始加淬厲振作遂已小著功績若早知如此何患大功
不成乎見在諸將未能努力攻克而爭以添兵爲請訥親亦共持
此議據云奪取戰礮卽應分兵據守其數日減夫奪無用之礮而

分有用之卒甚屬無謂既得碉樓自應亟毀一以開通路徑一以永斷賊窟一以減省守兵何計不出此而得一碉守一碉據奏碉如林立則千萬之兵亦不足守碉既退復爲賊有是爲賊守碉也見今兵已四萬又請於來歲添兵三萬或意在撤其罷弱易以精銳猶可若頓欲添兵三萬豈有么麼小醜逞其螳臂而用兵至六七萬之理卽云其地甚險隘口甚多攻剿之處不一從前用十路進兵今止三四路矣如銳意攻取卽一路直前已抵賊窟逆酋沒首則羣醜喪膽逃竄卽訥親奏稱旣克一碉而其他守碉之賊卽棄碉潛逃則知賊眾亦甚怯懦非實在兇悍可知由此觀之卽歸併一路亦無不可如謂賊一夫守險千夫莫當則卽添至數萬而統帥不能指示方略以鼓勵戎行雖多何益今據訥親等奏報左勝山梁已全行攻克則進剿漸有制勝之機若乘此窮幽鑿險所

向克捷正可望其一舉成功朕前欲於九月內降旨令訥親等還朝面議進止但目前大勢如可速勝而令伊等來京恐止留岳鍾琪一人控制斷不能攝服軍情且機勢在呼吸之間儻功欲垂成一時中止又非勝算若冬月勢必不能克捷自應令訥親偕傅爾丹張廣泗一同來京撤罷輓之兵卒擇精銳一二萬人暫令岳鍾琪管領俟明歲調集大兵再爲必克之舉著訥親度於九月二十五前後摺奏至京爲約將此次摺奏之後攻取戰碕若干或仍照舊其勢今冬萬不能成功之處逐一據實陳明速奏候朕再降諭旨令伊等來京至朕屢次傳諭訥親之處覆奏未免拮据今伊又稱接到上諭令看塞楞額盛安治罪之旨緣賊番碕卡正在克獲乘時前進容續摺奏等語觀訥親此奏蓋以朕詢問之事過多逐一登答恐於辦理軍情有誤耳但伊初到軍營幾及兩月朕原無

一旨下問後因功遲不成一無措置且伊所辦之事多未妥協始降旨詢問若果能卽時奏捷又何俟朕之絮語可傳諭訥親令其勿存意見從長商榷務使軍勢大振得制勝之良策以慰朕西顧之憂再軍前漢土官兵已四萬有餘而每處爭戰不過數千其餘皆用之何處而惟知仍請添兵著將見在實數因何不足之處詳悉查明具奏○戊申諭倉場衙門無甚繁務有滿侍郎一人可以兼辦張師載著前往江南隨大學士高斌學習河務○己酉上回宮○庚戌諭朕令大臣自陳者舉可以自代之人凡以拔茅茹顯俊父之意也今吳同仁之屬周學健乃許以兩千之數朕不解焉問之錢陳羣始知爲兩千之賕夫考績黜陟豈可爲苞苴之門豈朕若渴之誠尙未喻於二三大臣耶朕甚惡焉其罷之○辛亥諭江西巡撫開泰於周學健原籍查出伊弟周學伋書札內有請

託自陳薦舉許謝兩千之札朕命大臣喚問周學健乃供有屬員餽送之事及將原札命其細閱始供係丁憂充沂曹道吳同仁所致周學健亦供認確鑿周學健如果潔清自好人何敢以私相干又何敢直以賄賂相許觀此則伊平日操守不可復問並不止吳同仁一案矣向謂周學健爲人其病在性情卞急剛愎自用實不料其不勵名檢竟至於簠簋不飭蓋質緣請託之事世俗容所不免然至明目張膽納以苞苴許以成數則犯法干紀國憲之所不容大臣中豈宜有此由周學健而推之朕固不忍逆料朝列人人皆然亦安能竟保其人人必無是事耶朕臨御以來事事推心置腹以至誠接待臣工而尙有不能感動如周學健其人者則十餘年來爲人所欺當不知凡幾然行險僥倖之徒究必自行敗露又焉能逃朕洞鑒耶卽如吳同仁前因母病不候代而歸爲撫臣所

刻朕以其至情迫切寬免處分在當時沽取孝名似爲得計而今乃由干請敗露其札內有與完顏偉不合之語則是彼之速去乃欲避完顏偉耳若令完顏偉待之稍優伊必又鑽營在任守制矣昔人謂臨下戒於過察又謂甯受百人欺不可使好賢之心稍替夫子又曰不逆詐不億不信抑亦先覺夫萬幾待理而甘受人欺弊將百出是何可嘗試者况乾綱獨斷乃本朝家法自 皇祖

皇考以來一切用人聽言大權從無旁假卽左右親信大臣亦未有能榮辱人能生死人者蓋與其權移於下而作福作威肆行無忌何若操之自上而當寬而寬當嚴而嚴此朕所恪守 前規不敢稍懈者卽如安甯署蘇撫朕心燭其辦事未安特旨罷斥並非因人言所致今開泰辦理周學伋書札一事自其職分當然而外人必有議其過刻者然亦不能因此而設計陷害就令開泰日後

別干譴責亦必係伊罪由自致治以應得豈他人所能傾軋耶朕嘗謂用人聽言其似是而非者未易悉數如陳其凝於乾隆二年卽有二慾宜克三私宜省之奏朕深爲嘉獎宣付史館選入本朝奏議及伊任浙江學政有生員樊顯自刎之案爲其父所告發見在解任質審夫以學政而釀成此曖昧駭聽之事是不能自檢其身而務責難於君可見欺世之流不過撫拾陳言以博美名而不能直指利弊彈奏貪黷於國計民生有何裨補審爾則載籍之格言具在朕甯不能開卷自得而待諸臣勦襲陳奏耶又如雅爾哈善曾有關稅請差旗員之請又有以寬減關稅爲言者寬稅豈非美名不知減稅而商民果實受寬減之利國家何靳此數十萬金之稅課以加惠行旅朕令各關永免米豆之稅此可謂之利在民也又輪免天下錢糧億萬正供尙所不惜而顧惜此區區者乎獨

是應徵之項置而不察則大不可蓋各關積習牢不可破徒飽津吏之谿壑於商民毫無利益其徵稅由地方官管理乃皇考時欽定之善政所當遵守而必以改此爲籌旗人之生計是特爲爲監督者開漁利之門耳或又謂寬監督一分監督亦必寬商民一分不知自好之士無待留餘自無染指若貪夫徇財侵肥於上又必漁取於下若因己有餘地知足自止則當潔清自愛宜莫如安甯而尙有謂其管理關務多不清楚者可見似是而非之論初未深悉物情切中事理不足爲集思廣益之助儻諸臣果能抒竭悃忱敷陳召對據實秉公賢否無淆是非悉當豈非朕所深願朕又何樂而不深加採納乃如周學健陳其疑輩旣決裂而爲衣冠之玷其旅進旅退如歸宣光王會汾陳惠華者流召對諮詢漫無獻替議者必曰旣知其尸祿何不去之而更用賢者不知人材難得

去之將不勝其去而又有議視如弁髦者矣此用人之難也科道
職司糾劾亦未有能先事舉發使班行震悚者尙得謂朕之稀於
召見九卿抑拒諫而不開言路耶今因周學健之事所關於臣節
官箴者甚鉅蓋浮議則搖脣鼓舌律已則言是行違博名則假公
濟私此朕臨蒞久而所閱歷者如是用宣諭中外諸臣俾共知儆
惕思自勵焉

九月壬子朔調鄂昌爲四川巡撫以雅爾哈善署江蘇巡撫○癸
丑諭據蘊著查奏周學健在總河任內贓私狼藉親戚家人營私
不法款蹟多端著將蘊著原摺鈔寄開泰令伊於原籍據實詳悉
嚴查並摺內有名之親戚家人逃回原籍者卽行拏送江南交策
楞會同高斌審擬毋得稍有徇縱又諭前命高斌拏解周學健來
京並查伊任所財物朕素知其平日交好特降旨申諭令據實嚴

查無得瞻顧情面今據蘊著查奏周學健家人先期得信將書札盡行焚毀試思開泰查伊原籍有伊弟所存請託書札豈有任所轉無片楮之理又稱給還眷屬衣飾多至十八擔高斌徇庇之習實乃牢不可破矣周學健在任贓私纍纍已諭策楞前來會同審理如高斌能以公滅私將摺內實情逐一審明尚可稍贖前愆若仍前瞻徇或稍有掣肘策楞之處則得罪更大獨不憶常安前鑒耶前據高斌查奏周學健任所贓財摺內稱查出見銀九千四百兩而蘊著則稱周學健宦貲並銀器首飾鎔化共銀九千四百餘兩亦屬不符再蘊著遵旨密查不敢不據實覆奏著將原摺鈔令高斌閱看勿謂其迎合傾陷也前因高斌係舊臣奉役有年准其來京叩謁 孝賢皇后梓宮今觀其如此情形著不必來京候朕另降諭旨○戊午諭塞楞額已經拏解來京朕思伊以滿洲世臣

敷歷中外任至督撫之重諸事何所不經豈有 祖宗定制所在
君臣大義所關而違制蔑禮甘心犯法一至於此朕再四躊躇在
他人所犯尙有可恕而塞楞額之罪萬無可恕但念伊向係舊臣
官至極品若與尋常一例明正典刑朕心實有所不忍著侍衛五
十七會同刑部尙書阿克敦前往宣諭賜令自盡以全國體至楊
錫紱於奉到查明闔屬諭旨卽以據實檢舉札商塞楞額往返三
次塞楞額尙欲隱諱其事意見終不相同楊錫紱遂自行摺奏楊
錫紱知請罪不爲隱諱之舉可謂尙知大義其革職之處自無可
宥所有原派直隸城工免其承修塞楞額寄楊錫紱書中有彭樹
葵意中亦以爲可不奏聞之語此雖一面之詞而彭樹葵始終顧
慮實懷欺詐其修城之處不准寬免朕於伊三人罪案輕重大小
詳細權衡各稱銖兩不存絲毫成見於其間宣諭中外諸臣知之

○訥親張廣泗奏攻克阿利山梁賊碉並黨壩一路進攻火燒梁
踐平土木卡二處外委馬如麟帶兵進攻河東連日將申札申達
包登一帶地方全行攻克奪獲碉寨六十餘處得旨馬如麟以外
委微員乃能率眾先登摧鋒臨陣數日之間將三處賊境悉行克
獲甚屬可嘉應卽拔擢以勸戎行可傳諭訥親等宣旨將馬如麟
授爲千總並令眾兵共知以示鼓勵○調策楞爲兩江總督尹繼
善爲兩廣總督○予故吏部右侍郎尹會一祭○辛酉諭張廣泗
久任苗疆熟於軍律因大金川用兵特調爲川陝總督令其提師
進剿伊初亦勇往任事奏稱兩月之期卽可殄滅而踰期未能奏
績因循觀望遂致副將張興失事屢挫軍鋒毫無成績乃奏稱兵
力單少請增兵深入誓俾纖芥不留朕允其所請調遣萬人以振
軍威所望迅掃賊氛甯謐邊圉但地方形勢未能遙度今春特命

大學士訥親前往經略計其時日大兵雲集奏凱當已有期訥親抵軍即可籌辦善後事宜此朕命往本意也乃張廣泗既久未成功復因訥親至彼諸事推諉而訥親在軍數月近因朕旨督飭雖小有克捷總未能遠抒勝算是以遲延至今功尙未竣其前後奏到情形非面陳不能洞悉訥親張廣泗俱著馳驛來京面議機宜川陝總督印務著傅爾丹暫行護理所有進討事宜會同岳鍾琪相機調度以副委任○諭軍機大臣等朕因大金川軍營情形有須面詢之處故召還訥親張廣泗其總督印務著傅爾丹護理伊久駐軍前進取機宜皆所熟悉地方事務張廣泗向在軍營查辦自有成規原可循照料其軍中之事今冬雖遇有雨雪或開霽之時可以進取卽當相機籌酌鼓勵將士奮勇直前以期克捷不得徒爲坐守之計其有應行奏聞者卽隨時據實奏聞至陝西地

方事務朕前已有旨令黃廷桂兼理四川事務已傳諭班第留心查辦均可不必分心顧慮惟應專一留意軍務與岳鍾琪和衷共濟副朕委任○壬戌諭朕閱四譯館所存外裔番字諸書雖分類音譯名物朕所識者西番一種已不無譌缺因思象胥韞譯職在周官輶軒問奇載於漢史我朝聲教四訖文軌大同既有成編宜廣爲搜輯加之覈正悉準重考西番書例分門別類彙爲全書所有西天及西洋各書於咸安宮就近查辦其暹羅百夷緬甸八百回回高昌等書著交與該國附近省分之督撫令其採集補正此外如海外諸夷並苗疆等處有各成書體者一併訪錄亦照西番體例將字音與字義用漢文注於本字之下繕寫進呈交館勘校以昭同文盛治著傳恆陳大受納延泰總理其事○癸亥諭朕恭閱實錄仰見皇考在御以闔門明目爲務各省督撫及兩司

皆令密摺陳事道府中奏請者亦派大臣接奏以收兼聽並觀之效又恐洩漏互商之弊丁甯告誡至再至三朕臨御以來道府等官未有陳請具摺奏事朕亦未有特命具摺奏者誠以道府官職尙卑自可不必而兩司爲督撫之佐任重事繁仍准照常具奏上年因言官有言兩司不當以地方應行之事摺拾入奏如實有事屬應行爲督撫所格許敘入摺內奏聞部覆允行自此而兩司奏摺遂漸寒蟬夫督撫果能公正自矢毫無欺隱固不待旁人之糾察若使稍有未協而兩司均得據實入告則督撫亦有所防檢而不敢恣此亦互相覺察之一道也兩司方面大員豈可緘默自容僅以博督撫之歡心耶卽如塞榜額剃頭一事其本意竟欲始終隱諱經楊錫紱屢次札商以爲不可隱諱始行奏聞塞榜額之事有目共覩何所容其掩飾卽不自奏終必敗露然不因楊錫紱之

固執則彼終無具奏之意假使慮及兩司摺奏伊亦知其必不能掩或尙不致終於隱諱也又聞尹繼善夏閒病瘡具摺請醫兼求解任調理後聞有申飭諭旨復於途次追回此雖無甚關於政務民生而居心之不誠奏事之不實卽此可見督撫之操縱由己漫無畏憚亦卽此可見矣兩司奏事之例並未降旨停止應陳奏者卽照常具奏但不得因此將應與督撫商辦之事率意入告致與督撫意見參差遇事齟齬其陳奏之事非批令告知督撫者更不得私自洩漏啓通同徇隱之弊總之 皇考聖訓如日在天朕不敢不勉亦願內外諸臣時時提撕儆省以共襄朕不逮○協辦大學士尙書傅恆等奏查典籍浩繁博綜匪易伏讀 御製盛京賦義蘊旣富字數復多應卽以盛京賦清漢正文繕寫各家篆體並特簡大臣經理其事遴選滿漢儒臣給之筆札敬謹繕錄進呈得

旨我朝國書音韻合乎元聲體製本乎 聖作分合繁簡悉協自

然惟篆體雖舊有之而未詳備寶璽印章尙用本字朕稽古之暇
指授臣工肇爲各體篆文儒臣廣搜載籍援據古法成三十二類

且請以朕製盛京賦繕成清漢篆文既廣國書併傳古篆足以昭
示來許著允所請卽以傅恆汪由敦充總裁官阿克敦蔣溥充副
總裁官慎簡校對人員速竣厥事○甲子命尙書班第赴軍營同

傅爾丹岳鍾琪辦理軍務○命軍營內大臣以下聽傅爾丹節制

○丙寅以陶士儻爲福建按察使

由江蘇蘇松道遷

○丁卯召黃廷桂來

京以瑚寶署甘肅巡撫兼辦總督事○己巳 上幸靜宜園閱兵

○諭國朝寶璽朕依次排定其數二十有五印文向兼清漢內青

玉寶係清字篆文乃 太宗時所貽自是以上四寶均 先代相

承傳爲世守不宜輕易其檀香寶以下二十一寶從新定清文篆

體改鑄○庚午諭軍機大臣等據大學士訥親總督張廣泗奏報
軍前情形披閱之下見其失當之處頗多如馬奈一路於八月二
十四日四更有賊二三十人於雜谷營卡假裝革布什咱之土兵
值漢土官兵俱皆熟睡守備王良弼外委馬如麟漫無稽查以致
賊入營壘殺傷兵丁搶去礮位王良弼亦股帶槍傷所得營卡盡
失夫立營警夜嚴更鼓慎巡防乃軍法所最要今有賊入營而兵
將皆酣眠不覺且以二三十人遂至傷兵失械營卡不守則其平
日毫無紀律視同兒戲可知大金川自用事以來大約失之嚴迫
者少失之懈弛者多總由軍紀不明以致無一人合宜殊非朕本
意所及料也又是日有投順番民五十名參將永柱卽向糧務移
取銀二百兩米五石賞給安插並岳鍾琪所報黨噶及木耳金岡
逃出投順之眾番民每戶賞銀五十兩大銀牌一面布二疋此等

番民從賊日久得之卽應正法今因其投誠待以不死足矣何庸
加以重賞卽云藉此招徠賊黨以孤其勢不知彼中人民頗眾縱
令盡出投誠亦安有如許銀布以浪擲之且大金川番民若果能
縛獻莎羅奔卽優加賞賚亦不爲過乃以泛泛投順之人用賞如
此是以利購也卽盡得其眾僅餘一莎羅奔取而戮之究竟大金
川之地仍不過安插此等番民是始而費我兵力中而以利誘之
終而投順之番仍得居其舊處豈有以數千百萬之帑項爲此無
益之舉耶再軍營進攻年餘所得碉寨原不爲多乃岳鍾琪又稱
每打一碉一寨大者官兵帶傷不下數百名小者不下百數十名
見帶傷官兵每百名中竟有數十且有身帶四五處傷不等者兵
丁臨陣帶傷自係奮勇向前之人旣已受傷又至四五處又應加
以體恤令其調治或遣之回營另調補額然後妥協豈有受傷之

兵悉行留於軍前虛糜糧餉又不另調精壯之兵遷就苟安一無籌辦何怪膚功之不克奏耶凡此種種失當之處皆行軍所宜戒訥親張廣泗將起程來京可傳諭傅爾丹班第岳鍾琪等令其留心以此爲鑒申明紀律詳酌機宜善爲調度以副委任○訥親奏黨壩一路駐兵萬餘土兵居其大半前岳鍾琪所奏土兵無用漢兵不敷之處俱屬實情至稱進攻賊巢之路卡撒不如黨壩臣思黨壩爲進攻勒烏圍要路卡撒爲進攻刮耳崖要路刮耳崖旣破因應進兵勒烏圍勒烏圍旣破亦仍應進攻刮耳崖兩路皆逆酋巢穴未便因地險硯多置而不問岳鍾琪添調楚兵之請無非爲兵力不敷起見但楚省遙遠調兵又多按程須四五月之久已屆寒冬不能進剿況以官兵易土兵需糧尤多更須純用本色以難運之糧供坐守之兵殊爲非計至所請召募新兵減撤土兵之處

已會商督臣咨覆准行又所奏良爾吉應行正法之處查良爾吉之罪原應伏誅但張廣泗旣已寬之於前今投順隨征已及年餘此時忽加誅戮反出無名是以未經辦理奏入諭軍機大臣等覽諸摺所奏辦理不能愜當之處不一而足卽如良爾吉本一奸匪土舍且爲逆酋姻黨王秋亦係漢奸在尋常尙須治罪况爲良爾吉親信黨羽經略至軍營旣知張廣泗墮其術中實與慶復誤信汪結無異當時卽應早爲剪除及該土舍於緊要處所全不用命該督有意徇庇經略亦應申明軍律按法加誅乃因該督攻圍太近情有可原一語遂至失刑至逆酋求降之時該土舍洩漏軍情領兵大臣旣所親聞罪狀昭著如此尙稱暗傳消息無迹可據誅戮反出無名是何語耶王秋託病告歸美諾張廣泗始終迴護經略何以亦聽其遠颺儻至免脫則將來貽害更大此旨一到著將

訥親奏摺與張廣泗看令其明白回奏卽令張廣泗親提良爾吉
王秋二人隨同爾等牢固解至京師明正其罪自入秋以來卽屢
有欲召卿回京之諭卿亦自請來京而摺中尙稱俟今冬不能進
攻之時再往黨壩與該提面商斯言果出中心之誠然耶抑何前
後矛盾若此殊所不解可一併傳諭知之○壬申宗人府參奏簡
親王神保住擅令太監責打伊兄忠保之女得冒神保住自襲爵
以來不知自愛恣意妄爲致兩目成眚因辭王俸朕加恩賞給半
俸贖其度日之資伊竟不知感恩守分且罔顧近派族人稍加周
恤今據宗人府劾奏神保住陵虐伊兄忠保之女其行事更出情
理之外著革去王爵另行請旨承襲○癸酉諭神保住已獲罪革
爵德沛於此王爵既有承襲之分且在等輩中較爲厚重可卽令
承襲王爵德沛襲王之後宜追念從前諸王將族中應行資助之

人加意周恤共相和睦以期仰沐朕恩於無既○以富明爲河南

布政使嚴有禧爲河南按察使

由湖南驛鹽道遷

○甲戌截留江南浙江

漕糧十五萬石於福建備賑○乙亥諭軍機大臣等金川用兵以

來將領參劾者接踵而題補者無人殊失鼓勵戎行之道前曾傳

諭訥親張廣泗等伊等仍未辦理因命軍機大臣等查明情節據

今年五月張廣泗原奏川陝副將以至千總遇有缺出卽於此次

立功人員內題補特傳諭該部議准並令同訥親揀選至八月初

訥親奏到則稱將弁獲過者多立功者少尙未揀選題補等語夫

行軍紀律全在賞罰得當鼓舞人心今將士有罰無賞自必志氣

隳頽何由使之感激奮勉踴躍用命是以前批訥親奏摺有此番

辦理軍務似覺過嚴之諭正謂張廣泗委過於下偏裨動輒得咎

實爲過刻而非軍律嚴明之謂也若以馭軍而論此番正失之於

寬豈有刁斗森嚴如馬奈軍營賊人黃夜潛入將卒酣寢漫無知覺之理又豈有隊伍整齊衝堅犯陣而如訥親所奏麾之不前侍衛等從後用刀背驅迫之理觀此則將弁之怠玩士卒之疲懦直如兒戲何怪其久無成績屢有失事也至謂將弁立功者少無可揀選此語亦謬同一戴罪圖功其中豈無一二鼓勇先登之士就其臨陣奮往即可定爲優等藉以激勵眾心賞一人而得千百人之力其機端在於此不待建立殊勳方可獎拔也訥親等從前辦理未妥即可傳諭計信到日伊尙未起程令其傳諭班第傅爾丹岳鍾琪等當以此爲戒務從公賞拔爲戎行作氣使出力者知所勸勉並不得誤會此番辦理過嚴之旨一意從寬則軍律益致懈弛失之更遠此於軍務大有關係卽傳諭知之○除湖北宣城縣編審不實丁銀○丁丑諭王大臣等大金川用兵一事兩易寒暑

尙無成績賊酋僻處窮山本屬么麼小醜但卽命名觀之莎羅奔者番語爲諸酋之長是其意雖未顯稱名號而夜郎自大抗拒天朝併吞番眾蓄志已非一日前春侵擾霍耳章古毛牛等處切近爐地紀山倉卒發兵逆酋雖歸巢窟伏而未經懲創勢復鴟張因命興師致討該督慶復辦理瞻對一役草率了事所奏班滾燒斃之處朕洞悉其疏謬當爲批示豈可復委以軍務因思張廣泗從前經理苗疆熟於戎旅調爲總統伊又先經奏請從戎初到軍營亦有急公任事之意但以二萬餘人派定十路進攻勢分力薄卽已非計又奏稱冬月可以克捷屆期罔效則易爲次年春夏再爲次年秋冬迨至副將張興陣亡失機難掩則又稱兵力單少朕復允調滇黔陝甘勁卒萬人意謂一舉而膚功可奏惟善後事宜所關更重因命大學士訥親前往經略詎料張廣泗漫無成功又因

訥親至彼輒懷觀望卽先是凡所陳奏亦悉浮游閃爍於張興馬良柱之事動輒發過於下朕已微窺其意及訥親奏至與朕所見相符又稱其徧徇黔省將弁高宗瑾袒庇失律千總信用賊酋姻黨良爾吉漢奸王秋軍中消息賊輒先得一聞訥親奉朕旨有按法當誅良爾吉之言而張廣泗代剖甚力後於腊嶺賊番喊降時在軍營大臣曾聞良爾吉有怨望實情稱不知己之下落何如焉能顧汝而王秋亦復稱病避歸美諾則是張廣泗始終迴護情節顯然且密露軍機於賊黨矣張廣泗從前奏稱慶復誤信土目汪結墮其術中而伊之任用良爾吉王秋如出一轍何以明知而故蹈之耶且伊於二人若止用人之誤猶爲可恕至以軍情相告枉法而曲庇之其居心如此又安望有犁庭掃穴之期耶至訥親素未莅師摧鋒陷陣之事實非所長但張廣泗調集大兵布置經年

當有成算計經略抵營之日正當告捷之時便可籌辦善後事宜並物色班滾致之闕下此朕命往本意在訥親自所優爲初不料訥親至軍營於彼處情形既未諸悉將吏人等方且心懷觀望羣待經略之指揮而伊並無奇謀異算以竦動衆心且身圖安逸並未親臨行陣士氣因以懈弛不思廷臣中平日受恩深重者孰如訥親其應感激圖報者孰如訥親雖朕因伊身素羸弱屢次降旨令伊隨時將息此在朕體恤之道則然然以滿洲大臣當此戎馬倥傯之際孰不同仇共憤翦此朝食而訥親因有此旨輒安坐帳中不親臨行陣朕猶待之數月及見所奏動稱兵士向礪放槍伊自帳中望見火光是從未督軍奮勇矣於理可乎卽謂大臣動關國體恐有意外之虞縱不可親冒矢石獨不可臨陣指揮使士心踊躍乎況意外之虞又未然之事抑何示怯若此耶及經朕嚴加

飭諭始前往督戰果奪礪據險設早能如是其克捷又豈僅此乎
且自古豈有開關延敵坐獲全勝之理可見前此實由伊等頓兵
不進不能勇往出力而非堅礪之必不可克也訥親既曠日持久
了無成績朕不得已欲召之回京又恐於命往顏面攸關屢次傳
諭詢問且寬其期以待捷音誠使得朕此旨而奮不顧身則自閏
七月以至於今尙可有所勦洗以蓋此羞也且獨不思將在外君
命有所不受今命伊前往者何意辦理者何事回京將何以報命
而乃一聞召入之旨如獲更生並不請命留駐以待事竣惟以入
覲得以將實情形陳奏明歲再往軍營爲詞不知軍營有何必
面奏之情形又有何朕尙未悉之事宜僕僕來往有是政體乎大
臣躬膺重寄豈宜若是乎滿洲大臣身當軍旅又豈曾有是乎至
傅爾丹班第等同在軍中自列名請安而外軍中事宜從無一字

奏及因降旨詢問而訥親卽以傅爾丹等覆奏之詞敘入摺內批閱之下不知孰爲傅爾丹之言孰爲訥親之言朕思西北兩路用兵大臣等習氣惟以摺奏相傾軋訥親親見其事以此爲戒故不令傅爾丹等紛紛陳奏復降旨詢問而訥親並未覆奏傅爾丹等至今亦始終默無一語豈訥親竟未向伊等傳諭此旨耶夫不使眾人之鼓舌搖脣可也而同事之人慢不集思廣益不使陳一謀建一議而已又無奇謀異策可以服眾此何心也若恐他人揭其所短制之使不入告此在他人或慮及此在訥親則不必也伊在軍中何事畏人攻訐而必不使人陳奏乎且軍務非比其他能制勝則雖欲暴其短而不能不勝則人人指摘欲掩之亦不得也廷臣中孰有能於朕前斐斐他人者乎自朕臨御至今又孰有受人搖惑者乎此在大臣等皆不可存此心而訥親尤不可存此心

若謂朕歷次飭諭或由軍機大臣中有與訥親不相能者且有覬覦而傾陷之者於朕前有所浸潤則是伊等能排擠訥親安知將來又無人能排擠伊者乎卽訥親自思數年以來會有爲訥親所排擠而朕不能覺察者乎且朕於訥親到軍時亦待至兩月之久見其漫無建立始降旨督飭而前後陳奏自相矛盾之處不可枚舉在訥親平日豈非辦事勤敏爲國家竭力宣猷之大臣卽朕命往之始實欲委以籌善後而非屬之統兵進剿卽不以張廣泗之老師糜餉移其責於訥親而訥親以第一受恩之人誠不料其舛謬若此今若按法以繩人將謂訥親平時宣力如此尙不能免何以示勸若委曲含容人又將謂前此屢復之草率蒙混後此張廣泗之遲延錯謬朕則知之而於訥親則不知何以示懲二者朕必居一於此然朕誠不能辭過朕亦實爲抱慚今觀金川窮寇以國

家全勝之力何患不捷今年不捷不妨待之來年卽班滾亦金底游魂不足介意惟是大臣如訥親其受恩非他人比乃此次奉命經略諸事錯誤一至於此殊出意外實難於措置是以特召莊親王來保史貽直阿克敦舒赫德及軍機大臣等面降此旨著訥親張廣泗明白回奏大金川軍務朕已諭班第傅爾丹岳鍾琪協力辦理經略印信訥親卽行繳還○戊寅命張師載協辦南河總督事○己卯諭大金川用兵一事前因張廣泗布置經年應有成算是以命訥親前往經略籌辦善後事宜不意訥親至彼張廣泗既漫無成功諸事推諉而訥親以羸弱之軀復不能躬歷行陣惟圖安逸經朕督飭究不能大有克捷卽摺奏一事亦前後矛盾於情形並不明晰較之向日在京辦事之勤敏精詳竟似兩人實出朕意料之外若非伊福薄難勝斯任何至於此朕實爲之慚愧自御

極以來第一受恩者無過訥親其次莫如傅恆今訥親既曠日持
久有忝重寄則所爲奮身致力者將惟傅恆是屬傅恆年方壯盛
且係勳舊世臣義同休戚際此戎馬未息之時惟是出入禁闥不
及援枹鼓勇諒亦心所不安况軍旅之事乃國家所不能無滿洲
大臣必歷練有素斯緩急足備任使傅恆著暫管川陝總督印務
卽前往軍營一切機宜悉心調度會同班第傅爾丹岳鍾琪等妥
協辦理務期犁庭掃穴迅奏膚功以副委任○命侍郎舒赫德軍
機處行走○庚辰諭張廣泗受任金川以來措置乖方陳奏閃爍
賞罰不當喜怒任性諉過偏裨致人人解體又復觀望推諉老師
坐困糜餉不貲且信用賊黨良爾吉王秋洩漏機密曲法庇護玩
兵養寇貽誤軍機法所不宥著革職拏交刑部治罪令侍衛富成
押解來京訥親爲大學士付以經略重任前駐軍營漫無勝算且

身圖安適並不親臨督陣鼓勵衆心專以建礪株守爲長策及傳
諭欲召取回京伊並不計軍情緊要非克捷無以報命而以面奏
情形爲詞亟思回京自逸朕以國體攸關寬期以待伊復無敵愾
之志惟是遷延時日以俟歸期至陳奏之事矛盾舛錯不可枚舉
與伊尋常之辦事精詳急公黽勉竟似出於兩人夫大臣誼均休
戚平時之眷待優殊正欲其緩急足恃能勝艱鉅之任爲國分憂
耳若僅以任職勤敏爲能則朕假之事權憑藉威柄苟非庸劣皆
可優爲卽以操守而論伊係勳封世祿且數年以來朕時加賞賚
非他人可比縱賄賂餽遺豈足動其心是苞苴不入亦不得謂之
潔清惟於重大緊要之關鍵方足以見報稱之實心今訥親乃至
於此在伊卽不自顧惜獨不爲朕用人顏面計乎從前年羹堯隆
科多等在 皇考時恣肆妄行事發之時皆卽按法治罪朕臨御

以來以恩禮馭下然卽大學士鄂爾泰張廷玉未嘗不時加戒飭使不敢縱正所以保全大臣至訥親之受朕殊恩廷臣無出其右乃中外所共知者十三年以來所以教訓保全幸免隕越者以其尙能承受朕恩耳今伊福薄災生於此等緊要關鍵處而乖張舛謬一至於此朕反復思之實無以自解論其負恩之罪理應拏交刑部問罪但觀其退縮偷安之意卽就獄亦非所深恥然在朕十餘年加恩眷舊始終不忍令其拘繫囹圄訥親著革職赴北路軍營自備鞍馬效力贖罪著派侍衛鄂實德山齎朕此旨於途次傳諭奉到諭旨之處德山押訥親卽行前往軍營所有前奏尙有面陳情形卽著伊繕摺交與富成齎奏呈覽其經略印信交鄂實馳驛齎赴金川軍營候協辦大學士暫管川陝總督傅恆到日接受卽授爲經略統領一切軍務○諭軍機大臣等大金川一案張廣

泗辦理錯謬糜費帑金且伊在川支動公費銀例應追還歸款及查伊在京家產一無所有伊歷任封疆居官日久不應囊橐空虛近來外任官員頗有似此巧於藏寄之事張廣泗任所必有寄頓隱匿可傳諭班第令其詳悉訪察嚴行查辦勿致稍有遺漏○辛巳命大學士來保軍機處行走

冬十月壬午朔諭朕自御極以來大臣中第一受恩者莫如訥親金川雖云小醜而老師糜餉克捷無期凡在臣子皆有同仇敵愾之念訥親身爲大學士從前在京時不過於軍機奏到隨同辦理從未向朕奏及逆酋猖獗如此將來作何了局欲請身往視師彼時傳恆卽會陳奏願效前驅朕以封疆大吏自能辦理不必特遣大臣卽應派往傳恆亦不可居訥親之先未經俞允及經略需人因以付之訥親朕意以伊平日受朕如許厚恩自知奮勉乃起程

之時全不踴躍彼其意以爲軍前調集大兵指期克捷勝則引以爲己功卽不勝亦可奉身而退至朕用人顏面所關國家軍旅之重皆所不計其隱衷已不可問及至軍營張廣泗方觀望不前而伊復茫無成算措置乖方朕待之兩月之久而所奏到乃請建礮與賊共險不思以士卒攻討之力轉使建礮資寇是其第一謀畫旣已貽笑眾人矣自是始有申飭之旨然猶日夜望其成功而乃身圖安逸並未親履戎行竟敢奏稱軍士夤夜向礮放槍伊在營中望見火光等語經朕督飭始行前進而近所奏阿利山之役我兵屢次退回因伊等在彼未至大奔及伊等回營我兵數千人卽各鳥獸散將領不復相顧觀此情形是眾未奔而伊等輒已先退又何怪士卒之望風潰散以受恩之滿洲大臣經略重務債事至此尙何地可以自容乎至前後摺奏於所奉諭旨緊要情節槩不

切實明白回奏惟以浮詞架空了事竟有全未覆奏者卽同事之軍前大臣等經朕再三傳諭終不令其陳奏一字朕因其久無就緒不得已傳諭詢問示以欲召回京本欲激之使知愧奮或有奏功之日正以召之者促之乃伊一得此旨如獲更生卽置軍務於度外託言有面奏情形亟欲回京試思有何不能言之情形而必待面奏乎此不過思家耳以訥親平日之心思智慮且事朕十有三年若謂任其經略無方輒行退避竟不重治其罪將視朕爲何如主伊非不慮及此而敢遽請回京者眾人能知其故乎伊之意中明知不稱任使朕必重治其罪然治罪亦不過如慶復之革職家居轉得優游自逸爲嗣續計向來賞賚豐厚儘足自娛而金川之役傅恆必自請督師朕亦必以此任相屬而彼地險碁林立攻取維艱卽傅恆亦未必遽能奏績不過與伊相等卽能成功亦傅

恆之福命所有與伊無所加損如其不成朕又必重治傅恆之罪而眷念舊臣伊必且復用是治罪之條乃伊所豫料卽奉到前旨亦無所悔懼惟此旨洞鑒其肺腑伊當俯首無辭始悔其蓄謀之大謬耳此正朕向所謂小聰明是大糊塗也不如此不足成其爲訥親而眾人之不能見及卽其遜於訥親之處是朕從前任用訥親原未爲誤也何言之若今不能燭照其隱微治彼以罪而心猶不服則是終爲所誤耳朕臨御羣臣嘗有能肆其欺蔽而不察者乎至所稱回京面奏情形不知以經略親信之大臣摺奏中何事不可備陳如漢文不能盡者則用滿文滿文不能盡者則用漢文何慮朕之不能詳閱耶前已傳旨令繕摺交與富成齋回著再行傳諭令伊一一據實明白具奏不得因見朕此旨但以認罪負恩奉職無狀浮詞塞責朕向因人才難得欲栽培成就得一二社稷

之臣爲國家任事此朕本意卽用訥親爲經略無非欲滿洲大臣
歷練戎旅緩急足恃朕已屢經宣示豈有軍旅重事敢於嘗試耶
以朕平時之推心任用訥親卽辦事詳慎操守潔清舉不足言使
伊果於此等軍機重務能調度得宜殫忠竭力俾斯役早竣紓朕
西顧之憂卽令納賄行私此亦小過何妨曲成今訥親負國負恩
一至於此實非朕意所及料亦豈國憲所可容若以向日加恩之
故飭法曲有將來何以用人是以降旨將伊革職發往北路軍營
效力贖罪此伊自作之孽而非朕以喜怒爲賞罰卽 皇祖 皇
考在天之靈皆所默鑒今諸王文武大臣合詞奏請將訥親交部
治罪於法本無可追但須俟伊回奏到日再酌奪降旨至傅恆念
切休戚力圖獲醜蓄志有素甚可嘉尙觀其銳往直前破釜沈舟
之志卽可剋期奏凱然軍旅之事原難適度儻傅恆亦仍蹈前轍

縱使粉飾入告自不能掩眾人耳目又何能逃朕洞鑒卽或進攻稍稽時日及實有難於克捷情形眾人自有公論朕亦自有籌酌但過猶不及訥親失於不及而觀傳恆勇往之氣朕竇慮其太過朕非教傳恆以退怯也若傳恆如訥親之怯弱前鑒具在也今尙書達爾黨阿以伊弟訥親獲罪請赴軍營效力著照所請命隨傳恆前往如攻勦之時矢石所及令其持重防護但不得因有此旨於應行親歷之處槩爲勸阻卽傳恆亦必不從而達爾黨阿亦不得錯會朕意若因訥親之故忌其成功有意阻撓朕必將伊以軍法從事且其地卽命往訥親之處從前訥親之畏蒞若何此番傳恆之銳氣若何軍士必能備言達爾黨阿亦可爲明證訥親尙有何後言乎朕本信任訥親畀以經略重務其錯謬自出朕意外若因此而於傳恆有所顧惜不令前往是並不能信及傳恆矣豈朕

推誠待下大公至正之道傳恆惟當服膺朕旨實力實心仔肩重
寄迅奏膚功以副委任著將此旨宣諭諸王滿漢文武大臣知之
○調滿洲京兵雲梯兵及東三省兵共五千名赴大金川軍營聽
用○癸未撥內帑銀十萬兩備協辦大學士傅恆軍前賞賚○直
隸總督那蘇圖奏協辦大學士傅恆參贊綸扉實屬緊要臣年力
未衰鞍馬素習請赴軍營協同班第等辦理軍務得旨忻悅覽之
但此任非傳恆不能勝此功非傅恆不能成故特命伊往朕志已
定不必再言○乙酉諭據直隸總督那蘇圖參奏勵宗萬縱令弟
僕霸占官地未交價銀強收租息將勵宗萬勵宗奕分別問擬徒
流一摺勵宗萬在朝無楊震之節歸鄉有楊惲之行營私壟斷按
律奚辭但據那蘇圖另摺奏請派修固安縣城工罪不重科尙念
曾居卿貳免其城旦勵宗萬宜痛自改悔安靜家居如仍復怙終

不悅定行從重治罪餘著該部覈議具奏○召尹繼善來京以碩
色爲兩廣總督鄂容安署河南巡撫馬靈阿署兵部侍郎○丙戌
諭朕令班第前往四川雖爲辦理糧運用兵非其專責但伊身爲
本兵且係軍機大臣於軍中攻勦事宜及將弁功罪皆伊職掌所
在不得以專辦糧餉遂一切置之膜外乃伊覘軍務未能速竣旣
不懇身任其事惟請另派大臣經理而於訥親張廣泗之乖張退
縮老師糜餉初未據實入告及降旨詢問伊於張廣泗之罪直陳
無隱而一字不及訥親爲大臣者固宜如是乎在伊心自謂辦糧
無誤卽爲克盡己職其他自有任其咎者惟欲脫身事外爲自全
計而無吉凶同患之心此種習氣在朝大臣亦多不免獨未遇有
事耳居心若此國事其何賴焉班第不稱兵部尙書之任但辦理
糧運尙屬妥協著從寬降爲侍郎其兵部尙書員缺著舒赫德補

授見在戶部辦事乏人著暫行兼理○丁亥諭鄂容安已署理河南巡撫阿哥書房一時不得其人盛安獲罪之處本無可赦亦不宜再用但念其一時冒昧所謂愚而可憫者其經經自守猶可在書房效力著於阿哥師傅處贖罪行走○命傅恆爲保和殿大學士兼戶部尙書○戊子奉移 孝賢皇后梓宮於靜安莊 皇太后至觀德殿臨送 上至靜安莊奠酒○庚寅諭大學士傅恆奉命經略金川軍務朕念金川用兵幾及二載尙未成功固由士卒不能鼓勇先登摧鋒陷陣然此非獨士卒之過也訥親張廣泗措置乖方毫無謀略不身親督陣畏縮不前且號令不明賞罰不當將弁因而效尤至臨陣時亦擇可以障礙之地爲自全計惟令士卒冒險受傷士卒獨非身命乎冰雪沍寒瘴癘暑毒之區荷戈援甲晝夜弗息暴露於懸崖峭嶺間每念及此朕心爲之惻然訥親

張廣泗既重治其罪其士卒兩年以來重罹鋒鏑饑寒之苦雖在軍律兵不用命法所不容但士卒實爲主將所誤咎歸主將則伊等罪爲可寬而情爲可憫見在經略大學士傅恆齋往內帑銀兩著將漢土軍士分別賞賚以示投醪實惠鼓勵士心務令踊躍前驅銳師深入迅奏膚功至將弁等既久未成功虛糜廩祿均屬有罪之人非惟賞不當加伊等亦何顏受賞但亦因訥親張廣泗老師欺蔽所波及朕故不罪今經略視師在彼一應滿漢將弁俱著寬其既往以勵將來尙其各知奮勉思蓋前愆使壁壘一新旌旗生色共成偉績佇待策勳布告軍營咸使知悉○以尹繼善爲戶部尙書○辛卯 上幸豐澤園賜經略大學士傅恆並隨征將士宴○諭印機大臣等班溪雖未羣獲而羅於朝革松結皆會親見且此二人皆慶復所信用伊等既有確供即可服慶復之心著將

羅於朝革松結密行擊解來京以憑訊結此案如訥親已經起程
著卽傳諭班第傅爾丹等遵旨辦理無得疏脫並宜詳慎嚴密勿
得稍有洩漏○岳鍾琪奏九月十二日同護軍統領法爾派侍衛
京皎丹察鍾秋等協同副將鐵景祐等領兵攻康八達山梁大敗
賊番是夜參將烏德納等領兵暗擊康八達山下河邊跟雜等處
奪毀大戰礮二座小戰礮三座平房四十間木石各卡十座石洞
二座焚賊糧十二倉十四日又攻取石洞一座計得跟雜一帶地
方南北約四十餘里東西約二十餘里是夜賊番來犯營卡遇伏
傷敗十八日夜守備張漢等領兵由沿河一帶克取葛布基大礮
八間小平房六間木城一座石卡四處斫破大皮船四隻前後殺
賊甚眾查看彼處左倚山險右近大河前有惡爾溪大戰礮六座
周圍俱有石城賊番甚眾又有日旁山賊及康八達山上賊眾救

應我兵攻戰一夜未免疲乏後無接應因暫收兵奏入諭軍機大臣等據軍營奏報黨壩一路官兵九月內斬獲賊番燒克戰礮奪取倉舍等情形較之別路大有起色良由岳鍾琪調度得宜是以有此克獲金川軍務從前因訥親張廣泗乖張遲誤深負朕恩今已重治其罪特命大學士傅恆前往經略大學士矢志篤誠必能使壁壘一新功成迅速不似訥親等之偷安自逸致餒士氣但軍機惟在呼吸之間岳鍾琪見在軍中身膺重寄乘此破竹之勢如有應行奮往取效當前者卽相機董率將士鼓勇先登縱未能犁庭掃穴而多克堅礮擒勦醜類長驅深入亦足以壯先聲而殲賊魄卽經略到後諸事雖屬同功一體尙不若經略未至之先岳鍾琪自行出力奏捷足以見伊感激圖報之實心仰副朕棄瑕錄用之本意豈不更於顏面有光耶其目下進取光景若何著一併具

摺速行奏聞可傳諭知之○調三和爲戶部侍郎以班第爲工部侍郎○壬辰諭督撫丁憂不得遽行送印任內文卷擇司道一人代行聽候諭旨方行離任此定例也今據湖廣總督新柱奏報湖南巡撫楊錫紱丁憂援照前撫趙宏恩之舊案將印信交與布政使護理在楊錫紱之意不過以守制爲重欲博盡孝之虛名耳不思定例既有司道代行一切政事自可無庸分心於盡孝之道兩不相妨而巡撫責任封疆印務關繫重大定例候代殊有深意趙宏恩所行豈可援以爲例卽如吳同仁一聞母病棄官而歸經督撫參劾朕以其尙知子道格外寬免今乃以賄託薦舉敗露好名究何益耶嗣後督撫俱著遵例行有似此者以違制論○調開泰爲湖南巡撫以唐綬祖爲江西巡撫衛哲治爲山東布政使由登萊青道○癸巳命調陝西甘肅雲南貴州湖廣漢兵二萬七千名陝甘

四川滿兵三千名赴大金川軍營聽用○甲午諭朕敬 天尊

祖寅承祀 壇 廟祭器聿既稽考古典親爲釐定命所司準

式敬造質文有章精潔告備自今歲 圖丘大祀爲始灌獻陳列

悉用新成祭器展虔敬焉古者崇郊享則備法駕乘玉輅以稱鉅

典國朝定制有大駕鹵簿行駕儀仗行幸儀仗其名參用宋明以

來之舊而旗章麾蓋視前倍簡今稍爲增益更定大駕鹵簿爲法

駕鹵簿行駕儀仗爲鑾駕鹵簿行幸儀仗爲騎駕鹵簿合三者則

爲大駕鹵簿 南郊用之 方澤以下皆用法駕鹵簿五輅酌倣

周官及唐宋遺制金玉象革各如其儀乘用亦自今歲 南郊始

光昭羽衛用肅明禋諭所司知之○乙未諭訥親先世軍功所得

公爵本列三等後蒙恩晉爲一等公至阿爾松阿承襲時銷去恩

詔所加以二等公世襲罔替朕登極之初訥親以 孝昭仁皇后

戚屬未封向該旗呈請朕因外戚雖同其中不無差等所請原非定制惟是訥親行走勤慎實心供職因晉封爲一等公此朕特恩也慶復所襲之公爵伊係緣孝懿仁皇后恩封身故後該旗請襲皇祖留中未發聖心殆有差等後皇考追念孝懿仁皇后慈撫舊恩推榮於隆科多特令承襲慶復繼之此皇考特恩也訥親之一等公慶復之公爵自不得與訥謨圖伯起公爵比此等加恩襲爵之人果能勤慎出力尚可准其承襲若緣事革退卽應停止今訥親深負朕恩革職治罪所有特加之一等公應行銷去仍以伊先世軍功之二等公著策楞承襲慶復既經獲罪其公爵承襲之處著停止朕辦理此事大公至正深望世祿勲臣勉策勵同休共戚以保祿位著吏兵二部職之方策永爲定制○

戊戌

上幸寶諦寺閱八旗演習雲梯兵○庚子命大金川軍營

奏報著經略大學士傅恆沿途閱看後封固進呈○命繪國朝章服圖式○辛丑諭朕閱翰林院撰擬孝賢皇后冬至祭文內有泉臺字面此二字用之常人尙可卽王公等宜不用豈可加之

皇后之尊乃漢文旣已誤用繙譯亦不校正大學士張廷玉等全不留心檢點草率塞責殊失敬謹之義張廷玉阿克敦德通文保程景伊俱著罰本俸一年○撥部庫銀一百萬兩山西廣西庫銀各五十萬兩於大金川軍營備用○吏部議准閩浙總督喀爾吉善奏玉環地方前屬太平樂清兩縣雍正六年專設玉環同知管理乾隆十二年裁移温州府海防同知駐玉環查玉環與樂清太平椅角其地墾田煎鹽及捕鳥爲業者皆二縣民是以設溫台玉環同知凡涉玉環事務溫台屬縣俱聽管理惟盤查屬溫處巡道是其地原兩郡聯界不便偏隸溫郡至温州海防同知原管山海

巡查本爲緊要今移駐玉環遠隔大洋本郡事務必難兼顧而以
溫郡府佐管轄台屬呼應不靈請將溫州同知與玉環同知兩缺
仍照舊制從之○壬寅調索倫兵一千名赴軍營聽用○以世臣
爲內閣學士

由通政使遷

○癸卯諭軍機大臣等據訥親奏稱十月初

六日奉到會商岳鍾琪願以三萬五千人由黨壩一路進攻情形
詳悉定議之旨旋於初七日札知岳鍾琪令至美諾面議並知會
傅爾丹班第等訥親於初二日至黨壩初四日卽回其於彼處情
形何能周悉且伊旣與岳鍾琪面談何岳鍾琪所云三萬五千人
進攻之說竟全未述及而必調至美諾往返經旬曠廢時日且正
當乘機進剿之時而主將離營他出何以督率調度此在訥親昏
憤糊塗已不待言計此時岳鍾琪傅爾丹當已各還原駐營次可
卽速傳諭伊等不必前往黨壩與岳鍾琪商議卽遵照近日屢次

所降諭旨努力進攻相機痛剿毋得怠日玩時老師坐守其良爾
吉王秋二人前降旨令張廣泗親帶來京今據訥親摺中有遵旨
明正其罪之語而於何時何地正法並未奏明可傳諭傅爾丹岳
鍾琪等如二人已經正法或張廣泗已經親帶來京著查明奏聞
如尚未辦理著俟經略大學士傅恆到日查辦○丙午諭軍機大
臣等訥親辦理金川軍務畏縮乖張種種舛謬朕前降旨令其明
白回奏今據奏至更復浮混無恥且皆諉過於張廣泗訥親以經
略重臣軍中調度皆聽指揮功過無可旁貸乃一切推卸在張廣
泗此番罪譴本無可寬但出之他人尙爲有辭訥親則無可諉過
如摺內所稱各情節訥親身爲經略果實見其非何難據實參奏
卽一面參奏一面提問亦無不可觀其遲回不斷並非伊見不及
此蓋以一參張廣泗則軍中之事皆伊所仔肩其責愈重惟留以

爲卸過之地將來卽或無功而歸亦尙藉張廣泗爲之代任其責居心若此是豈受恩深重實心任事之大臣所爲乎況伊摺內所稱自任舉失事卽頓二十餘日不敢前進是其怯懦委靡全無愧憤激勵之意咎無可辭至所詢伊並不親身督戰惟在帳中坐觀諸事亦據一一俯認不諱因奏請將伊交部嚴加議處夫遲誤軍機畏縮觀望設令訥親處分他人罪狀有不問伊斬決者乎而白乃僅請交部議處此豈降革所能了局者耶且伊兄策楞昨奏稱訥親於國家軍旅大事如此負恩爲國法所不容請拏交刑部嚴加治罪等語是伊兄尙知其獲罪重大國法難容而伊乃如此陳奏則是伊全不以軍務之輕重介意非天奪其魄喪心病狂則目無國法不畏三尺孤恩負國莫此爲甚此摺著交部存記尙有續降諭旨究問之事俟伊覆奏到日併案請旨○賜張兆璠等九十

三人武進士及第出身有差○戊申 上御太和殿賜經略大學士傅恆敕書○己酉命尹繼善協辦大學士

十一月壬子 上幸重華宮賜經略大學士傅恆宴○署四川巡撫班第奏臣前論奏張廣泗摺內未將訥親過失述及蒙降旨訓諭惶悚無地查訥親抵營時各路官兵俱已調齊正可進攻而張廣泗遲回不進猶駐美諾經訥親再四勒催始來軍營但訥親不能細察形勢督催過激以致布置疏虞任舉賈國良相繼陣亡自此一切軍務俱不敢主持仍聽張廣泗調度而張廣泗遂無論事之大小動云面奉經略指示其實皆出張廣泗之意而訥親不知也張廣泗之居心委卸舉動乖張訥親未嘗不知臣亦嘗與言及總因訥親以軍旅之事素未諳練倚仗張廣泗希圖成功是以明知其非曲爲徇隱此訥親之咎臣不敢稍爲隱飾得旨軍機大臣

會同該部嚴審定擬具奏○癸丑經略大學士傅恆出師 上親詣 堂子告祭行禮經略大學士及諸王大臣官員俱隨行禮

上親祭 吉爾丹蘇八旗護軍蘇於 堂子大門外經略大學士及出征大臣官員俱隨行禮 上還至東長安門外幄次親賜經略大學士傅恆酒命於 御幄前上馬 上還宮經略大學士傅恆出阜成門 上命 皇子及大學士來保等送至良鄉視經略大學士傅恆飯罷乃還○乙卯諭軍機大臣等朕聞大學士傅恆沿途行走部伍甚屬整齊兵丁安靜守法無一人生事者此皆大學士盡心辦理故能妥協如此朕心甚爲欣慰達清阿隨軍備辦諸務亦能竭力黽勉著授爲頭等侍衛令伊從此益加奮勉悉聽大學士指示加意勤慎不可恃恩稍自誇張在大學士前效力與在朕前效力無異也大學士所過地方程途達清阿一一記明俟

至軍營後再行奏聞可傳諭大學士傳恆知之○丙辰諭鄉賢崇祀所謂祭於瞽宗必有功德可稱方足膺茲鉅典近來率以仕宦通顯者當之已非覈實之道今雲南巡撫圖爾炳阿題請原任侍郎許希孔崇祀鄉賢本內則更有過甚其辭者許希孔本一硜硜自守謹厚小心之人在朝未有所建立但曾爲卿貳或者家居孝友滇省人物寥寥節取充數自無不可而本內乃有文堪華國品足型方二語朕則知實非許希孔所能當案呈內又以湯斌陸隴其爲比許希孔何如人豈可方之湯斌陸隴其擬人旣不於其倫且本朝臣工不書其名而稱爲陸當湖湯潛菴尤非章奏之體此等幕賓沿襲套語明季已成濫觴然彼時卽軍國重務人君尙槩不經目何論尋常章奏至我朝家法則通本部覆無不詳悉披覽督撫題奏事件豈可勦襲陳言任意草率今後似此者必加處分

此本著發還該撫另行具題○諭軍機大臣等朕夜閒接到經略大學士傅恆所奏事件係寅刻拜發計算大學士又復經夜不寢矣大學士責任重大此身尤宜保愛可傳諭達爾黨阿等嗣後朕所發事件若在酉戌閒到者則告知大學士聽其閱看辦理儘在戌刻以後卽暫行收貯不必告知大學士俟次日清晨或帶至下站俱可聞大學士起身甚早行走甚急著達爾黨阿等留心視大學士體中若何如行走從容則可不必勸阻儘稍有勉強伊等卽當勸阻伊等乃朕特命隨大學士前往之人大學士亦應聽伊等之言也將此一併傳諭大學士知之○大學士等議禮部尙書王安國奏明洪武初內事總於六部外事總於布政使故以官名其地其後設巡撫總制布政使已爲屬官而地方徒冒其名在明已屬牽強今外官之制督撫專制一方而會典載天下府縣及外官

品級猶以布政使司布政使領之稱名殊覺不順請改會典所載
外官品級以督撫居首次及布按兩司等語查定例川陝兩江總
督不論由何項官員補授俱授爲兵部尙書兼都察院右都御史
其餘各省總督由各部侍郎及別項官員補授者俱改爲兵部右
侍郎兼都察院右副都御史如各部尙書及左都御史奉特旨補
授者俱授爲兵部尙書兼都察院右都御史至各省巡撫由侍郎
補授者改爲兵部右侍郎兼都察院右副都御史由學士副都御
史及卿員等官布政使補授者俱授爲右副都御史由左僉都御
史及四品京堂按察使等官擢用者俱授爲右僉都御史是督撫
品級不論外任而論京銜會典俱附載於都察院且巡撫以副都
御史三品之銜僉都御史四品之銜而統轄布政使從二品故督
撫雖爲常設皆屬欽差而地方事悉掌於布政使設立本義極爲

精密但督撫總制百官布按皆爲屬吏該尙書所奏亦屬大小相承之義應如所奏外官官制內首列督撫次列布按等官庶爲允協抑巡撫兼銜向有副都御史僉都御史之別今左僉都御史業經裁汰其右僉都御史卽不便復令兼銜應請嗣後巡撫不由侍郎出授者無論何項官員俱令兼都察院右副都御史銜從之○丁巳 上幸南苑行圍○湖北巡撫彭樹葵覆奏荆襄一帶江湖袤延千餘里一遇異漲必藉餘地容納宋孟珙知江陵時曾修三海八櫃以瀦水又荊州舊有九穴十三口以疏江會漢故蹟久湮見在大江南岸止有虎渡調絃黃金等口分疏江水南入洞庭至漢水由大澤口分派入荆所恃爲蓄洩者江邑之長湖桑湖紅馬白鷺等湖譬之胸膈也監潛沔陽諸湖下達沌口尾閘也無如江襄水濁多沙易淤小民趨利者因於岸腳湖心多方截流以成淤

隨借水櫃魚課四圍築隄以成皖人與水爭地爲利以致水與人爭地爲殃今欲復三海八櫃之舊勢既不能亦惟杜其將來而使皖不增多見檄飭各州縣親行履勘將所有見皖若干各依土名查造清冊存案嗣後卽以此次所查著爲定數聽民安業此外不許私自加增仍令該管道員於出巡之便詳查加結具報各州縣實心奉行與否查覈勸懲得旨止可如此辦理知道了○戊午

上閱兵○諭軍機大臣等今日接到大學士奏報事件係初七日巳刻於獲鹿封發計初五日由京所發諭旨按程應於初六日戌刻始抵獲鹿大學士接到諭旨卽辦理覆奏已需一二時是日又有軍營傅爾丹等奏摺啓封檢閱逐一覆奏亦須數時是又達旦未寐矣途閒如此勞瘁將來抵軍何以辦事自應遵朕前旨愛惜精神將養身體以仔肩重務著傳諭大學士善體朕意毋得過勞

更傳諭達爾黨阿達清阿等伊等何不規勸大學士身體果然康健精神果然好飲食果然多著達爾黨阿等具摺奏來不可隱飾其初六日究係何時接到諭旨何時辦理軍營事件於何時接到大學士於初七日何時起程是否封發後起身抑係定棄後留人繕寫封發大學士先行起身之處著即便回奏○傳恆奏接到傅爾丹奏摺報匣遵旨開看內有小金川土司澤旺番稟一件係告張廣泗家人通事與漢奸王秋勒取澤旺財物不勝駭異細按情節張廣泗縱無恥喪心未必至於勒索澤旺財物但觀其平日袒護良爾吉阿扣王秋等則家人通事因此勾通王秋肆行不法亦所不免此事關繫軍中耳目番蠻聽聞不可不實力嚴究臣於途次遇張廣泗卽先訊問實情具奏其良爾吉王秋二犯如鞫解已近京師卽解京審理若尙未鞫獲及已鞫解而去京尙遠臣卽將

二犯帶同成都與張廣泗家人薛二通事焦修德等嚴審定擬夏爾吉王秋本應於軍前顯戮示眾且沿途解送恐有疏脫請卽於成都正法去軍營不遠亦可使番眾聞知至金川起事原因澤旺愚懦伊妻阿扣淫悍加以夏爾吉等助惡釀成悖逆今小金川雖已投順尚不無首鼠兩端皆緣張廣泗蔽護奸惡無以服番眾之心臣以爲阿扣斷不可姑容臣至軍營應生致阿扣並其同惡之犯立行正法其土司印務仍令澤旺管理使努力報效庶小金川實爲我用得旨諸凡妥協詳明有何可諭一如卿議行○己未

上行圍○諭軍機大臣等傅爾丹等所奏澤旺投遞番稟首告張廣泗一事在張廣泗起身進京之後計其時日降旨將張廣泗革職拏問已半月有餘必伊先已聞信故有此舉動看此情形軍營消息澤旺等輒已先知伊等旣知則金川逆酋本同一氣逆酋亦

必盡知矣昨經略所奏誘致阿扣奸黨明正典刑卽此一事已足申法紀而快人心但兇徒狡獪耳目周布經略辦理此事必須加意嚴密毋令伊稍知覺轉使藏匿不出或鋌而走險著傳諭經略大學士一切小心防範卽左右護侍之人均不可不慎也再縣丞任振功所言訥親初抵卡撒賊人夤夜冒雨直攻軍營賴良爾吉放槍救護訥親賞伊銀一千兩之處詢問訥親諸條內未經敘入可將此條詳悉詢明一併傳諭知之○辛酉諭軍機大臣等今日接到經略大學士傅恆奏摺係初九日巳刻在榆次縣鳴謙驛拜發必係初八日到鳴謙驛連夜辦理定稟初九早起起程後交司員發驛站者若大學士候至巳刻拜發豈不又誤路程此處著於便中問明以慰懸念前降旨令經略大學士途次須愛惜精神仔肩重任毋得過勞茲又徹夜辦理實覺有勞精神大學士其善體

朕心務自愛養嗣後辦理奏覆事件至初更前後尚可若須至二更卽當至下站奏覆不必過速以致勞頓並令達爾黨阿知之○撥吉林伯都訥倉穀二萬石於齊齊哈爾備賑○癸亥諭軍機大臣等初七日所發經略大學士事件計程應於十二日午閒覆到乃逾一日未到或俟下次應奏之事一併奏覆抑或途中接得軍營奏報有應行查辦之處以致稍遲可寄字經略大學士於便中覆奏再經略大學士起身以後軍機處所辦事件多不能愜意卽如今日議覆山東請運奉天米石一摺阿蘭泰近日曾以該處收成止有七分未便大弛海禁致妨本地民食具奏而軍機大臣竟無一人記憶者經朕指示始查檢入議其餘脫漏之處一一須朕訓諭雖經改正而朕心則已過勞較之經略大學士在京時諸事周詳妥協不至煩費朕心者實已大相徑庭矣此等處訥親向日

尙能辦理得宜由是觀之朕加恩任用自不爲過惟因貽誤軍國重務大負朕恩不得不重治其罪亦出之大公至正但從前當大學士鄂爾泰在此時朕培養陶成一訥親訥親在此時朕培養陶成一經略大學士傅恆皆幾經教導幾經歷練而後及此人材難得固非一朝一夕所能造就今經略大學士前往軍營朕實向來惟大學士一人是問並未豫留此心於大臣中培養陶成以爲接辦之人是以辦理諸務數日之間已不能不時縈朕念軍旅固關緊要第金川不過一隅視機務孰爲重大且朕躬豈宜過勞經略大學士到彼蕩平勒烏圍刮耳崖卽應遵照前旨飛報大捷其莎羅奔即卡擒獲獻俘固善縱或免脫潛逃止須留兵搜捕一切應辦事宜或交傅爾丹或交岳鍾琪若策楞到彼或交策楞班第等經略大學士酌量分布妥協於奏捷後四五日內卽當馳赴關廷

贊襄左右不必待奏到奉有諭旨方行旋旆矣此旨必應遵大學士到彼卽將此旨傳示傳爾丹達爾黨阿等至經略大學士在京時曾面奏金川殄滅之後乘我兵威投討班滾朕思金川告捷大局已爲完美若再辦班滾未免過求萬全夫班滾之所以必期弋獲者惟以折服慶復之心耳然班滾見在人所共知固可以服慶復之心也卽班滾展轉逋逃雖生猶死竟可置之不問若更勞師動眾轉生葛藤譬之漏網之魚何必爲一魚而重施罾罟天下事亦不可求太稱意無一毫欠缺况持盈戒滿古訓昭然若旣滅金川又平班滾則爲太稱意矣卽朕所身歷者言之深信太稱意之不可期而知足常樂信而有徵經略大學士應善體朕心金川軍務一竣迅速還朝以副朕望○甲子傳恆奏將軍博第所奏西安兵二千分二起於十一月初三月初五日起程查京兵每起五百

名辦理驛馬已屬拮据若二千兵爲二起驛馬斷不能給即使各騎駐防之馬然途次尖宿計當與京兵相值亦多未便臣已行文該將軍巡撫令其酌量與京兵或前或後總期不致壅擠又奉

上諭西安成都兵三千名計算趕往可冀速奏膚功據羅卜藏奏稱進兵應稍待黑龍江兵丁爲妥伊係經理之人此處亦當知之臣思行兵貴乎神速若有可進取之機未便因兵未到齊坐失機宜容臣抵軍營後審度情形乘機辦理總之不可欲速亦不可必俟兵齊方進得旨甚是實愜朕意○丁卯諭軍機大臣等據湖廣總督新柱奏稱見在調撥南北兩省官兵酌派將弁統領於十二月起程赴川又一摺奏稱該省兵丁弓箭架勢雖有可觀而弓力率多虛報如報八力之弓實止六七力其馬匹係就近購買川黔所產並各驛赴口買回挑剩之馬等語觀此情形則楚省兵力又

屬尋常從前傅爾丹等請調楚兵蓋因軍中紀律廢弛士氣委靡不得已而爲此請如貧家窘迫之時冀得鉶銖聊以壯觀一時無暇更求實際耳今滿兵旣已調集九千餘人驍勇敢戰一足當百而雲貴官兵似較楚兵爲勝卽此已可用以奏功若徒以疲弱充數虛糜糧餉究何裨益新柱所奏見交軍機大臣議令照數豫備勿遽起程候經略大學士到川酌量應否需用以定行止如尙須調遣於文到日卽令星馳前往如可不用卽一面行文停止至所派將弁皆係記名可用之人見在軍前各弁戴罪者多且日久疲玩不能振作楚省暨陝省兵丁卽無庸調遣其將弁仍應令前赴軍營以備驅策再楚省所運礮位業經抵川自可留爲攻擊之用著將奏摺議彙一併鈔寄至經略大學士每日衝寒馳騎程站旣遠而奉到朕旨又須逐一奏覆自必徹夜起辦如此勞瘁如此勇

往朕心實爲不忍實爲嘉慰亦實爲欣服雖屢降諭旨令其節勞而經略大學士勤瘁精詳夙夜匪懈在公忠大臣感激圖報道固應爾朕亦惟有於凱旋之時優錫酬庸之典以獎殊勲而國家眷遇大臣本期緩急足恃而人心不同有受深恩而忍於孤負者卽有感厚恩而切報稱者假令訥親前在軍中亦能實心任事得如經略大學士傅恆今日之二三分則此舉早可告竣朕亦必從優獎待若論經略大學士傅恆平日任用之久眷注之隆不如訥親至近今如此爲朕任勞任事忠誠奮發休戚相關不辭艱鉅是以起程之際恩施稠疊實宜逾於負恩之訥親總之賞罰因人而施茲經略大學士傅恆有感激圖報之忱朕則從而加恩訥親有辜恩負國之實朕則從而治罪皆出於大公至正適足以伸賞罰之大權而朕心所差堪自慰者亦卽在此著詳悉傳諭經略大學士

知之○戊辰諭周學健婪贓徇私一案軍機大臣等審擬援引塞楞額鄂善二人之例擬斬立決周學健前因違制刺頭已干重辟其總河任內復有納賄徇私諸款是周學健一身兼犯塞楞額鄂善二人之罪卽所犯塞楞額之罪朕已特恩寬宥其所犯徇私鬻爵種種贓款實較鄂善爲尤重立正典刑自所應得但念伊曾爲大臣伊忍於負朕朕不忍負伊姑免令赴市曹卽照鄂善之例著納延泰阿克敦前往刑部賜以自盡周學伋王湛依議應絞著監候秋後處決○平郡王福彭薨遺奏聞得旨平郡王宣力有年恪勤素著今聞患病薨逝朕心深爲軫悼特遣大阿哥攜茶酒往奠並輟朝二日其應得卹典仍著察例具奏尋致祭二次建碑如例○己巳諭內務府總管王大臣查審安甯擅用許關雜項餘銀一案計贓擬以斬候安甯自幼隨侍內廷朕加恩教導由布政使擢

至巡撫大員乃種種負恩不能稱職民怨沸騰實出朕意料之外
卽明正典刑亦所應得但關務雜項餘銀原係賞給伊家人之項
歷任關差均經支用甚有自行取用者經略大學士傅恆在京時
曾經分晰陳奏所論實屬公當若據此定罪是乃坐贓成獄不足
以服其心且安甯素行巧詐明知此項不妨侵用朕亦斷不因此
加以重罪是以直認不辭今如此定擬毋乃墮彼術中乎且伊之
受恩較訥親孰深伊之獲罪較訥親孰重從前未有訥親之案朕
意本欲嚴治其罪以示懲戒但安甯本一苛刻之人又遇吳中民
風澆薄怨謗易騰是以聲名決裂傳聞之旨未必盡實視訥親之
受恩至深而於軍旅重務乖張退縮以致老師糜餉者實大相逕
庭訥親之罪浮於安甯則安甯之罪自可末減若一例治罪轉不
足以明賞罰之至公卽如違制剃頭之案因有塞楞額則周學健

之罪可以從寬後之賜以自盡者乃因其婪贓鬻爵而非追咎其
前愆也朕一切賞罰實出於大中至正輕重之間毫釐不爽安甯
既經籍沒其父兄又皆譴斥已足蔽辜此案自屬內廷僕隸之事
此旨著內務府存記安甯仍行拘禁另候諭旨並傳諭八旗官員
人等知之○諭軍機大臣等經略大學士傅恆途中多服涼飲當
由朝夕馳驅鞍馬勞頓又兼辦理陳奏事件一切公務心力俱煩
以致火氣上升喜進清涼朕心實爲不忍益深懸念大凡寒涼之
物常服實非所宜或鮮果偶進一二尙屬無礙至於飲食茶水切
富留心節制勿圖取快一時致妨胃氣著傳諭經略大學士善體
朕意珍重調攝以紓遠念至近日所辦周學健安甯兩案並鑲黃
旗所奏訥親之事所降諭旨一併鈔寄閱看知之不必覆奏恐致
勞神也○傳恆奏接到傅爾丹岳鍾琪報匣遵旨開看內有傅爾

丹岳鍾琪所奏願以三萬五千人由黨壩進攻再由瀘河水陸並進可破勒烏圍一摺臣查岳鍾琪原奏併力黨壩而卡撒但用兵八千人防禦以爲直搗心腹之計但自卡撒直攻刮耳崖與由黨壩攻取勒烏圍仍須攻擊刮耳崖其事一例今據傅爾丹奏稱逐一履勘山澗重疊賊碉稠密而瀘河兩岸亦須防賊阻截則是由黨壩直破勒烏圍亦不甚易且卡撒業已克取色底雙碉埽清左右頭道山梁若但守不攻則賊不必分兵抵禦又將專力於黨壩死拒是岳鍾琪之議猶屬偏見傅爾丹等意欲兩路進兵較爲周備今臣擬先至卡撒詳看情形儘可進兵卽統大兵進勦黨壩一路另派員添兵協助岳鍾琪若度卡撒情形尙應少待卽至黨壩相度機宜今傅爾丹所議近是而其實在形勢機要必俟臣至軍中熟籌具奏又岳鍾琪覆奏黨壩一路攻克跟雜後尙未前進見

調雜谷土兵二千赴營協力據云天氣晴明尙無積雪則乘時進
剿正可使賊無休息又傅爾丹等摺內稱卡撒僅堪駐守黨壩兵
氣較盛而山廣徑歧在在需兵分布見不過防禦尙不能進剿其
所稱甲索旣係綽斯甲巢穴僅駐兵一千而張廣泗從前欲令撤
歸黨壩存糧六千石卽交綽斯甲看守是真所謂藉寇兵而齎盜
糧幸而中止否則未有不啓賊覬覦者至傅爾丹摺內挑選新兵
以補額缺一條自應以慣於行山之人爲上選若簡練有方新兵
自足制勝從前張廣泗將陣亡守兵悉停募補雖意在養贍故兵
家口而缺額不補兵數日少辦理亦爲失當臣與張廣泗從未相
識近於途次始見初若語言慷慨實則大言不慚至謂與訥親用
事之員外郎阿桂交結勾通一切叢蔽容臣抵營確訪覆奏得旨
諸事精詳欣慰覽之○命協辦大學士尹繼善軍機處行走○庚

午撥直隸倉穀三十萬石於山東備賑○癸酉 上幸豐澤園賜東三省官兵初隊將弁兵丁等宴並賞賚有差後每隊自京啓行皆如之○以策楞爲川陝總督雅爾哈善兼署兩江總督○大學士議覆江蘇織造圖拉奏金川軍需緊要請將直省各關米豆稅仍舊徵收查米豆稅原係應徵之項乾隆七年奉旨豁免期裕民食乃近年米價未平徒爲奸商射利應如所奏復舊得旨依議朕降旨蠲免各關米豆稅銀本以食爲民天關稅優免則市價可減是以不惜千萬正課爲小民謀養殖寬裕計當時內外臣工屢有以但利商賈無益民生爲言者槩未允准朕意欲試行數年果否於民食有裨再行酌量乃數年來稅免而米豆之價不惟不減而昂貴時或有加明係奸商不知免稅之恩專利自封轉以有限之帑項肥三倍之囊橐無裨閭閻允宜仍復原額且地方偶有偏災

卽將該處關口應徵米豆稅額加恩寬免則估舶聞風雲集市價自平輿會不得居奇窮黎均霑實惠轉得操權自上朕意不專爲軍需起見也如旣復之後奸商藉端長價弋利妨民該地方官卽應嚴行查察究處至淮關因寬免米稅後倭赫奏准加增船料今旣仍徵米稅著循舊例行各該監督及地方官明晰出示曉諭毋令胥役陽奉陰違致滋弊竇○停調陝西督撫標兵一千名○甲戌諭經略大學士傅恆奉命前赴軍營征途遙遠衝寒遄發計每日程站遠者竟至二百五六十里卯初就道戌亥方得解鞍且途次日有朕頒發諭旨商辦機務又須逐一籌畫陳奏如此迅速如此勤勞而所奏事件無不精詳妥協其經過地方吏治民瘼事事留心體察據實敷陳自非經略大學士秉性忠誠心同金石才猷敏練識力優裕安能如此國家任用大臣若人人似此公忠體國

不辭勞瘁方無忝股肱心膂之寄朕於經略大學士此次之奮往
急公實爲欣慰亦實爲不忍足見人自不同有負恩者卽有知恩
者而朕賞罰公當究未大誤也傳諭中外臣工知之○諭據經略
大學士傅恆奏稱西安見在調遣該省各營官兵並糞送經過滿
洲大兵雇覓馬騾馱載辦理甚屬拮据至沿途臺站雖設有管站
人員亦僅止一人一騎傳送請通行嚴飭總因數年以來總督未
得在省辦理請命策楞速行來陝等語見今該省營兵計已起程
赴川而滿洲大兵正在陸續整隊前進供億浩繁稽查臺站亦屬
緊要朕雖降旨令策楞速來但尙需時日須特遣大臣前往經理
協辦大學士尙書尹繼善著給與欽差大臣關防輕騎減從馳驛
前往西安暫署總督事務會同將軍博第巡撫陳宏謀等妥協辦
理○丙子諭向來各處本章有題本奏本之別地方公事則用題

本一己之事則用奏本題本用印奏本不用印其式沿自前明蓋因其時綱紀廢弛內閣通政司借公私之名以便上下其手究之同一入告何必分別名色著將向用奏本之處槩用題本以示行簡之意將此載入會典該部通行傳諭知之○戊寅諭訥親從前奉命經略金川軍務退縮偷安乖張貽誤已經降旨革職因伊聞召令回京之旨託言有面奏情形故降旨令其將何事必須面陳一一據實明白繕摺交甯成轉奏不得僅以認罪泛辭塞責伊接到前後所降諭旨稍有人心回思十三年來受恩如此深重今於軍旅要務舛謬至此自必中懷愧悔慚赧無地或恐懼失措不能置對尙不至於天良盡泯乃朕閱伊回奏之摺嘵嘵萬言皆不過掇拾歷來軍營奏報情形非必須回京面奏之事且稱兵氣之所以挫賊志之所以逞皆因去年張廣泗並未深悉賊情進退失宜

所致而又稱張廣泗並無推諉尙可資其策力懇請令與岳鍾琪分路進剿措詞矛盾乖張至此極矣不思伊身爲經略張廣泗旣進退失宜挫損兵氣自應卽行參處乃稱臣旣不諳軍旅而又奉旨以戎行責成張廣泗夫訥親身爲經略不任戎行則所經略者何事豈不大成笑柄耶其餘朕所指出安坐帳中自示惴怯師徒奔潰先已回營種種情節皆自承不諱而猶思留金川效力俟軍務告竣始往北路軍營且妄思覲朕一面窺其隱衷因朕不卽治其罪暫停發往北路降旨詢問是以轉生希冀之念猶欲遷延時日冀望格外之恩是不復知人間有羞恥事矣君臣之際相臨以分相接以情人孰無過苟其事在可恕情猶未絕或量示薄譴棄瑕錄用亦所常有至於關繫軍國重務賞罰不容少假朕亦斷不肯爲姑息之主今訥親所犯如此更何晚蓋之可圖何桑榆之可

收卽伊亦何顏再與朕相見耶至伊所陳金川善後一摺尤爲可
嗤伊在軍前毫無寸進以退縮失誤軍機獲罪罷斥賊尙未平何
暇計及善後其與古人所謂何不食肉糜者又奚異乎卽其所云
善後事宜亦摭拾朕前此諭及之事此不過偶爾談及將來或應
否如此尙在未定軍機大臣等皆共知之而乃自以爲獻善後之
計吁其可怪矣訥親受朕殊遇位至大學士如此孤恩負國罪狀
難逭內省略無動念此奏更出朕意想之外伊旣自出於頑鈍無
恥朕亦不得復以待大臣之體待之著富成卽將伊拏問於所在
地方拘禁俟經略大學士傅恆奉旨審詢各款覆奏到日另遣大
臣前往會同經略大學士嚴審定擬將此旨並訥親原摺發出俾
眾共知之○諭倉德前在藩司任內辦理金川糧務種種失宜見
經部議降調著革職交與班第兆惠令其自備資斧於軍糧處差

委效力贖罪○諭軍機大臣等經略大學士跋涉長途衝寒前進日閒既鞍馬勞頓入夜又須將朕商定機務一一詳悉陳奏朕雖屢降旨令其節勞而既有傳諭事宜在途次勢不得不於駐宿之地查辦目下已至軍營諸事並集悉煩經畫仔肩重任調度更繁精神更宜愛養日閒雖無事馳驅可以料理諸務至夜閒則宜稍爲憩息斷不可復加勤瘁以釋朕懸注今軍行旁午朕刻在殷懷經略大學士啓處不遑朕亦切爲廬念而萬幾在御宵旰時勤若更因經略大學士之夙夜殫心縈神遠注不益重朕西顧之慮耶卽如今日接到大學士大安驛所發奏摺係二十二日丑正二刻拜發若非徹夜不寐何以趕辦抵營後儻似此勞瘁實非朕拳拳馳諭之意經略大學士其善體朕意加意保重○賞調往金川之東三省兵丁家屬紅白事銀兩○命王公以下寶印以次改刻清

纂朝鮮國王金印俟襲封時改鑄○撥山西庫銀十萬兩河南庫銀三十萬兩於陝西豫備軍需○己卯諭雲南巡撫圖爾炳阿續參趙州知州樊廣德虧空一本例應撫參督審今內閣所擬票籤仍交該撫審擬經朕看出查詢始據改正且請交部察議夫察議亦不過降罰了事而已然以五人在閣似此向有定例之事竟至辦理錯誤使朕萬幾之煩尙須審詳至此於心何忍豈不有愧張廷玉來保陳大受均在軍機處行走尙有交辦事件或係一時疏忽而陳世倌史貽直則終日在內閣專辦票籤並無餘事而錯誤至此溺職殊甚張廷玉來保陳大受著交部察議陳世倌史貽直著交部嚴察議奏○諭前據經略大學士傅恆奏稱直隸山西供應大兵車馬甚屬妥協朕原降旨於大學士俟大兵陸續抵川經略大學士具奏到日將沿途該督撫等分優劣交部酌議賞罰今

據旺扎爾奏稱直隸境臺站有道員陶正中在彼稽查而山西境內惟腰站有馬數匹其軍臺尙未設定亦無呈驗馬匹道員葛爾福聞在平定州及過彼處尙未謀面因令該知州王祖庚速報巡撫其晉省大站馬匹亦疲瘦不堪平陽府乃係衝衢旣無馬匹亦未見該守令等語見在正值軍興臺站傳遞奏報事件不容稍稽時刻是以特交軍機大臣等議將部院司員筆帖式揀派坐臺並飭該地方大員分站往來督察其大站馬匹供應官兵騎換以便通行無滯均屬緊要直隸總督那蘇圖經理得宜急公可嘉卽以陶正中而論伊前在山西藩司任內因辦差平常降爲道員彼時卽阿里衮爲巡撫也今乃親身查辦無誤陶正中非劣於山西而優於直隸良由該督董率有方屬員均能奉公奮勉而阿里衮當經略大學士傳恆經過時知其必當入告故爲加意應付及出境

後輒一切懈弛屬員相率效尤遂至曠官離次其陝撫陳宏謀原係漢人於經理此等事件本非所優是以前令將軍博第等協同照料且該省道路長而州縣年偶不登者有之既聞其措辦拮据特遣協辦大學士尙書尹繼善前往暫管督務所有軍需馬騾及驛站事宜自當加意籌畫矣此番軍行迅速乃史冊所未有實因國家當全盛之時威德屈遠徵調所至踴躍從行且物力充裕從容措置悉合機宜然大臣宣力封疆當知輕重緩急軍旅之事較錢穀刑名簿書期會孰重卽不能擐甲荷戈馳驅敵愾而於此等處克殫心力共矢勤勞亦與從事戎行者無異那蘇圖實心經理諸務妥協著卽交部議敘阿里袞雖供億大站官兵尙無貽誤而怠玩於後功過僅足相抵著嚴行申飭仍令其明白回奏並令親率屬員帶領馬匹前往逐站整飭葛爾福係專派承辦之員如此

漫不經心不可不加懲儆著交部查察議處陳宏謀雖有過但係漢人本不必責以急公免其置議並曉諭中外知之尋吏部議直隸總督那蘇圖准軍功加一級山西雁平道葛爾福革職從之○諭今日張廷玉陳大受汪由敦等擬寫直隸山陝辦理臺站事宜諭旨內將陳宏謀雖有過但係漢人本不必責以急公免其置議之處寫爲無功無過阿里衮寫爲善於取巧此係面奉之旨何得舛錯至此明係有心袒護陳宏謀卽未奉朕旨伊等閱看陳宏謀所辦之事爲有過乎無過乎豈謂朕不披覽一任伊等取巧蒙混耶著明白回奏尋張廷玉等奏請交部嚴加議處諭今日內閣擬寫票籤錯誤經朕改正此雖伊等疏忽尙係公事及傳諭將張廷玉等五人分別交部議處因詢問伊等能無慚愧而陳大受擬旨時但稱張廷玉等三人在軍機處尙有應辦之事交部察議將寫

不有愧四字寫入陳世倌史貽直名字之下交部嚴加議處不知分別察議固朕體恤伊等之恩而所云甯不有愧則實繫問五人之辭也而乃巧於避重就輕移之於陳世倌史貽直而彼三人若身在事外者然至張廷玉陳大受汪由敦等擬寫陳宏謀等協理馬騾臺站諭旨於阿里衮則謂其善於取巧陳宏謀則謂其無功無過此係面奉之旨何得舛謬若是明係袒護陳宏謀豈得謂之無心日前曾召見汪由敦語及陳宏謀尙有任事之意汪由敦忻喜見於顏色彼其意蓋謂漢人中有此能辦事之巡撫可爲生色本屬小見而擬寫諭旨遂以陳宏謀爲無功無過夫朕於陳宏謀免其置議者原因該省程站較遠又有被災州縣物力未能充裕陳宏謀之辦理周章固屬有過但其事尙在可寬而其情亦尙有可恕朕因伊等寫爲無功無過是以改正有陳宏謀雖有過但係

漢人本不必責以急公之旨蓋一時令張廷玉陳大受汪由敦等自知愧慙而非朕之外視漢大臣也今明示之朕於滿漢臣工從無歧視卽以督撫而論豈僅以錢穀刑名簿書期會爲職軍旅之事正其責任中要務封疆之職滿漢並用國家不能無用兵之事也縱不能擐甲荷戈身先士卒而於軍行諸務苟能逐一妥辦卽與宣力疆場者無異目今經理滿兵經過及設立臺站若謂漢人卽不當仔肩任事須派滿員料理假令直隸山西督撫皆係漢人如陳宏謀之流則大軍前進將如何支應耶設令朕存此見遇督撫重任專用滿員置漢員於不用伊等又不知作何議論矣且亦無是體制也以理論之陳宏謀之不能急公朕雖免其置議而在張廷玉陳大受汪由敦等尙應以此自慚請將陳宏謀議處方見不分滿漢能知君臣大義乃並不出此而胸中先存一無功無過

之見故不覺流露於毫楮間耳朕而降旨時並無無功無過四字若朕謂陳宏謀無過則是賞罰不公朕不爲也本朝軍務例屬之滿洲大臣者非謂漢人卽當優游局外也第以滿洲大臣夙嫻軍旅遠勝漢人國家因能授任期於公事有濟在漢人應抱歉之不暇若因此而分畛域於滿洲任事大臣如馬爾賽等偶有貽誤漢人轉從而訾議之竊笑之不幾如杜牧之之詩所譏哉此其心居何等况君臣之間相接以誠大臣中或不無滿漢之見而朕心則廓然大公視同一體如張廷玉陳大受汪由敦等晨夕內直豈尙不知朕心儻稍有此見是爲薄視伊等面是心違在朋友尙不肯出此况朕爲天下主耶今據伊等明白回奏實亦無可置辨朕所指示事理顯然若謂朕因今日軍機旁午意有不豫而有意苛求指摘過於精細則當此軍興之際朕宵旰勤勞諸務躬親詳審亦

所宜然甯不勝於宴處深宮耽於逸豫耶且朕所指摘爲當與否自有公論張廷玉陳大受任由敦免其交部察議朕因此旨有關軍國要務故不惜嘵嘵著將此旨曉諭中外知之○諭軍機大臣等張廣泗明白回奏一摺情詞閃爍狡獪極爲可惡至所奏小金川土舍良爾吉一事敘入叔嫂亂倫等語良爾吉之罪在於佯爲投順實與莎羅奔暗通消息洩漏軍機乃賊酋奸細法所不容是以降旨令其拏解並不因亂倫繩以禮法也而張廣泗反覆千言爲之開脫明係迴護已短其奏訥親到營後派攻腊嶺一城良爾吉兄弟三人帶領土兵往卽克取訥親大悅賞銀一千兩此語尙近情理或實有其事而前此縣丞任振功所云訥親初抵軍營是夜賊乘雨放槍良爾吉力爲抵禦次日訥親賞銀千兩之語諒係謠傳至此外訥親種種背謬乖張實出朕意想之外誠不料伊十

三年來受朕如許厚恩忍心背負諸凡措置與向日在朕前承辦諸事光景判若兩人朕雖欲曲加寬宥亦無辭可爲解免當金川起事之初朕調用張廣泗方自謂得人在督撫中嫻習軍旅無出張廣泗之右者繼因其久無成功復令訥親前往朕向所倚任亦無出訥親之右者今皆身名決裂若此假令伊二人仍舊循分供職原可以始終受恩何致敗露可見凡人莫不有命伊二人自屬命數難逃是以顛倒昏謬展轉而入於重辟所謂禍來神昧非耶夫國家不能無軍旅之事爲大臣者孰不當抒誠宣力效命疆場不辭艱瘁若漢人見伊二人之身罹罪譴而自幸不膺重寄得以優游事外轉從而非笑之此其居心不太涼薄乎卽如大學士張廷玉久歷仕途幸而保全至今亦由未遇此等事耳又如汪由敦諸凡不肯奮勉向前遇此等事更不知若何矣伊等捫心自問當

抱歉之不暇尙可存訾議之見耶著將此旨存記俟張廣泗案審擬完結後宣諭中外知之○諭此番軍興供億實爲浩繁視從前西北兩路軍營費用較多數倍彼時勞師遠出十有餘年所費不出六千萬今用兵僅二載耳卽以來歲春閒奏凱言之亦非千萬不能如運米腳價北路經途數千里會減至十八兩今自成都至軍前止數百里而價亦如之固屬從前所定章程未爲詳妥但由斯以觀經費實已難乎爲繼矣在金川小醜朕本非利其土地人民亦非喜開邊釁第以逆酋跳梁不逞置之不問無以懾服諸番甯謐疆圉前此訥親等措置乖方以致老師糜餉若不改弦更張則人事尙爲未盡今滿漢官兵精銳畢集兵力足矣經略大學士傅恆體國公勤忠勇奮發將略優矣徵芻輓粟士飽馬騰物力充矣以此摧鋒前進自蒙 上天孚佑可一舉而奏膚功誠爲國家

大慶然此就人事言之耳儻萬分之一有出意料之外或逆酋自恃天驕如尉佗之處南粵未遽掃穴犁庭一過春期經略大學士乃朕股肱左右之臣豈可久勞於外且入夏雨多進取非便而京兵不耐水土又豈能暴露蠻荒駐待秋晴攻剿況以帑藏之脂膏供不貲之糜費尤爲非計我君臣如此辦理人事已盡亦海內所共知朕意此時且應極力進剿儻至明年三四月間尙不能剋期奏績不若明下詔旨息事甯人專意休養亦未始非兩階干羽之遺意著將此旨密諭經略大學士知之至王秋良爾吉一事張廣泗力言不可輕動雖屬迴護偏袒之詞且大兵雲集防禦有餘卽土酋狡詐叵測豈有慮其生事而姑息懷疑與之共事之理但既有此情節經略大學士前此所奏辦理之處宜更加周詳慎重○庚辰諭川陝總督統轄四川西安甘肅幅員甚爲遼闊在尋常無

事之時尙虞鞭長莫及見今金川軍務未竣地方公事及籌辦軍需一切調度督撫駐紮西安難於遙制卽將來平定亦經理需人從前曾經分設總督就近綜理尙書尹繼善今見奉差在陝著卽授爲陝西總督策楞著授爲四川總督管巡撫事戶部尙書員缺著舒赫德調補兵部尙書員缺著瑚寶補授瑚寶未到任以前仍著舒赫德兼管甘肅巡撫員缺著鄂昌補授其分設總督事宜交該部查例定議具奏○諭向來協辦大學士之設原因大學士有在內廷行走或奉差在外者閤務需人坐辦是以另簡人員協同辦理初非額設之缺若由協辦而簡任封疆則不必仍帶虛銜嗣後大學士兼管總督者著帶大學士銜其協辦大學士兼管總督者不必仍帶協辦大學士銜著爲例○諭軍機大臣等傳諭經略大學士傅恆今日召見軍機大臣等面降諭旨伊等從清晨直辦

至未末方行進呈而詞旨殊多未當復煩朕大加改削直至申正
始畢經略大學士途次馳驅逐日尙能辦如許事件又皆精詳妥
協則經略大學士實爲勞瘁矣而朕此閒之佐理需人實不可不
廩念惟望開春早奏膚功迅速來京贊襄左右也○都察院等衙
門議覆吏部奏請定滿漢御史分道之例查滿漢御史職守相兼
漢御史旣照江南十四省分爲十四坐道滿漢御史自應亦分十四
道定爲坐缺其協道向係都察院衙門照資挨轉以致甫協一道
尙未熟悉又轉協別道於公事無益應照各道事務之繁簡以定
協道之多寡嗣後遇有新補御史按照所補坐道缺底在原道內
協理得旨御史向有坐道協道之分坐道徒屬空銜並不辦本道
之事協道則以次遞遷其制沿自前明糾紛無謂今旣定爲二十
八缺與滿御史畫一應就見在十五省卽以此二十八員分理之

省分事繁者多分員數並令稽察在京各部院衙門則可省紛更而專職業於體制方爲允協其如何酌定之處著另行定議具奏餘依議○四川提督岳鍾琪覆奏黨壩與賊偏近其未盡克之木耳金岡革什戎岡陡物黨噶康八達等處賊互援應必官兵足敷分布方可奪取今招募新兵實屬勇敢出力但後無接應臣已調雜谷土兵二千俟到營卽當進攻至臣昔勦西藏青海時年力正壯身先士卒官兵無不共見今年力已衰進藏時染受寒溼左手足麻木不仁後雖痊愈時時復發金川山高路險不可乘騎是以向攻火燒梁木耳金岡革什戎岡康八達賊卡水泉共三十餘處臣俱策杖扶人徒步督戰至於攻跟雜葛布基係由山僻小徑攀藤附葛滾崖而下臣實未能親臨得旨覽奏俱悉以後應勉之○是月廣西右江鎮總兵魏文舉奏交趾匪徒莫保莫康武從前互

相依恃分攻夷地自莫康武被殺莫保勢孤糧乏見踞保樂而李紹龍等則占住隘蓋暮岡等處並無舉動該國夷官怯懦並不與兵擒剿得旨但當嚴我邊防不必好功喜事

十二月壬午諭訥親辦理金川軍務乖張退縮老師糜餉經諸王滿漢大臣等參奏朕諭令侍衛富成將伊於奉到諭旨處拏問拘禁其舉動言語並令富成逐一據實陳奏今據富成奏稱訥親云番蠻之事如此難辦後來切不可輕舉妄動這句話我如何敢上紙筆入奏此語實爲巧詐之尤伊受朕殊恩一十三年推心實腹何事不可陳奏如果賊徑十分險峻伊曾身同士卒盡力進攻屢冒鋒刃猶不能克再調勁兵更番前往仍不能深入其阻而供億浩繁徒糜帑項則當以實在情形奏聞請旨停兵況金川之事自因其興澤旺構釁及邊圉紀山不得不發兵致討朕實非利其

土地人民輕啓兵端前後所降諭旨皆訥親同辦之事迨至伊興張廣泗久無成功朕又屢次傳諭令其詳悉斟酌儻斷有不能殄滅之故何不明言其所以然直請班師毋得含糊兩可且於伊奏摺內批示豈有軍機重務身爲經略而持此兩議令朕遙度之理如能保明年破賊添兵費餉朕所不惜若終不能成功不妨明云臣力已竭早圖歸計以全終始訥親以親信近臣膺闕外重寄經朕如此諄切指示亦當遵旨據實覆奏朕豈有不加以裁酌允其所請之理且伊果肯侃侃直陳則此局早已可竣何用糜費如許物力是今歲之稽遲皆訥親之貽誤更何可辭又或慮奏到時爲軍機大臣及辦事司員所知亦宜親筆密緘直達朕覽何得謂之不敢上紙筆入告此等緊要情節不敢入告豈如伊歷來奏摺摺拾浮言自相矛盾者轉謂敷陳之道當如是耶夫面從而退有後

言乃人臣所當切戒訥親所稱後來不可輕舉妄動之語軍機大臣等能窺見其隱衷乎伊之意自知身名決裂且無子嗣萬分難免輒思以不願用兵之言博天下讀書迂愚無識者之稱譽而以窮兵黷武之名歸之於朕此其心懷狡詐實出意想之外朕實不料十三年來隆恩渥澤而訥親之忍心害理竟至於此或上天以此示朕俾知用人之難耶又云皇上止慮我膽子大我如何當得起訥親退縮偷安不敢衝鋒奪險實乃毫無膽量朕方責其過於畏葸過於膽小何嘗慮其膽大昔伊祖額亦都冒險登陴流矢貫脰著於女牆之上猶能負傷血戰並不謂苦爲國家建立大功今其孫委靡至此實朕所不能解又云訥親聞雲梯兵過云這都是我罪苦我今年辦得好何致聖心煩躁又令這些滿洲出來受此苦累此言尤爲可駭滿洲官兵有勇知方一聞訓遣無不鼓舞

怵躍志切同仇皆衆人所親見朕方深爲嘉悅而訥親乃以爲受此苦累伊親從軍營來爲此浮言搖惑軍心俾衆人聞之不知賊境如何險阻如何艱難此惟經略大學士傅恆忠勇奮發金石同堅不爲所惑耳兵丁一聞此言更往之氣有不略爲稍阻者耶明係伊自不能成功而轉忌他人之成功故爲此語巧於離間衆心而不顧國家之大事此其罪可勝言耶訥親一案俟朕另遣大臣前往審訊著將此旨曉諭中外知之○甲申諭大清會典開載內閣滿漢大學士員缺無定出自簡在等語本朝由內三院改設內閣大學士未有定數自是官不必備惟其人之意而康熙年間滿漢大學士率用四員至雍正年間以來多用至六員或增置一二協辦朕思內閣居六卿之首滿漢大學士應有定員方合體制嗣後著定爲滿漢各二員其協辦滿漢或一員或二員因人酌派又

大學士官銜例兼殿閣會典所載四殿二閣未爲畫一其中和殿名從未有用者卽不必開載著增入體仁閣名則三殿三閣較爲整齊再大學士出缺定例請旨開列亦有遲至一月後始行請旨者朕思大學士職司襄贊如其宣力有年遇有告休病故不忍遽行開列應俟之一月之後乃國家眷念舊臣加恩輔弼之意若緣事降革則機務重地未容久曠自應卽行開列不必請旨將此載入會典永著爲例○諭經略大學士傅恆奏稱本月二十四日入四川境至神宣驛卽無馬匹更換次日由水程至昭化縣見第五起雲梯兵仍在該縣詢稱因無馬阻滯又問該縣稱備馬四百匹俱爲上起雲梯兵騎去未回查署撫班第尙在軍營此等要務全在布政司實力經理乃高越等僅具一稟內稱俱照傳牌行令州縣按數應備其實第一站卽無馬匹應付又不多派幹練大員而

疲玩之州縣惟以藏匿不出爲事請將班第高越等交部嚴加議處等語見在赴川官兵分起前進均於議定之日飛速行知各該督撫司道自應早爲豫備俾官兵遄行無滯况雲梯兵三百名分六起進發而經略大學士隨從員弁亦僅一二百人甫入川境卽已如此將來京兵及東三省之兵陸續到齊必致益加壅滯班第身任巡撫自應豫爲調度嚴督屬員迅行妥辦今乃怠玩遲誤咎無可追但念其尙在軍營從寬交部察議高越前在東省辦事尙有才具是以由道員超擢藩司自宜感奮實力料理何得漫不經心貽誤至此著革職交與經略大學士傳恆署撫班第令其自備資斧差遣效力贖罪紀山雖經革職但在川已久該省情形頗爲熟諳著卽署理布政司印務竭力辦公以贖前愆武宏緒係專辦驛傳之員乃毫無整飭照料以致有誤軍行甚屬懈職著革職一

併交與經略大學士署撫班第令其自備資斧差遣效力再班第
紀山等皆非長才不能優裕肆應見今川陝官員廢弛已極當此
軍興旁午之時尤關緊要急宜整頓必得幹練大臣前往督率方
能妥協策楞赴任尙需時日著陝甘總督尹繼善就近馳赴川省
由陝至川往來查察督辦俟策楞抵川後尹繼善回駐西安務期
供億完備軍旅進行俾得早奏膚功其餘怠玩藏匿之地方官俟
軍務竣日另行覈其功過查辦尋吏部議署四川巡撫班第照例
降一級調用抵銷得旨銷去加一級再降二級從寬留任○乙酉
諭經略大學士傅恆自奉命經略以來公忠體國殫竭惓忱紀律
嚴明軍行甚速途次衝冒風雪晨夕馳驅兼辦一切咨詢機務晷
刻鮮暇常至徹夜無眠今日披覽來奏甫入川境馬匹遲誤減從
星發竟至步行自非一秉丹誠心堅金石安能若是將來迅奏膚
庸

功當優議酬庸之典而目前之勞瘁實屬超倫朕於臣工有善必彰卽如那蘇圖所辦軍行供億豫備妥協乃軍旅中之一節尙加恩議敘况經略大學士如此忠勤豈可不加優獎在經略大學士冲挹爲懷此次及將來大捷議敘定必力辭而在朕賞罰權衡大公至正之道固不得以意爲輕重也經略大學士傅恆著交部從優議敘尋吏部議請晉銜太子太保仍加軍功三級得旨經略大學士傅恆公忠體國懋著勤勞殫力宣猷精詳妥協著晉銜太保仍加軍功三級○諭高越武宏緒遲誤軍行馬匹昨已降旨革職今據經略大學士傅恆奏稱四川境內並無伺候馬匹不得已止帶十數人於陝省疲乏驛馬內揀選乘騎馳赴成都趕辦供應兵丁馬匹且途次馬乏竟至步行等語高越等以方面大員承辦軍旅要務大站之馬或一時不能接濟何至並經略大學士所需馬

數十匹亦全至貽誤見在大兵陸續抵川軍務甚關緊要直隸山
陝等省均應付齊備而川省怠玩廢弛一至於此殊出意想之外
其漠視公務貽誤軍機情罪重大革職差委不足蔽辜高越武宏
緒著於成都枷號示眾俟舒赫德到時帶至軍營會同經略大學
士按律嚴審定擬具奏○諭滿洲大學士見在內閣辦事者惟來
保一人應酌派大臣協辦朕思署刑部尙書阿克敦尙係舊人且
從前曾經協辦仍著伊暫行協辦內閣大學士事務○丙戌停調
湖北兵四千名○命撥京師八旗馬三千匹由直隸良鄉至四川
成都以次協濟撥山西湖北馬各二千匹解四川備用○丁亥以
黃廷桂爲兩江總督由甘肅巡撫遷○戊子諭金川用兵以來張廣泗貽
誤於前訥親貽誤於後兩人之罪狀雖一而其處心積慮各有不
同至於自逞其私罔恤國事則實皆小人之尤矣朕昨御瀛臺親

鞠張廣泗其狡詐款飾緊要情節俱經一一供認不諱而其茹刑
強辨毫無畏苦之狀左右大臣皆以爲目所未見卽此一節與市
井無賴何異又今日接到富成所奏訥親明白回奏一摺其乖張
舛謬之處凡朕所指出者悉無可置辨惟思求見朕面不知伊尙
有何顏見朕且求赴軍營效力伊曾爲大學士將欲如士卒奔走
猶覬升驍騎校耶其頑鈍無恥實甚觀此則張廣泗乃剛愎之小
人訥親乃陰柔之小人自當償事一至於此矣當張廣泗初抵軍
營以爲金川賊酋亦如黔苗之易辦屢次妄爲大言可以剋日奏
功旣而久無成效時復失機則又諉過屬弁藉口兵單及聞訥親
前往伊復持兩端懷觀望訥親能辦此事伊固可依附而邀次等
之功事不成則咎在訥親伊乃一切推諉使陷於敗仍可復據其
任是以於訥親之種種乖方並無一語入告其後見訥親之必敗

乃向屬員訕笑誹議備極險忤情態蓋恐此時據實奏聞猶或致
譴責不若含混詭隨坐觀其決裂之爲得計也此其心展轉數變
狡獪叵測經朕詳悉推勘洞見肺肝始將實情吐露訥親且在其
術中而不覺矣自訥親身膺重寄退怯無能早爲張廣泗所窺任
舉敗後遂至一籌莫展且恐如固原兵丁生事曲加重賞轉屬張
廣泗彈壓而於張廣泗之挾詐誤公又不據實陳奏意欲留以爲
卸過之地伊兩人互相推諉其過惡之剛柔異而其心則皆不可
問也夫訥親張廣泗在大臣中皆練達政事之員使其不遇此等
重務則訥親張廣泗均可擁高爵而厯亨衢優游終老何至敗露
若此可見人臣居心惟當一秉至誠使能公忠體國自邀休佑如
其懷私自爲雖以訥親平日之小心謹密張廣泗平日之熱嫺軍
旅而方寸一壞天奪其魄雖欲倖免而不能豈不大可畏哉訥親

張廣泗固不幸而遇此事而朕因此而益見知人之難則金川之事未嘗非上天昭示之深仁也張廣泗供內有但知皇上慈仁不知皇上英武之語朕聞之深爲抱愧朕臨御十三年思與大小臣工共臻惇大之治而水懦而玩亦朕所深戒卽如從前鄂善之案不少寬假豈肯曲法縱容爲姑息之主耶且張廣泗在皇考時已由巡撫用爲西路副將軍後朕授任苗疆伊亦尙能隨宜籌辦訥親雖由朕信任然其十餘年來朕歷加明試委辦諸事不避勞怨若謂朕爲誤用訥親則用張廣泗亦豈誤耶然當此軍國重務而伊等深負朕恩實非意料所及今朕明正其罪以彰國憲乃朕賞罰無私大公至正之道張廣泗見交軍機大臣會同該部按律定擬訥親著尙書舒赫德馳驛前往帶赴軍營會同經略大學士傅恆尙書達爾黨阿嚴審定擬具奏訥親摺並發○調甘肅西

甯等營兵一千名赴軍營聽用○辛卯諭朕覽經略大學士奏報於渭城驛馳赴成都日行三百二十餘里此次經略大學士奉命遄征每日帶星就道薄暮猶未解鞍勤勞亦云至矣途次又日有頒發諭旨商辦機宜奏覆事件無不精詳妥協而所過地方吏治民瘼又無不留心體察兼之川境驛站馬匹料理未能齊備甚至有步行之處乃自渭城驛抵成都一日之間至行三百二十餘里如此迅速如此勤勞苟非秉性丹誠心同金石曷克臻此又奏稱布政使高越抵任甫經八日其貽誤供應馬匹之處情稍可原罪猶可追等語經略大學士因川省貽誤軍行馬匹具摺參奏朕以高越係地方大員武宏緒專司驛傳有誤軍機情罪重大是以降旨將伊等革職枷號示眾今據經略大學士所奏則高越情在可原但既係地方大員卽到任未久亦當上緊趕辦乃至貽誤軍行

咎亦難辭著賞給道員職銜留於川省委用其布政司印務仍令紀山署理至武宏緒身爲驛道罪無可追仍照前旨行朕用人行政一秉至公卽如高越前因貽誤軍行卽降旨重治其罪今旣知其情有可原卽寬其罪譴予以自新輕重權衡絲毫不爽經略大學士居心公正辦事精詳是以參劾於前請寬於後與朕意脗合君臣之間辦理政務果俱能如此則事未有不當而功亦未有不成者朕於滿漢大臣原無歧視但其中有知恩者亦有負恩者如訥親孤恩負國外謬乖張朕卽重治其罪而忠勇奮發如經略大學士者朕豈可不加之優獎以勵臣工以重國事乎經略大學士傅恆朕前已降旨優敘其隨往之達爾黨阿達清阿安冲阿此次亦甚奮勉著交部一併議敘將此傳諭中外諸臣俾知效法尋議達爾黨阿達清阿安冲阿俱准其軍功加一級從之○諭慶復一

案該部尙未題請完結朕思此案情節顯著更無疑竇今所以久懸未結者第因班滾尙未弋獲耳究之班滾見在眾所共知同案之羅於朝革松結見在設法緝拏固不待班滾就縛始足定此爰書卽班滾到案亦於慶復之罪無所加也但慶復之案其罪較之訥親張廣泗有閒蓋訥親之罪在乖張退縮負恩債事張廣泗之罪在狡詐欺罔糜餉老師朕前後所降諭旨甚明至於慶復之捏報班滾焚斃若係伊授意李質粹等令其通同欺罔則罪無可追而當日情形則因屬弁咸以爲班滾實經焚斃慶復明知其未確而大局將竣若再行究詰則事不易了是以隨眾附和遷就了事亦不無思家之念而退縮乖張則實未如訥親之甚也慶復之實情如此軍機大臣等將朕此旨詰問慶復然乎否乎慶復身爲大臣膺闔外重寄似此糜費軍需暴露士眾而終於扶同草率覈其

情罪雖明正典刑亦所應得但見有訥親張廣泗兩案絜而論之慶復尙在可待之列國家大臣雖肇由自作而屢有陷重辟之人朕實不忍此又朕姑息寬柔之失矣但此三人中若求一稍可遲待之人則莫若慶復且懸案不結終非了局慶復李質粹等著軍機大臣會同該部卽按律定擬具題並將此旨令諸王滿漢文武大臣等公同閱看尋奏擬慶復李質粹宋宗璋均應斬監候秋後處決從之○諭朕御極之初嘗意至十三年時國家必有拂意之事非計料所及者乃自去年除夕今年三月疊遭變故而金川用兵遂有訥親張廣泗兩人之案展轉乖謬至不可解免實爲大不稱心伊兩人平日俱非不能辦事之人當班第因張廣泗久未成功請遣重臣督師訥親原係第一受恩之人官階在前維時大學士傅恆尙係協辦閣務若卽遣大學士傅恆前往將置訥親於何

地且訥親平日小心慎密見事明白受恩十三年在近臣中無出其右者至張廣泗自 皇考時卽已用至巡撫授爲西路副將軍朕以苗疆需人復調任黔撫古州係從未開闢之徑崇山密箐不亞金川後復有城綏之役張廣泗皆能枚甯奏績上年調爲川督大臣等共慶得人詎料訥親則退縮乖張張廣泗則狡詐傾險兩人皆致債事不但伊兩人出於命數之無可如何朕亦夢想不到由今思之此番用兵非爲金川直爲訥親張廣泗之孽不可追實乃 上天仁愛朕躬俾知用人如此其難而爲大臣者當共知天道昭彰如此可畏宜各秉公忠實心爲國家任事未必非朕不幸中之大幸也卽如訥親在軍前但許傅爾丹等列名請安不令一人奏事而兵丁對陣時伊於火光中望見之語乃伊奏摺中自行發露經朕指出謂其從未親身督戰降旨詢問伊乃自認果從未

親臨督戰夫總戎之人豈能每次臨陣或一二次偶然未出亦屬尋常而朕卽謂其從未臨陣彼亦自認無辭是蓋訥親專圖安逸視士卒之捐軀效命漠不動心得罪鬼神是以不待他人攻發而自行發露耳朕思及此不覺悚然至張廣泗巧詐推諉專欲陷害訥親以圖經略之任而不復顧國家軍旅重務有心貽誤經朕親鞫洞見肺肝伊猶希覲復用朕反復窮詰始供吐不諱豈非天奪其魄是以不容掩飾耶今兩人罪狀顯著如此朕卽欲曲爲保全實出無策訥親見交舒赫德會同經略大學士傅恆及尙書達爾黨阿審擬張廣泗見據軍機大臣會同刑部按律擬斬立決朕非謂惟辟作威欲將此兩人寘之重典令羣臣知所做畏亦並不謂處置公當賞罰分明伊兩人獨非朕所任用者乎今兩人僨事至此用人之誤實深爲抱愧若不按法治罪則朕爲飾非爲怙過

祖宗法度具在朕何敢以意爲輕重耶訥親張廣泗皆係大臣生殺予奪朕不敢私著傳集諸王滿漢文武大臣將訥親張廣泗二案口供奏摺並朕此旨及慶復一案諭旨令其公同閱看朕將伊三人分別處置是否允協俾眾議僉同以服其心並令中外臣工共知朕用人之苦心也○吏部議奏大學士張廷玉等票擬錯誤請將陳世倌史貽直均革職張廷玉來保陳大受均降二級留任張廷玉有加十五級應銷去二級免其降級得旨陳世倌自補大學士以來無參贊之能多卑瑣之節綸扉重地實不稱職著照部議革職史貽直著革職從寬留任來保陳大受俱著降二級留任張廷玉著銷去加二級免其降級○四川提督岳鍾琪奏續調雜谷土司兵二千名已到五百餘名查塔高山梁界在康八達木耳金岡兩山之中各處總路若克此梁可斷賊應援並可攻取康八

達要隘但梁上有木城石城土卡三座防範甚嚴非用奇難以制勝十一月十八日派兵千二百名攻木耳金岡誘賊聚援以便乘機攻奪塔高山梁我兵賈勇直前奪獲土卡平房三處水卡一座斃賊百餘臣與法酬董芳中秋瑚什等親臨督陣見守備馬化鼐千總馬漢臣等俱奮不顧身各帶槍石等傷賊勢大挫塔高之賊漸移木耳金岡爲自守計正可乘虛攻取不意是日黃昏降雪約深二寸至二十日尙未晴霽俟天氣一晴卽督兵進取得旨欣悅覽之汝調度有方實可嘉悅總俟克成大勳從優議敘○壬辰諭朕前日降旨謂陳世倌多卑瑣之節並非泛論卽如伊乃浙人而私置產兗州冀分孔氏餘潤斯豈大臣所爲今旣革職著諭山東巡撫不准伊在兗州居住○軍機大臣等奏張廣泗受恩深重歷任封疆 皇上因其尙諳軍旅特命以進勦金川乃自抵軍營以

來毫無成算始則分兵十路調度失宜繼又措置乖方以致張興
失機陷歿他如遺棄軍裝礮位失火轟礮焚斃官兵率皆委過於
下惟以剋日成功屢行妄奏遷延歲月糜費不貲及聞訥親前往
卽諸事推諉漠不關心且信用賊酋如黨袒底黔省劣員身爲總
統布散流言煽惑眾聽其乖張欺罔罪狀非一臣等按律擬議張
廣泗失誤軍機洩軍情煽惑人心守備不設爲賊所掩襲因而
失陷城寨毀棄軍器罪皆應斬加以種種負恩有心誤國實刑章
所莫追應將張廣泗擬斬立決得旨張廣泗著卽處斬著德保勒
爾森前往監視行刑諭軍機大臣等軍機大臣等會同刑部審擬
張廣泗一案奏內引領軍征討逗遛觀望因而失誤軍機者斬之
律而聲明張廣泗情罪重大斬候不足蔽辜請擬斬立決是張廣
泗之罪尙可不至於此而大臣等加入立決矣夫逗遛觀望失誤

軍機乃許應虎之罪張廣泗狡詐欺妄有心誤國情罪重大立決
乃所應得卽伊自供亦以爲法當立決若果應監候則朕有何事
親御瀛臺降旨審問耶從前年羹堯之案所引斬律多條今張廣
泗種種罪狀擢髮難數而軍機大臣多人共辦一案乃至潦草錯
誤不合事理又來保所寫神保住寬免之旨總不明晰假令經略
大學士傅恆在此承辦此等案件自必斟酌妥協何至煩勞朕心
若是朕益不得不望經略大學士之早奏膚功迅速還朝矣著傳
諭經略大學士知之○甲午傅恆奏接到傅爾丹班第報匣內奏
摺一件係黨壩頭人乞降賊勢窮蹙及耶卡病重差員往驗臣細
閱此摺辦理殊未妥協旣云乞降而逆酋並未到營卽耶卡果病
重莎羅奔何以亦不親行且差員到彼處耶卡如何情景出何語
言亦並未述及賊人乞降逆酋未至但據頭人虛辭卽差員往驗

似屬非體卽欲借此知其山川要隘內瀆情形亦應令素有膽智之大員前往楊自功等千把微員綠旗兵怯懦僮入賊境微露畏蕙豈不損軍威而傷國體且焉知非逆酋自揣勢窮姑爲乞憐之狀僞作耶卡使我兵識認以爲將來免脫之地或聞訥親等前往黨壩傅爾丹等又至美諾會商將從黨壩直入故令我軍識其道路將來從此取徑可以豫爲設伏種種賊情俱未可測而岳鍾琪等並未籌及臣至軍營自當將此情節一一告知傅爾丹等以防賊詐聞軍中綠旗將士知臣來川日夜盼望而傅爾丹等聞臣將至轉生疑懼臣至軍營當詳悉開導使之釋然無疑至傅爾丹年已六十六歲精力就衰惟熟於管領滿兵將來應令專辦營盤一切事宜其餘不使分心惟用兵之事亦與隨時商酌臣至黨壩欲語岳鍾琪云爾受 皇上深恩棄瑕錄用當一矢丹誠竭力報效

不可稍存瞻顧我奉命經略調兵如此之多卽仰仗天威勝算翦此么麼亦本分事何功之有若爾攻取漸有進步卽爾之功儻更能買勇前進埽穴犁庭則其功益大若爾不盡力我克成功不能掩爾過若爾能盡力建功我爲經略眾人之功卽我之功豈有絲毫畛域惟在同心協力相與有成可以毫無觀望如此諄切告語並將此宣布軍中將士使傅爾丹岳鍾琪等疑懼盡釋庶臣得收指臂之效又奏奉諭旨並閱新柱原摺楚兵情形已可槩見臣至軍營與傅爾丹等酌定當卽行文將所調兵八千名全數停止原議調兵三萬五千計前停陝省督撫標兵一千今又停楚兵八千尙存二萬六千名如尙可酌減卽於陝省雲貴兵內議裁總溪臣到卡撒酌定奏聞又奏傅爾丹班第所奏湖廣雲貴兵撥給長夫之處軍興以來川省民力凋敝除湖廣兵已議停調外其雲貴二

省若令長運直送金川實爲有益又奏傅爾丹參奏都司沈瑞龍告病擅回僅請交部治罪辦理未免失當軍中疲玩之習漸染已深不可不力爲振作應將沈瑞龍調至軍營驗係病深卽從寬永遠枷號軍前示眾俟凱旋請旨發落如係託病卽應以軍法從事奏入諭軍機大臣等今日接到經略大學士傅恆所奏料敵情形一摺籌審精詳思慮周到識見高遠實乃超出等倫經略大學士隨朕辦事數年平日深知其明敏練達初不意竟能至此卽朕自爲籌畫亦恐尙有未周朕心深爲喜悅經略大學士信爲有福之大臣觀此則大功必可告成也至所奏各路官兵除陝西督撫標兵一千名業經停調外前據經略大學士奏稱湖北兵四千已行文停調而見據新柱奏楚兵分爲五起前三起共兵二千三百五十名俱已起程湖南兵四千及湖北襄陽等鎮兵一千六百名見

候文到起程等語今經略大學士奏俟至軍營會商停調恐到營後行文此項官兵業經抵川勢難再行遣回留資調遣未爲不可或於滇黔路遠營分未經起程兵丁內酌量照數減調其楚省候文起程之兵應調應止速行知會方不至於兩歧仍將如何辦理之處明晰速奏再川省軍興以來民力未免疲憊所有運夫一事楚省已經抵川之兵其由水路至者尙須於重慶雇夫惟陸路之兵或可卽用其夫長送至軍其雲貴兵丁若不須調遣自亦無庸籌辦如尙須調遣應如所議用長夫運送庶可稍紓川民力役又運糧甚關緊要班第應駐成都接應其往來照料則係兆惠專責務期妥辦毋致貽誤經略大學士傳令伊等知之其都司沈瑞龍若果託病擅回自應從嚴辦理以懲縱弛積習尋奏臣前奉旨停減兵丁原令陝省將未起程者酌減再將湖北之四千停止後陝

省查覆未到復奉旨湖廣兵廢弛所派八千名勿令起程臣飛卽行文將陝兵除督撫標一千名已停外餘槩令飛催起程湖廣兵擬到營商停後聞楚兵將入川境臣思到者數尙無多遣回之費與至軍營之費所省十倍是以決計行文迎阻令全撤回至滇黔兵皆已起程無庸減調見在軍前滇黔兵傷病遣回者二千餘名臣令該省不必議補是又減數千矣至雲貴兵應用長夫卽行文班第遵旨辦理報聞○乙未傳恆奏查川省馬少供應難免貽誤臣與高越商酌將各州縣未到馬極力催趲並每站設夫役將上站馬接收加意喂養送回原站以備下次兵騎此事關繫緊要州縣驛丞官員恐未足恃卓鼐尙屬曉事且滿洲辦理此等事件實勝漢人已屬專心協理臣於途次見西安兵馱騎馬騾甚多伊等過成都而西其勢不能多帶必仍留省城喂養莫若購買添補驛

站臣已交卓爾將見存馬價銀八千兩並酌於藩庫動項購買見
備馬旣屬艱難而四川路窄若照原奏每隊五百名一處行走住
宿不惟不得如許房屋卽帳房蓆棚亦難一時搭蓋臣酌以五百
名分兩隊儻住宿處二百五十名尙不能容則令稍前稍後分住
到營所差不過一二日不至甚遲再查從前派往金川之大臣侍
衛官員兵丁等乘騎馬匹背負人夫並無定額而自成都起程之
大臣侍衛護軍校拜唐阿等所給銀數亦過多此次派官兵甚眾
若照例辦理勢不能給臣量爲酌減並曉諭以兵多費廣之故勉
以立功受賞兵等各無怨言至臣應得各項除鑼鍋帳房之外一
無所取以服眾心惟是成都五方雜處囑嚮子向爲民患滿兵一
千六百名僅餘五百名在省巡撫又在軍營用兵之際內地防範
不可不嚴臣已令高越並飭提督巡撫標下參遊等官添撥嚴防

又奏接到岳鍾琪等報匪係報攻塔高山梁等處軍情查近日岳鍾琪所奏連日攻克軍勢漸振但黨壩之士氣稍揚則卡撒之聲勢尤不可少懈必宜乘機奮擊賊酋兩地兼顧方易克捷臣至卡撒當鼓勵軍營及時攻剿儻此處地勢不便臣卽往黨壩查勘從此直搗勒烏圍並飛速行文令大兵不必復往卡撒卽於中途分道直趨黨壩軍糧卽行運往見在莎羅奔與郎卡俱在勒烏圍一舉而二賊可擒是亦一策至卡撒仍令大張聲勢俟後起兵到分撥來攻此時未便懸擬俟臣到營商度又奏從前高越奏請推廣捐例業經議行但各班銓選人員甚多雖該省另立軍糧飛班赴捐者仍少於軍儲未必有濟請將戶部收捐停止俱令於川省報捐本折兼收其運米至軍前者准以飛班卽用並將各捐班應選人員俱停選六箇月先儘川省捐班選用奏入諭軍機大臣等覽

經略大學士傅恆所奏籌酌軍營進取諸務事事周詳妥協洞中
款要深爲嘉悅將來徑趨黨壩直搗勒烏圖而於卡撒一路大張
聲勢嚴密防禦賊酋已在網中自可收犁庭掃穴之效其糧馬等
事若非經略大學士迅速籌辦大兵雲集何以支應但從前止知
川省用兵以來供億浩繁民力拮据而其空虛疲憊一至於此竟
無一人剴切敷陳者卽軍前光景諸人奏報亦僅依稀閃爍朕於
金川何曾有絲毫利其土地人民之見使訥親等能據實入告朕
甯不早爲裁奪何至糜費若此是以伊等之罪益無可追今經略
大學士思慮所及使萬里情形瞭如指掌觀此則用兵一事斷不
過朕昨所諭兩月之期矣此事前已爲訥親張廣泗所誤一無就
緒今命將調兵飛芻輓粟盡力籌辦譬之爲山已成九仞一簣之
勞勢不可止如其應期克捷指日蕩平固所深願儻尙須籌畫略

有遷延則以全蜀之物力帑藏之脂膏填於蠻荒邊徼一隅之地實爲可惜朕見甚確朕志已定在經略大學士以軍旅自任自不肯爲撤師之言於理亦不當爲此言但目前所急者惟馬匹錢糧馬匹雖經措辦似可無誤而糧運則尙費料理經略大學士目擊該省艱窘之狀亟思接濟計及捐例一事欲爲變通誠出於無可如何第本年十月以後所撥部餉及各省帑銀共三百萬俱可陸續於二月以前解到此外又有山西公捐百萬長蘆商捐三十萬湖廣商捐二十萬浙江商捐十萬兩淮雖未奏到亦當不下百萬前項各捐銀兩經略大學士想未悉知故有此奏朕思此時行之緩不及事官生懷挾厚貲遠赴川省勢難剋期而至且聞該省軍興旁午漢人夙多畏怯更必裹足不前即使踴躍赴捐而京外行文出示一停一開已當至四月於事恐亦無補况當年西北兩路

用兵亦未至於此今若將前例槩行停選未免浮議繁興而官生又不能將本籍所產糧米輸納勢必持銀赴川購買適使該省糧價昂貴其總理收捐之人若如經略大學士之公正廉明白能不致滋弊卽策楞尹繼善亦或能之斷非班第紀山所能勝任展轉思之實多未便目下且就見撥之項隨時支應尙可敷明年二三月之用卽有不足亦可另爲籌濟此二摺未經交議惟軍機大臣等及舒赫德知之兩處辦事司員俱勿令與聞也昨據新柱奏稱楚兵二千三百名業經起程難以趕回已傳諭經略大學士於滇黔路遠營分未起程兵內照數減調朕思滿兵見調至九千皆驍勇可用此外各省調遣已至之兵應留營備用其餘未至者或酌量檄停蓋兵多則費亦多輓運維艱不得不斟酌辦理而無用之兵徒多亦無益也著一併傳諭經略大學士知之併鈔寄尙書舒

赫德閱看○四川提督岳鍾琪奏十一月二十一日天氣稍晴臣撥兵五路夜攻塔高山梁參將五德納等焚木耳金岡賊碉二座平房五間賊卡二處殺賊數十人遊擊王三元焚康八達木卡殺賊二十餘人遊擊阿爾占等攻塔高山梁木石城擊死城外濠內賊番十數人賊棄濠歸城官兵力撲過濠圍攻木城城上矢石如雨三等侍衛丹泰直撲城邊射死賊三人矢盡力戰陣亡賊番於城上潑水水凍不能搖動火不能焚自三更至黎明連攻八次未能奪取路險不能久駐止得撤回得旨覽奏俱悉○丁酉諭軍旅乃國家第一重務軍法從事成例基嚴今查律本內玩寇老師有心貽誤竟無正條非所以慎重軍務儆戒失律也夫科場作弊尙卽正典刑若以行軍相較孰爲輕重自應稽查舊案明著刑章俾眾知畏法方能鼓勇用命此非朕欲用重典實昭示出師武臣肅

紀律而勵勇敢辟以止辟之義見在纂修會典著軍機大臣會同該部詳酌定議具奏以便載入尋議凡統兵將帥玩視軍務苟圖安逸故意遷延不將實在情形具奏貽誤國事者又凡將帥因私忿媚嫉推諉牽制以致糜餉老師貽誤軍機者又凡身爲主帥不能克敵轉布流言搖惑眾心藉以傾陷他人致誤軍機者均屬有心貽誤應擬斬立決從之○諭軍機大臣等金川用兵一事朕並非利其土地人民亦並非因御極十三年來從未用兵欲揚威武成此殊功誇耀史冊也第以賊酋私放夾壩又騷動番境逼近爐地雖已驅逐回巢未經懲創怙惡如故巡撫紀山奏請致討一面出師朕因張廣泗嫻於軍旅調任總督委以進剿之事而張廣泗初不以實在情形入告惟妄爲大言自秋涉春師期屢易班第料理糧運見伊措置乖方迄無成效奏請特遣重臣前往班第職任

本兵又係軍機大臣豈不當身任其事所奏自屬巧於卸責但軍務重大原應另遣大臣而十三年來受恩深重者孰如訥親伊在皇考時已在軍機處行走數年辦事原屬勤幹維時大學士傅恆適遇孝賢皇后大事未便釋服卽戎且亦老練不及訥親此遣訥親前往之由也孰意其福淺孽深臨事乖戾迥異平日一至西安將軍巡撫迎見訥親傲慢睥睨仰面不顧於地方情形全不置問秦蜀接壤軍營動靜亦槩弗諮詢而其沿途肩輿自適騶卒動遭鞭朴流血浹背或至顛踣爲人馬踐踏轉在轎中視而笑之此豈復有人心耶及至軍營安坐帳中從不親身督戰每日至已午閒方起屬員槩不接見遂致諸務歧誤而張廣泗當訥親初到曲意逢迎欲得其懽心及見伊漫無成算則轉諂佞爲誹議爲訕笑又見伊大局將敗則復轉輕慢爲傾害布散流言搖惑士眾欲

擠之死而攘其職而於其種種貽誤並無一語參奏此小人之尤
經朕於瀛臺親鞫具得實情是以立賞重典至蜀地民力之凋敝
賊境進取之險阻士馬芻糧跋涉輸輓之艱難從未見伊兩人據
實敷陳而訥親獲罪後始私對富成云番蠻難辦以後不可輕舉
我豈敢形之筆墨必俟面陳不思伊在朕前何事不可摺奏伊向
日奉命出差屢有密封此等軍國重務何不便摺奏之有可見人
心之善變靡有常形此正聖人所謂君子上達小人下達訥親之
變而乖謬實非意計所及而經略大學士傅恆平日固屬明敏周
詳朕亦不料其此番諸務練達識見高遠妥協能至於此也經略
大學士傅恆昨奏川省馬匹應付拮据及成都添設堆撥諸事大
學士自請督師仔肩重務必不肯於進取之時爲畏難之語但所
陳奏川省可慮情形以朕度之尙不過十言其五耳然卽此而觀

則用兵一事斷不可過朕面諭四月望前之期更不必游移矣川省民番雜糅加之囑魯流匪遇事逞兇所賴年來秋成豐稔小民尙有樂生之心得以少安無事今烽燧連年人苦勞役設有奸徒從而煽誘以易動之民當困憊之際內地少有疏虞諸事深爲可慮卽如官兵經過西安督標匪卒以牽馬伺候小忿輒持刀恣斫傷及三人川民疲於供億背負軍裝徒步涉險甯不較此更甚在成都省會可添堆撥而關外長途紆折出入重簪之中安能任在周防耶朕若早知如此並此番調遣皆可不必此皆訥親張廣泗貽誤不據實入告之咎也目下既有爲山九仞之勢則一簣之勞難於中止今滿兵陸續前進初擬二月初可取齊茲觀大局須至二月中旬然自到齊以至四月初五已五十日以此爲期大功何難速就儻過此以往則暑雨時行饋餉難繼此際幾用至千萬豈

可更滋繁費耶目今若能直搗勒烏圍擒其渠首固爲快愜或鼓
勇摧鋒屢有克捷賊酋窮迫乞命因而開三面之網俯准納降亦
可殺靖邊徼經略大學士卽當於三五日內振旅凱還舒赫德亦
相隨反旆其善後事宜卽交策楞辦理朕思賊巢踞此絕險攻剿
費如許物力若仍以付之番酋取彼予此是殄一寇復增一寇實
多未便應於勒烏圍駐一副將卡撒黨壩列營防禦而打箭爐駐
一總兵可以外控諸番內衛疆圉聲勢庶爲聯絡如四月初十間
莎羅奔即卡尙稽天討未遑殄滅則於要害地設弁置守打箭爐
鎮以總兵是在策楞岳鍾琪詳悉籌辦滿兵分隊撤回沿途督撫
善爲接應班第兆惠以次在後徐行其會審訥親一事計舒赫德
抵川與策楞相去不過數日軍前無鞠訊之暇應聽大學士傅恆
酌定至班滾一節竟不必辦慶復之罪已定得班滾亦無可加而

一經搜捕至速亦須旬日以日費萬金計之何必過耗帑項購一
逃蠻之首耶策楞因伊弟身罹重譴慚憤極爲誠切夫父子罪不
相及何況兄弟策楞自屬可用但伊儻以訥親退縮爲前車或至
冒險不顧伊乃國家大臣自宜善爲持重不可任其一往致有意
外一併傳諭經略大學士令其留心○軍機大臣吏部議奏大學
士南河總督高斌於查周學健家產時徇私瞻顧應降三級調用
前經革職應革任得旨高斌人好沽名實無贊襄之益身成廢疾
久缺進退之儀著革去大學士念其夙習河工從寬留河道總督
任○戊戌都察院等衙門議奏酌定滿漢御史分理十五省並稽
查在京各部院衙門事件之例從前御史止六道分查各部院衙
門事件而分省止十四雖有京畿一道專刷各部院衙門卷宗並
不稽查直隸事件其直隸事件俱分隸各道今請將京畿道併入

十四道共爲十五道京畿道仍照舊刷各部院衙門卷宗並辦理直隸及盛京等處地方刑名案件稽查內閣順天府大宛二縣應設滿漢御史各二員次河南道辦理河南案件稽查吏部詹事府提督衙門五城並特交轉交及文武官員考覈一應具控呈詞應設滿漢御史各二員次江南道辦理江南案件稽查戶部及寶泉局宣課司左右兩翼在京十二倉通州左右翼米局漕運總督衙門兼查三庫月摺事件應設滿漢御史各四員次浙江道辦理浙江案件稽查宗人府禮部都察院應設滿漢御史各二員次山西道辦理山西案件稽查兵部翰林院六科中書科倉場總督坐糧廳大通橋通州三倉應設滿漢御史各二員次山東道辦理山東案件稽查刑部太醫院河道總督衙門兼查五城竊盜命案應設滿漢御史各三員次陝西道辦理陝西案件稽查工部及寶源局

應設滿漢御史各二員次湖廣道辦理湖廣案件稽查通政司國子監應設滿漢御史各二員次江西道辦理江西案件稽查光祿寺應設滿漢御史各二員次福建道辦理福建案件稽查太常寺應設滿漢御史各二員次四川道辦理四川案件稽查鑾儀衛應設滿漢御史各一員次廣東道辦理廣東案件稽查大理寺應設滿漢御史各一員次廣西道辦理廣西案件稽查太僕寺應設滿漢御史各一員次雲南道辦理雲南案件稽查藩院欽天監應設滿漢御史各一員次貴州道辦理貴州案件稽查鴻臚寺應設滿漢御史各一員以上十五道滿漢御史各二十八員除河南道京畿道掌印仍照舊例聽都察院揀選保題外餘各道俱以滿漢各一員爲掌印再稽查宗室事件係宗室御史專責宗室御史今旣與各道御史一體升遷應與各道御史一體辦事其餘滿漢御

史稽查八旗內務府及滿漢御史序次差務秋審等項仍照舊辦理至御史原係言官凡遇有應行奏聞事件不必拘定省分衙門仍聽隨時據實陳奏所有應添湖廣江西福建四川廣東廣西雲南貴州八道印信行文禮部鑄給得旨依議各御史風聞言事不域以地但既按省分道專司稽查該省事務則本省之人自應迴避本省其應如何定例之處著再行妥議具奏尋議除見任漢御史內有本省人見在本省道缺辦事者都察院遵旨令其迴避酌撥別道移會吏部註冊嗣後御史缺出吏部將所出之缺分別省分如有奉旨記名應行迴避者查明扣除卽以其次之人帶領引見補放從之○己亥諭川省軍務浩繁藩司職任緊要紀山從軍前調回署理藩篆而高越初雖遲誤經經略大學士傅恆參奏及經略大學士暫駐成都辦理諸務訓飭指示高越頗知黽勉朕念

其抵任未久從寬給與道銜令其料理夫馬供應今大兵雲集紀
山一人恐照料難周高越經手一切漸覺熟諳著協辦布政使事
與紀山和衷協力共勤公事如稍存推諉之見朕必重治其罪○
辛丑飭各直省稽查驛站○撥湖廣江西留備銀二百萬兩於大
金川軍營備用○四川提督岳鍾琪奏十二月十三日派兵一千
用布袋盛土帶扎卡器具逼近塔高山梁木石城扎卡從高發礮
擊賊賊出禦兩次殺賊數十人又殺傷康八達來援賊四五十人
石城漸坍平內棘圍一周雖用大礮止擊穿一孔不能打塌報聞
○壬寅傅恆奏本月初九日臣行至天赦山乃成都至軍營第一
險路上下四十餘里尋常牽馬步行今因連雪路途益滑臣率眾
步行至極滑處將馬繩繫拉上一二步卽倒有十數匹墜入山澗
是日惟臣馬趕到官兵皆無馬臣獨乘馬不忍因步行七十里至

住宿處並未勉強眾皆歡欣隨行此路若不加修大兵恐致遲滯臣前已令侍衛達清阿等派夫開修茲又交地方官辦理達爾黨阿等奏自初七日起程皆行山肋路險處大學士皆下馬步行初八日降雪路愈險滑大學士步行可五十餘里申刻至樹林口住宿初九日雪未止起程卽步行至天赦山牽馬不能上大學士令達清阿看視設法令馬緩上親率眾上嶺奴才等勸令稍息俟馬到再行大學士不肯行三十里至戈濟而奴才等又勸卽在此住大學士又不肯奴才等看大學士步行四十餘里神色如常遂隨從前行達清阿將大學士所乘馬帶到奴才等勸大學士乘騎大學士云我於步行若稍有勉強汝等亦得知之且汝等皆係步行我獨乘馬心亦不忍又步行三十里於酉刻至根達橋住宿大學士身體顏面甚佳隨從官兵莫不稱異奏入諭經略大學士傳恆

秉心忠勇殫力宣勤不辭勞瘁雖加優獎未足酬庸從前大臣內
有加賜章服用昭寵榮者經略大學士傅恆著賞戴雙眼花翎
以示朕獎勵賢勞之意此旨須遵不可辭免又諭經略大學士傅
恆及尙書達爾黨阿所奏自成都前赴軍營沿途情形二摺著宜
示中外經略大學士傅恆忠勇奮發宣力勤勞其殫心爲國之丹
忱足以感孚眾志是以近日軍旅之事舒赫德尹繼善那蘇圖鄂
容安等率能實力籌辦用速軍行朕甚嘉焉凡爲臣工者內而亮
工熙績外而敷政甯人各宜自矢靖共恪思匪懈豈必倡而後效
始知黽勉况軍旅之事國家所不常有朕惟願與諸臣共享昇平
之福不樂盡瘁於倥偬之際也但經略大學士傅恆如此忠誠如
此勞動隨行將弁士卒目擊者固激勵興起而內外大小臣工聞
風者亦必當中懷敬服設尙不知奮勉不知效法則大義未明朕

亦惟信賞必罰耳書通行傳諭知之又諭此次大兵進剿金川經過陝省地方一切安臺馬匹事宜總督尹繼善俱能星速趕辦調度得宜於軍行甚爲有益朕深爲嘉悅著將伊從前革職留任之處加恩開復○諭訥親自辦理金川軍務以來行事乖張心懷畏縮視士卒死傷從不動念惟安逸自圖娛樂是耽而於道路之險阻兵民之疲憊一切艱難困瘁之狀從未據實入告朕因軍旅重大不容久誤特命大學士傅恆前往經略滿漢官兵飛芻輓粟籌畫多方設令訥親張廣泗早行奏聞朕必加以裁酌不至多此一番勞費矣今朕於此事頗爲追悔但辦理已成無中止之勢卽此而論訥親張廣泗誤國之罪可勝誅耶訥親張廣泗二人乃軍前之勞人憊卒所共切齒張廣泗雖經伏法而士眾尙未親覩訥親若在成都審明待報未免往返稽遲著舒赫德將訥親帶往軍前

會同經略大學士傅恆一面訊明一面將伊祖遏必隆之刀於營門正法令軍前將弁士卒共見之此旨著侍衛鄂實齋往交經略大學士傅恆尙書舒赫德遵照辦理○魏定國以年老休致調王會汾爲吏部侍郎以蔣炳爲兵部侍郎由順天府尹遷○癸卯前軍機大臣等經略大學士傅恆奏稱此番必期成功若不能殄滅醜類臣實無顏以見眾人等語朕覽之深不以爲然展轉思之竟至徹夜不寐經略大學士沿途勤瘁諸事精詳秉心之堅定大槩可見此乃出於由中非徒爲大言者然經略大學士此行爲國事乎抑爲一身乎如爲國事則當思於事有濟使徒執一己之見而不計及國體並不計及朕躬是所謂知其一不知其二者也金川之事朕若知征途險阻如此川省疲憊如此早於今秋降旨以萬人交岳鍾琪料理更不必調派滿兵特遣重臣費如許物力矣奈無一人

具奏朕實不知彼地情形辦理至此籌畫周矣人事殫矣若夫成功則有天焉或上蒼不遽絕其種類俾偷生窟穴原屬化外於國家何關輕重而強以人力抗天心其將能乎經略大學士非不明察事機深悉理勢者見酌撥帑項千萬有奇至動及各省留備銀兩已屬拮据即使國家府藏充裕而罄小民之脂膏捐士卒之軀命以供一人之必欲成功天下其謂經略大學士何是則朕必欲經略大學士之成功而不惜小民之脂膏不恤士卒之軀命矣天下其又謂朕何況經略大學士此番忠誠勇往勤勞盡瘁不惟將士人人感發凡內外大小臣工孰不欣動孰不欽服卽萬一不能擒醜虜得巢穴而既有斬獲亦得謂之成功何不可見眾人之有儻必存過甚之見直是專爲一己轉無以見眾人卽朕亦無以對眾人矣揆之事理岳鍾琪得土兵千人尙能稍振聲勢以經略大

學士之壯猷滿兵之驍勁何堅不摧果能克取賊巢擒獲渠酋固可全勝否亦必殲其逆黨躡其要地奪其堅碕彼必恟懼乞命乘此機會因而撫納亦足以振軍威而全國體在蠻夷絕微控制之方止應如此若再有遷延不思轉計究將作何了局一至四月以後暑雨毒淫滿兵必不能堪綠旗兵丁於內地尙有兇斫毆官之案而令其久役荒菁暴露經年人情之變何所不有經略大學士所領滿兵幾何遠隔窮山甯無顧慮且如經略大學士所見堅確不移於事有濟乎否乎於理當乎否乎於么麼小醜值乎否乎經略大學士必當遵朕四月初旬以前之旨亟圖遠算通盤籌畫速行具奏朕必俟經略大學士奏到始釋懸切如仍持前見朕不待至四月必降旨召經略大學士及舒赫德還朝以軍事付策楞承辦君臣之閒自有情意股肱心膂一體相關經略大學士平日在

朕前休戚與共爲何如者以朕此時之懸切知經略大學士必夙夜勤拳思所以體朕心而慰遠念著詳悉傳諭知之○署松潘總兵哈攀龍奏小金川土司澤旺之弟良爾吉大朗素小朗素雖同一投順但大朗素小朗素係因見良爾吉霸嫂欺兄賣主謀逆心懷嫉憤仰望輸誠良爾吉則見官兵已入美諾始畏罪來投小朗素隨馬良柱攻江卡又隨任舉攻腊嶺俱有戰功後與良爾吉合兵見良爾吉心懷異志卽託病回巢至良爾吉隨買國良攻克空卡卡撒等處雖亦有微勞然聞馬邦官兵失陷遂心懷反覆臨陣不前驕縱土兵不聽約束更傳聞有云綽斯甲土兵對敵時不下槍子又暗與金酋餽糧助藥等事臣曾面稟督臣張廣泗不加查察以臣愚見莫若將良爾吉權且安置卡撒羈縻其身使不得透消息俟事竣治罪該部土兵仍令小朗素管領撥歸馬良柱部下

聖策報聞○乙巳諭軍機大臣等金川用兵定不可過四月初旬之期朕已屢經傳諭今晨恭請 皇太后聖母萬安蒙詢及此事朕以經略大學士傅恆所奏如不成功無顏以見眾人之語陳奏皇太后懿旨經略大學士傅恆此見實爲太過經略大學士傅恆此行原爲國家出力非爲一己成名如爲名起見豈有國家費如許帑項如許生命專以供一己成名之理況退縮貽誤者朝廷旣治其罪而經略大學士傅恆忠勇奮發勤勞任事如此何不可見眾人之有且人事旣盡成功與否則當聽命於天若天意不欲殄滅醜類人力何可強違經略大學士傅恆之出力期於國事有益也必謂不能成功卽不可見眾人試思果如所見於國事有益乎否乎自宜遵奉朝廷前旨爲是朕思 皇太后諭旨聖明洞悉事理益覺經略大學士傅恆所見之偏於建功立業也然以朕觀

皇太后之意亦非止爲經略大學士傳恆而發乃爲朕躬宵旰
焦勞仰座 慈念也可將此傳諭經略大學士傳恆令其敬體
懿訓以慰朕懷至進兵取道自應直趨黨壩彼處勒烏圍較近兩
酋見聚於此安知非天意留以待經略大學士之成功耶勒烏圍
旣得刮耳崖自可傳檄而定卡撒雖屬緊要但始之可進之路皆
爲誤國者所僨事以致賊知防範凡可進之路今皆堅礮林立險
峻逾常賊兵精銳所萃大兵不可久頓應分滿兵二三千人交傳
爾丹或酌派烏爾登等協助在賊酋知我大兵已趨黨壩必撤卡
撒之眾盡銳抵禦彼時我兵乘卡撒空虛攻其無備是亦出奇制
勝之一策若因岳鍾琪先在黨壩聲威稍振經略統兵前至似與
之爭功又或因卡撒進取較難不當舍難就易此等見解俱不必
存經略大學士統攝全營眾人之功皆其功眾人見知於經略大

學士卽可見知於朕岳鍾琪亦必樂於經略大學士麾下奮勉效力卽傅爾丹一舉成功亦皆稟承經略共策殊勳何分彼此用兵本非王道斷無舍易就難之理原應攻瑕搗虛以正合以奇勝闔智而不闔力若必爲所難乃一夫之勇大將當不出此朕若早知川省物力疲敝地方險阻實不肯爲此舉而此番料理已未免有類孤注矣如四月初旬已能攻困烏圍全勝止在呼吸自無虧一簣而棄前功之理否或連陣克捷大挫賊鋒亦可收局儻仍不過在卡撒黨壘閒遷延觀釁則勞費無已勢將難繼今各省撥協錢糧已動及留備而部庫所存通計僅二千七百餘萬若遲至秋冬則士馬疲憊餉餉繁難此二千七百餘萬者且悉以擲之辦荒絕徼設令內地偶有急需計將安出此朕四月初旬之諭所爲諄諄也舒赫德職司國計並宜體悉一切留心其軍前糧務關繫緊

要見在奸棍私買餘米射利一案經兆惠等參奏經略大學士自不必分心及此惟知會兆惠等令其實心查察嚴飭官商無致滋弊可耳○丙午大學士九卿議前奉旨酌定守令久任之例臣等以各省所定道府同知通判州縣繁簡之處未允又直隸州知州向不歸部選應分別更定請交各省督撫妥議今據各該督撫陸續將員缺詳酌更定具題除將改歸部選各員缺卽照所請註冊外請嗣後應題缺出必本任內歷俸五年以上應調缺出亦必本任內歷俸三年以上方准揀題如無合例之人卽請旨揀發至於優敘鼓勵之法請令該督撫每年察訪各屬將會經升調各員在任又滿三年才守兼優政績卓著者保題到部註冊准加一級俟其任滿六年果能稱職保題到部知府加副使道銜直隸州知州加知府銜知州加同知銜知縣加通判銜註冊候缺題升卽有降

革留任之案非例有展參者均准題升帶於新任若有降調卽照加銜查銷又直隸州知州向無在部候選之人今各省請歸部選者共十六缺請於六部滿漢主事內各堂官揀選保送吏部引見記名歸於雙月滿漢輪選至外省應補直隸州人員到部歸於單月補用從之○戊申命四川發常平倉穀平糶○是歲朝鮮琉球來貢